

WANT

NIUSPEPA BILONG YUMI OL PAPUA NIUGINI STRETI 27 YIA NAU

32 pes Namba 1,259 Wik i stat long Fonde Ogas 13, 1998 50t

WANT

• Aitape ripot.
- pes 3,4 na 5




• Lae Nius
- pes 11-15

• Kanage bilong dispela wik.
- pes 17


OPM gat tripela moa de long kilim man Indonesia - pes 3

Ol minista pret nau long Skate

SINEK O MORAN



• Iairo Lasaro.



• Ian Ling Stuckey.



• PM Bill Skate.

YAKAM KELO i raitim

GAVMAN bai kamapim moa senis long ol Minista bilong em liklik taim bihain. Praim Minista bai mekim senis yet long sampela Minista bilong em bikos sampela Minista i gat hevi namel long ol yet na pati bilong ol.


Praim Minista Bill Skate i tokaut long aste olsem memba bilong Siassi Mao Zeming nau i go bek long Hausing ministri na Peter Arul i go kisim Ministri bilong Forestri. Tupela Minista ya i bin kisim nupela ministri tupela wik i go pinis na nau tupela i senis gen. Pati bilong Pipels Demokretik Muvmen

(PDM) na ol lain husat i bin lusim Oposisen na go insait long Gavman i wok long kamap planti. Ol i stap insait long PNG Fes pati we i bungim Independen na Pipels Nesenel Kongres (PNC) pati bilong Bill Skate wantaim.

i go moa long pes 2



• Poto ya i soim yangpela man ya Amos i holim bikpela Moran sinek. Amos wantaim grup bilong em i bin stap las mun long we kam long Praim Minista Bill Skate long Mt Hagen. Poto: James Kila.



MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOOT

Hagen, Westen Hailans:

Wanpela raskol grup i bin bagarapim 13-pela skul meri bilong Okapa Hai skul long las wik Trinde.

Plis ripot i tok 18-pela man i holim ol gan na go insait long haus bilong ol meri long biknait namel long 1 na 2 kilok samting na bagarapim ol meri. Tripela meri em ol i bin sutim ol wantaim sampela kain posin marasin bipo ol raskol i ronawe.

Ol atoriti long provins i kirap nogut tru long dispela kain pasin i kamap long bagarapim ol pikinini meri osem.

Ol i tok dispela trabel em i nogut tru we i kamap insait long wanpela edukesen instituse long provins.

Plis i holim pasim faivpela long ol man nogut. Wanpela bilong ol em i sumatin man long skul.

Ol plis na ol edukesen atoriti long provins i karim ol wok painimaut long dispela samting nau.

UPNG, Mosbi:

Insait long tupela wik, ol raskol i bin stilim tripela ka long Yunivesiti, Waigani kempus.

Plis i ripotim olsem nogat man i bin kisim birua long ol dispela stilpasin. ol i painim pinis wanpela ka.

Plis i tok ol stilpasin i bin kamap long san tasol.

Long wanpela, man Siapan em wanpela leksera long Yunivesiti i bin sindaun long opis bilong em wetim ol sumatin long toktok long ol kos bilong ol. Orait, tripela man i holim ol naip i wokabaut i go long opis na odaim em long givim ol ki bilong ka bilong em. Ol bin taitim han, leg na maus bilong em wantaim stiki tep, kisim ki na walet bilong em na ronawe.

Plis long Waigani i ripotim olsem long sem de, wankain samting i bin kamap long wanpela famili husat i bin go lukim sampela lain bilong ol long kempus.

Rabaul, is Nu Briten:

Nainpela hatko kriminel i bin ronawe long Keravat plis sel long wiken.

Mekim na ol plis i wok long strongim ol kot long givim hariap ol riman pepa long putim ol man long kalabus.

Ailans Plis Divisenel Komanda John ToGuata i tok ol mas noken sutim tok long ol plis bikos Kokopo Distrik kot i no givim riman pepa i go long ol plis bilong kisim ol man ya i go long haus kalabus.

Plis i autim nem bilong nainpela man olsem Albert BObor bilong ples Butlivuan long Duk ov Yok Ailan, Francis Kedek bilong ples lavakaka, Steven Palita bilong ples Ratung, Reuben Levi bilong tavui No 1, olgeta long Is Nu Briten, Julius Mataio bilong Vitu Ailan insait long Wes Nu Briten, Cletus Bambi, Richard Sora bilong Angoram na Francis Aiki olgeta tripela bilong Is Sepik na Steven Mondo bilong Morobe.

Gavman noken mekim planti senis, Diro tok

GAVANA bilong Sentrel, Ted Diro, i tok gavman noken mekim planti senis tumas long ol sinia pablik sevan.

Diro tok long planti senis long het bilong ol dipatmen na arapela gavman bodi long 12-pela mun i go pinis i daunim stret gutpela wok spirit bilong ol pablik sevan. NA dispela i bagarapim wok bilong givim sevis long pipel.

"Long ol hatpela taim

olsem nau, mas i gat bilip long ol pablik sevan. Bikos em ol pablik sevan i mas karimaut ol disisen bilong politisian. "Ating piksa i kamap klia nau long wanem as long liklik sevis pipel i kisim i no go gut nau long ol," Diro i tok.

Em i tok long dispela yia tasol i gat tripela gavana bilong mama beng (Beng ov PNG), na tripela Treseri

Seketeri.

Ol nupela bos bilong dispela tupela gavman bodi em Morea Vele na Brown Bai. Diro i tok dispela em tupela namba wan saveman em gavman i makim. Olsem na gavman i noken senisim tupela.

Em i tok Mista Vela na Bai em tupela rait man long stiam kantri i go long stret rot long dispela taim nogut.

Caritas PNG egens pasin bilong bagarapim meri

CARITAS PNG, wanpela NGO grup we i lukautim raits bilong ol pipel i wokim strongpela tok egensim pasin we ol man nogut i bin bagarapim 13-pela skul meri bilong Okapa Hai skul insait long Westen Hailans las wik.

Long wankain taim tu, grup i rabisim pasin we wanpela wanpisin long Jimi eria bilong Westen Hailans i givim tupela yangpela pikinini meri bilong ol olsem kompensesen peimen long narapela wanpisin lain.

Long ol ripot i kamap long dispela wik, 18-pela man nogut long las wik Trinde i bin go

insait long haus bilong ol meri wantaim ol gan long biknait namel long 1 na 2 kilok na bagarapim 13 skul meri.

Presiden bilong Caritas PNG Paul Lokei long wanpela stetmen i tok dispela kain pasin i bagarapim ol rait we God na mama lo bilong kantri i givim na tu rausim na stilim olgeta gutpela samting ol meri i gat.

Mista Lokei i tok hamas moa hevi ol meri na ol yangpela gel bai i bungim long han bilong ol man nogut husat i wokim ol pasin nogut?

Ol minista pret nau long Praim Minista Bill Skate

i kam long pes 1

Ol memba bilong Independen na PDM i no amamas bikos ol i ting Praim Minista i wok long harim tok bilong lan Ling Stuckey Minista bilong Pablik Sevis na olpela wokman bilong Wol Benk Dokta Rerouz Hamidian-Rad. Em i stap olsem bisnis (ekonomik) edvaisa bilong Gavman. Ol i ting lan Ling Stuckey na Dokta Hamidian-Rad i wok long tokim Praim Minista Bill Skate long husat Minista bilong makim na senisim, husat seketeri na het bilong ol Gavman opis long makim na senisim.

Insait ripot i tokaut olsem sampela Gavman Minista i bin bung long wiken na autim bel hevi na wari bilong ol. Tasol dispela toktok bilong ol i go kamap long Praim Minista na i mekim em i kros tru long ol dispela lain Minista bilong em long mekim ol dispela kain tok beksait.

Insait ripot i tok bai Praim Minista i rausim na senisim sampela Minista yet long soim dispela mekimsave bilong em long ol Minista bilong em.

Taim bilong Praim Minista long rausim ol Minista na senisim ol em bai liklik taim bihain. Sapos Yauwe Riyong memba bilong Suave i lus long ileksen kot bilong em, bai Gavman i mas mekim senis long makim nupela Minista bilong Woks. Long dispela taim, bai ol senis i kisim arapela Minista tu, insait ripot i tok.

Arapela insait ripot i tok lan Ling Stuckey i gat ol gutpela sapota bilong em insait long Gavman olsem Nakikus Konga, Kilroy Genia, Sir Rabbie Namaliu, Jim Kas na Charlie Benjamin. Pati bilong Bill Skate, Pipels Nesenel Kongres (PNC) i gat 6-pela memba tasol. Ol hailans Independen grup na ol lain i bin muv long Oposisen i go i kamapim namba bilong PNG Fes Pati long 23.

Ripot i tok ol Hailans Independen grup bilong Pater Robert Lak, Peti Lafanama na

Fabian Pok i laikim Praim Minista i mas givim ministri bilong Petroleum na Ges i go bek long wanpela hailans lida long Enga na Sauten hailans provins. Dispela posisen nau em Sir Rabbie Namaliu i stap long tupela wik i go pinis.

Praim Minista Bill Skate i tokaut long wanpela bikipela bung long aste olsem olgeta pati long Gavman bilong em i stap bung wantaim. I nogat wanpela bruk o pundaun long Gavman bilong em namel long ol memba.

Mista Skate i tok ol toktok salens namel long Mista lan Ling Stuckey na Dokta Fabian Pok (tupela sinia Minista) i pinis nau. Ol i toktok wantaim na stretim wanbel pasin na nau Gavman i sanap strong wantaim long lukluk long ol bikipela hevi bilong kantri long sait bilong ekonomi (mani), Bogenvil, lo na oda na gutpela Gavman bilong PNG, Mista Skate i tok.

Toktok bilong kamapim tupela Deputi Praim Minista i bin kirapim bel bilong ol Minista na Gavman memba tu. Toktok i bin kamap olsem bai lan Ling Stuckey bai kamap wanpela namba tu Praim Minista na laro Lasaro bai kamap narapela namba tu Praim Minista. Dispela i min olsem Michael Nali, lida bilong Pipels Progres Pati (PPP) bai ino inap namba tu Praim Minista moa.

Tasol lida bilong PDM, laro Lasaro i tokaut olsem em wantaim Michael Nali na Praim Minista Bill Skate i wanbel pinis olsem PPP bai holim namba tu Praim Minista yet. Na posisen bilong Tresera na Kopret Afeas bai stap wantaim PDM.

"Dispela em agrimen mipela i bin pasim long Tufi kem long las yia taim mipela i bung long fomim Gavman," Mista Lasaro i tok.

Praim Minista Bill Skate i tok Dokta Rerouz Hamidian-Rad bai i stap yet olsem ekonomik edvaisa bilong Gavman. Bikos

em i laikim saveman bilong helpim long ronim na lukautim kantri. Hamidian-Rad i mekim gutpela wok, Mista Skate i tok.

Ol lain bilong em long PDM na Independen pati i no bin wanbel long dispela disisen bilong kisim Dokta Hamidian-Rad, tasol Mista Skate i tok pasin bilong autim belhevi na tingting i gutpela na em pasin ol i mas wanbel long en. Na bai ol i ken sindaun na toktok wantaim na kamap wantaim gutpela tingting.

Gavana bilong Westen Hailans provins, Pater Robert Lak i tok PNG Fes Pati i sanap strong wantaim maski ol kain kain toktok na hevi ol yet i kamapim namel long ol yet.

Pater Lak i tok wanem samting ol lain bilong em i toktok long en i gutpela long autim wanem samting ol i laikim long pati, Gavman na tu long ol arapela senis. Tasol hevi nau we kantri i bungim long bagarap bilong solwara, bikipela san na ais, hevi bilong mani long kantri, hevi long Bogenvil i bikipela tumas. Olsem na Gavman i mas sanap strong long stretim ol dispela hevi na maski long ol politiks pait nabaut, Pater Lak i tok.

Lida bilong Oposisen Bernard Narokobi i tok dispela em bikipela asua bilong Praim Minista yet long mekim planti senis tumas long ol pablik sevans wokman na ol Minista klostu klostu.

Mista Narokobi i tok dispela Praim Minista i wok long mekim senis tasol long ol wokman na i no lukluk tumas nau long ol bikipela hevi bilong kantri olsem hevi bilong mani, ol bagarap long laip na sindaun bilong ol manmeri, Bogenvil na arapela moa.

Oposisen bai wet tasol na sapos Gavman bilong Bill Skate i no fit moa orait ol i ken larim i go long Oposisen i tekova gen long Gavman, Mista Narokobi i tok

Ol PMV bas straik long Mosbi

PLANTI skul long Mosbi siti long asde, Trinde Ogas 12 i bin pas, ol manmeri wokabaut long longpela rot i go long wok bikos ol PMV bas i straik.

Bihainim straik long Tunde moning, ol skul i pas long belo taim. Na ol tisa salim olgeta studen go long haus.

Long Trinde moning, sampela go long skul na tanim go bek long haus. Bikos planti arapela studen. Planti studen wokabaut long rot go long skul na kam bek.

Ol wokman meri tu pulap long ol bas stap. Sampela i laki na kalap long ol wantok ka. Sampela kampani helpim long go kisim ol wokman meri long kampani ka i go long opis. Na bihainim karim i go bek long haus.

Mekim na planti pipel i no tingting long raun long ol maket na stua. Dispela i givim hat taim long ol manmeri bilong kaikai buai. Bikos nogat inap buai long ol maket arere long ol rot, haus na opis ples.

Straik i stat long Tunde bihainim wanpela bung long Kone Oval. Na komplem long plis i givim ol hatpela taim.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon. Advertising Manager: Mike Kanin. Editor of Wantok: Leo Wafiwa.	Papers distributed by air throughout PNG. Available by air mail subscription within Papua New Guinea and overseas
---	--

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

KIRAP! Mama Maria i Singautim Yu

Mama bilong Jisas i save kamap long Medjugorje, em i liklik viles stap long Bosnia Herzegovina, stat long 1981 na long planti hap long wol. Em i kam long invalitum yumi long prea.

Em i tok long prea, yumi bai lainim bikipela hamamas na painim rot long olgeta bikipela hevi bai kamap klostu tru, tasol prea tasol i ken daunim. Long dispela taim we olgeta mas tingting gut, Mama i tokim mipela, strongpela hevi bai daunim yumi. Tasol yumi i ken halpim long winim dispela wantaim Kwin bilong Heven.

Em i save givim planti toksave tru, long olgeta hap long wol LONG OL visinari, i tokim yumi mas rausim ol sin na bikipela fait long wol: yumi prea long sekhan na bel isi long olgeta kantri, long olgeta Famili, long bel bilong yumi. Kirap salim dispela hap pepa long kisim fri infomesen.

Salim igo long: **The Medjugorje Sentinel, PNG Field Office, PO Box 137, Kokopo. ENBP.**

Mi laik yu salim fri infomesen:
 Pidgin English

Nem. Mr/Mrs/Ms:

PO Box.....

Wok bai go het long klinim Sissano raunwara

VERONICA HATUTASI i raitim

WOK bai kamap long klinim Sissano raunwara na kisim ol bodi bilong ol daiman na planim gut.

Deputi Asisten Kontrola bilong Aitape Stet ov Imejensi Vincent Tutu long aste i bin tokim Wantok olsem ol memba bilong Plis Forensik senta long Mosbi i kamap pinis long Aitape na ol bai kisim tupela wik long karimaut dispela wok.

Mista Tutu i tok ol bai yusim ol net long pulimaut ol bodi na planim ol gut.

Ol bai klinim wara, rausim ol pipia na wara i ken kamap gutpela na seif gen.

Planti bodi i sting na drip antap

long raunwara yet. Ol atoriti i bin lusim ol i stap olsem bikos wara i bagarap tru long sting na pipia bilong ol dai bodi i pulap long en. Na bikos ol i bin sting, ol no bin nap long kisim ol aut.

Nau yet, em i tambu long ol pipel i go long Sissano raunwara eria.

Ekting kontrola bilong Aitape Disasta na Dairekta bilong Nesanel Disasta na Imejensi sevis Ludwik Kembu i putim strengpela tok lukaut olsem nogat man bai go insait long ol eria we ol i putim tambu long ol.

Mista Kembu long aste i tok kot bai sasim ol lain husat i sakim tok na go insait long ol tambu eria.

Em i tok em i amamas long gutpela wok we ol Non gavman grup na ol sios i karimaut long

helpim ol Aitape birua lain tasol "yumi noken lus tingting olsem oda i stap we i tambuim ol pipel long go insait long hap bilong Sissano raunwara."

Mista Kembu i bin salim wanpela pas i go long asisten kontrola long Aitape long eksemim oda na sasim aninit long lo bilong imejensi husat manmeri em ol i lukim long tambu eria.

Em i putim oda tu long Difens Fos Komanda Leo Nua long larim ol ami i stap yet long eria na karimaut ol wok we i bihainim ol daireksen bilong asisten kontrola bilong Aitape birua.

I bin gat ripot long dispela wik olsem ol ami na plis bai ol i pulimaut ol memba bilong ol husat i helpim wantaim wok bilong Aitape birua na lusim ol liklik lain tasol i stap long hap.

Haus sik noken rausim kwik ol Aitape birua siklain

SINGAUT i go long ol haus sik atoriti long Wewak na Aitape long noken salim kwik i go long ples inap ol i kamap orait gut ol lain we i bin kisim bagarap long Aitape biksolwara birua.

Deputi kontrola bilong Aitape birua Vincent Tutu i mekim dispela apil bikos i hat long painim trenspot long kisim ol siklain i go bek long haus sik. Dispela em ol lain husat i bin kiism bagarap tasol ol i no orait gut stret na ol atoriti long haus sik i salim ol i go bek long ples.

Mist Tutu i tok em i orait long salim bek ol dispela husat i kisim ol liklik bagarap tasol i moabeta long lukautim gut ol dispela wantaim bikpela bagarap na givim ol marasin inap ol i orait gut tru na rausim ol i go long ples.

Em i tok planti ol lain husat i bin stap long haus sik long Aitape,

Wewak, Boram na raihu em ol i salim ol i go bek long ples. Ol ples em long ol kea senta we ol haus na ples lain i stap long en.

Em i luksave long hevi na planti wok we olwoklain bilong haus sik i bungim tasol emmi tok i moabeta long lukim olsem ol man i kamap orait gut pastaim bipo ol i salim ol i go bek long ples. Nogut bai bikpela hatwok i kamap gen bikos long hevi bilong trenspot long kisim ol siklain i go long haus sik.

Mista Tutu i tok long ol dispela we ol i bin stap long haus sik, wanpela i bin dai long Wewak haus sik. Vanimo haus sik i larim i go bek long ples 126 pipel na 50 i stap yet. Dispela em ol bin kisim ol bikpela bagarap.

PNG Difens Fos bot, MV Buna i bin karim ol lain ya i go bek long ol kea senta long Aitape.

Ol disasta lain long Aitape laikim mani

OL DISASTA opisel long Aitape i laikim gavman long rilisim mani kwiktaitim bilong peim ol bisnis haus, balus na helikopta kampani we i givim sevis long helpim wantaim Aitape birua.

Ol lain husat i lukautim ol wok bilong Aitape Disasta long Sandaun i tok sapos ol dispela kampani we i givim sevis i no kisim wanpela peimen hariap, ol bai i stapim helpim bilong ol na hevi bai i kamap.

Ol helikopta na balus kampani we i wok long givim sevis em long Ailans Aviesen, Pasifik Helikopta, Saut Wes ea, Milen Be na ol bisnis haus long Aitape, Vanimo na Wewak.

Deputi Disasta Kontrola long Aitape Disasta Vincent Tutu i t mekim ol rilif wok long karim ol kaikai, marasin, klos, ol arapela samting na ol imejensi wok we i kam aninit long Aitape birua.


Mista Tutu i tok ol i salim ol bil i go long opis bilong Nesanel Disasta na Imejensi Sevis (NDES) opis long Mosbi hetkota bilong wokim peimen long ol.

Em i laikim bai ol atoriti i skelim dispela samting na wokim peimen kwiktaitim long stapim hevi we bai kamap sapos ol i no stretim ol helikopta na balus kampani na ol bisnis haus.

Wantok i bin toktok long NDES opis long Mosbi we i autim olsem em i tru bikpela bil we mak bilong em i klostu painim K1 milien mak i stap long peim ol dispela kampani we i givim sevis long helpim Aitape birua.

Em i tok ol provinsel gavman long Sandaun, Wewak na long ol arapela hap moa i gat dinau tu long ol sevis kampani we ol i mas peim long en.

Ripot i tok NDES i luksave long ol bil na Nesanel Disasta Komiti bai i bung long dispela wik long stretim dispela



OPM gat tripela moa de long kilim man Indonesia

FELIX RAMRAM i raitim

I GAT tripela moa de tasol i lep long Indonesia na PNG gavman i bihainim askim bilong Oganisesen Papua Merdeke (OPM) longk sevim laip bilong wanpela man Indonesia, husat em OPM i holimpas i stap nau long bikbus long saut wes bilong Vanimo taun.

Hai Koman bilong OPM fridom paitman i bin givim ol otoriti bilong Indonesia na Papa Niugini tupela mun tasol stat long Julai 16 i kam inap long Septemba 16, 1998.

Dispela oda i kamap bikos i nogat gutpela samting i kamap long ol toktok OPM i paitim pinis inap 4-pela taim nau wantaim ol

atoriti bilong tupela kantri.

Taim em i tokaut long dispela samting, Militeri Komanda bilong OPM, Hans Bomai i tok em i bilip dispela askim bilong OPM i go pinis long han bilong ol Foren Afeas opisel bilong PNG longg givim i go long Indonesia gavman. Em i bilip tupela kantri i luksave long ol dispela askim pinis. Na OPM Hai Koman nau i wetim tasol sampela gutpela samting long kamap bihainim ol dispela askim.

Hans Bomai i tokaut olsem em i laikim tasol nupela Presiden bilong Indonesia long mekim sampela gutpela toktok olsem bai em i mekim gutpela disisen long independens bilong ol Wes Papua pipel.

"OPM i mekim planti bikhet pasin na kamapim pait, em bikos mipela i laik kisim independens, em tasol. Planti ol narapela toktok em ol giaman toktok. Mipela laikim independens," Mista Bomai i tokaut olsem. Man Indonesia OPM i holim kalabusim em nem bilong em Markimen Martioti. Em i gat 42 krismas. Na em i marit na i gat 4-pela pikinini. Em i bilong Is Javatimur, Madiun sab distrik long provins bilong Surabaya insait long Indonesia.

Hia em 7-pela askim bilong OPM i sanap olsem:

- Indonesia gavman i mas sekim gen Rome Agrimen;
- Presiden Habibi i mas luksave long promis bilong olpela Presiden Soharito long luksave na givim independens long Wes Papua bihain long 30 krismas. Tasol dispela 30 krismas i pinis;
- Indonesia gavman i mas sekim gen Yunaited Nesens Agrimen bilong 1969 Referendum;
- Presiden Habibi i mas luksave long ol Wes Papua Dikleresen;

1. Julai 1, 1971.

2. Desemba 14, 1980.

3. Na protes bilong Julai 1-3, 1998 insait long Jayapura taun.

• Presiden Habibi i mas yesa long givim independens i go long Wes Papua. Sapos nogat, OPM bai kilim dai Indonesia man OPM em i holim kalabusim i stap long bus;

• Presiden Habibi bai i mas karim hevi taim OPM i kilim kalabus man ya;

• OPM i makim Katolik sios olsem namel man long stretim rot na makim taim long holim wanpela miting nem long OPM na Indonesia long toktok bilong independens bilong Wes Papua pipel;

OPM bikman ya i tokaut tu olsem sapos ol dispela askim i no go stret wantaim tingting na laik bilong OPM, na Presiden Habibi i isi long mekim sampela toktok long dispela 7-pela astingting, OPM i singautim Indonesia Konsulet long Vanimo long givim gutpela bekim long makim maus bilong President Habibi. Ol narapela ripot tu i tokaut olsem Indonesia gavman wantaim PNG gavman bai i no inap painim isi long ol i kisim dispela kalabusman nau em OPM i holimpas i stap. Bikos OPM i luksave pinis long stail PNG gavman i save mekim wok long helpim Indonesia gavman.

OPM i tok dispela stail ol i lukim long taim PNG gavman wantaim ol NGO na Indonesia gavman i mekim long taim ol i rilisim tupela Indonesia studen em OPM i bin holim kalabusim long yia 1996. Ripot i tok ol Agrimen OPM na ol PNG Otoriti i bin sainim long Wara Puh, Wes long Bewani long dispela taim i no karim kaikai. Olsem na rilis bilong dispela Indonesia kalabusman bai i hat tru long ol atoriti bilong PNG na Indonesia.

Aitape Disasta Rilif Fan

Em lista bilong ol helpim mani i go long Katolik Bisop Konferens long helpim ol pipel long Aitape.

Catholic Bishops Conference	K2,000.00
Pontifical Mission Societies Australia	K 10,000.00
Sika Fire Protection	K1,000.00
Medical Faculty 2nd Year Students	K812.00
Daltron Electronics	K6,600.00
ANZ Bank Port Moresby	K10,000.00
M J Dwyer & Company	K2,000.00
M J Dwyer & Company Staff	K886.10
Pacific A1 Motors	K1,000.00
Teisaki Pty Ltd	K1,000.00
New Zealand High Commission	K21,704.00
Some Lecturers UPNG Waigani Campus	K 202.00
Fr A. Steffen, SVD	K100.00
P & E Hindson	K500.00
Fr. G Koller, SM (Rome)	K3,825.83
OLSH Provincialate PNG	K1,000.00
OLSH Provincialate Australia	K1,539.17
Canosian Sisters Boroko	K100.00
Marist Fathers Germany	K42,278.00
Catholic Womens League Philippines	K1,225.96
Fr Aloix Dreyer, SM (Germany)	K4,098.76
Conference of Congregational Leaders of the Pacific Islands	K4,085.28
Donors not known	K4,829.20

TORO

TORO I NO SAVE OLSEM OL P.M.V I STRAIK NA EM SANAP LONG BAS-STOP I STAP...

EM TASOL I SANAP I STAP... OLGETA MAN MERI I SAVE NA OLI NO PAIKIM BAS...




HEY?! OLGETA PIPOL GO WE? OL I LES LONG RAUN!

TARANGU LONG MONING EM SANAP IGO LONG BELO STRET...



GA?!! OLGETA BAS-A GO WE?!

HANGERE KILIM EM TRU NA EM JEST SILIP TASOL LONG BAS-PEN HAUS NA SILIP INDAI OLGETA...



ZZZ JAMBIGI JAWA FOR '98! LAPWING TIGERS! JADA WILZ HIA '98

INO LONGTAIM NA WANPELA SKUL MANGI I LUKIM EM NA GO KIRAPIM EM...



YU LAIK GO WE? OLGETA BASI STRAIK YAH!

BASI STRAIK! AIYOO! OLI NO TOKIM MI!

WANTOK

NIUSPEPA BILONG OL PAPUA NIUGINI

Kompensesen long Aitape i nogat as

Wanpela komyuniti lida long ples Yakoi long Aitape, Jerry Amuas, i tokaut long dispela wik olsem wanpela askim i kamap nau long ol pipel husat i laki long stap laip, bihainim birua we solwara i bagarapim ples bilong ol.

Dispela em askim bilong kompensesen. Em i tok ol pipel i lusim planti samting olsem haus, autbot moto, ol dingi na kanu. Na tingting nau olsem husat bai baim kompensesen long ol dispela bagarap na samting i lus.

Jerry i tok ol pipel husat i gat kain tingting em ol dispela i stap long Yakoi na Tumleo ailan na Raihu viles.

Jerry i tok em yet i nogat bekim bilong kain askim. Tasol em i tok ansa i mas kam long ol lain i lukautim na ronim wok bilong dispela taim nogut long Aitape.

Olgeta pipel bilong graun, taim samting i kamap, mipela bai laik poinim finga long husat i asua. Tasol long kain birua bilong graun we man i no kamapim, askim bilong kompensesen i hat liklik long skelim.

Tru sapos ol ples ausait long eria em gavman i luksave we i bagarap tu tasol i no kam aninit long helpim em i wok long kam nau i ken komplem long dispela.

Tasol sapos ples i stap long eria we i gat luksave, ating em i rong olgeta. Ol komyuniti lida olsem Jerry mas tingting na bipo opim maus. Noken givim rong tingting long pipel long askim long kompensesen.

Birua i kamap em bilong graun. I no gavman o lain i helpim nau long Aitape i kamapim. Na ol i gat ansa bilong kompensesen. Lusim longlong pasin bilong askim long kompensesen we i nogat as bilong en. Na givim stia long pipel long we ol i ken bung wantaim na kamapim gen gutpela laip na sindaun olsem bipo.

273 sumatin na 7-pela tisa dai, ripot tok

VERONICA HATUTASI i raitim

BIRUA bilong bikpela solwara long Aitape i bin kilim dai 273 komyuniti skul sumatin, ol ripot i tok.

Sevenpela tisa we wanpela bilong ol em vokesenel na ol arapela em ol komyuniti skul tisa i bin dai tu long dispela birua.

Ol ripot i tok 50 moa i stap lus yet.

Ol sumatin na tisa i bilong Malolol, Arop, Warupu na

Sissano komyuniti skul.

Arop komyuniti skul i bin gat bikpela namba bilong ol sumatin husat i bin dai, wantaim 175 sumatin. Rekot bilong skul i soim olsem 317 sumatin i bin rejista long skul long dispela yia.

Warupu komyuniti skul i bin rekotim 288 sumatin long stat bilong dispela yia na long ol, 88 pikinini i bin dai. Sissano komyuniti skul i bin gat 412 sumatin long stat bilong skul yia na 10 pela i bin dai long birua. I no bin gat yet namba bilong Malol komyuniti skul.

Opis bilong Nesenel Disasta na Imejensi long Waigani i tokaut long nem bilong faivpela tisa husat i bin dai long birua bilong Julai 17. Olgeta em ol man tasol.

Nem bilong tupela tisa bilong Warapu komyuniti skul em long Anslem Tekepa na Tom Pairive. Tupela wantaim i bilong ples Warapu yet. July Urum bilong Lumi i save tisa long Sissano komyuniti skul, Robert Nasnas bilong ples Arop na em i tisa long Arop komyuniti skul na Mathew

Malangas bilong Kavieng, Nu Ailan provins tasol em i tisa long Aitape vokesenel senta.

Deputi Kontrola bilong Stet ov Imejensi long Aitape, Vincent Tutu i tok skul long foapela komyuniti skul i no op bek yet. Em i tok ol bai i wetim ol atoriti long wokim plen long ples we ol pipel bai i sindaun long en na ol bai sanapim ol klasrum long en.

Katolik Sios long Aitape i helpim wantaim wok bilong sanapim bek ol skul na ol helt senta long dispela eria.



Pipia bilong haus... Sampela pipia bilong haus long ples Malol em solwara brukim na karim go hipim aninit long ol kokonas. Foto: Peter Maime.



Nogat senis long namba bilong indai

MAK long ol pipel i dai long Aitape birua i stap yet long 2,182, olsem Wantok i bin ripotim long las wik.

Ging Dawidi long opis bilong Nesenel Disasta na Imejensi Sevis long Waigani husat i wok long lukautim ol wok long dispela samting na Deputi Imejensi Kontrola long Aitape Vincent Tutu i tok i nogat nupela senis long dispela mak na olgeta samting i stap wankain olsem long las wik.

MistaTutu i ripotim tasol wanpela sikman long ol dispela i bin stap long Wewak haus sik i dai.

Mista Dawidi i tok bikpela samting nau ol i lukluk long en em long stretim gut sindaun bilong ol pipel insait long ol kea senta long Aitape, ogenaisim fri muvmen bilong ol pipel insait long ol rupela ples ol i sindaun long en na helpim ol long kisim bek gutpela tingting bihain long ol wari, bagarap na hevi ol i bungim long lusim ol famili memba na haus lain bilong ol.

Em i tok helpim wantaim ol kaikai, klos, marasin, ol samting bilong kuk na kaikai wantaim, ol samting bilong wokim haus na ol arapela samting moa i wok long go gut long ol pipel insait long ol kea senta.

"Ol pipel i wok long kisim gut ol samting. Samting nau em long skulim gut ol na noken bagarapim ol wantaim ol planti samting.

"Yumi mas skulim ol gut long noken dipen tumas long ol helpim samting bikos i gat taim bilong ol long pinis. Na sapos ol saplai i pinis, ol noken ting olsem bai ol i kisim nating ol samting," Mista Dawidi i tok.

Palamen skruim Stet ov Imejensi long Aitape

STET ov Imejensi long Aitape birua eria bai go het long narapela tupela mun i kam.

Palamen long las wik Fonde i bin sindaun long wanpela spesel bung long lukluk long Aitape birua na ol i wanbel long skruim Stet ov Imejensi i go long narapela tupela mun. Wanpela wik bihain long Aitape birua i kilim dai planti tausen pipel na kamapim hevi long planti arapela moa long Sissano raunwara eria long Aitape, Wes Sepik provins, gavman i bin putim Stet ov Imejensi long eria bilong birua. Dispela em long Julai 23 na inap ekspai long Ogas 12. Tasol long las Fonde,

palamen i skruim i go gen long narapela tupela mun.

Bung i bin wanbel long rausim ol tambu long ol arapela hap bilong provins na lusim tasol long dispela we birua i bagarapim ol long Sissano eria.

Ol eria we skruim imejensi taim i karamapim em long Aitape is i go long wes. Dispela i karamapim nambis eria i go aut 40 kilomita long dispela hap eria

Siaman bilong Palamentri Imejensi Komiti Ben Kuok i bin tok pasin we palamen i mekim long skruim taim i gutpela bikos planti wok i stap yet long ol birua eria. Na tu bai i givim sans long ol lain i karimaut gut ol rilif wok long lukim olsem ol dispela we i kisim bagarap na taim nogut i kisim gutpela helpim na sindaun gut.

Praim Minista Bill Skate i tok ol lain we i helpim long karimaut wok long imejensi bai i go hetim wok.

Mista Skate i bin tok ol bai kirapim wanpela atoriti long Aitape olsem dispela long Rabaul, Gesel Restoresens Atoriti, long go pas long ol wok bilong stretim ples, ol pipel, ol rot, skul, haus sik na ol arapela wok moa long eria.

Oposisen pati na sampela arapela grup i no wanbel long gavman i putim na gen skruim Stet ov Imejensi long Aitape birua eria.

Pati lida Bernard Narokobi i bin tok gavman bai i tromoim bikpela mani nating long baim ol difens, plis na ol arapela opisa husat i go insait long dispela operesen wantaim tu ol arapela kos.

Deputi kontrola long Aitape Disasta Vincent Tutu i tok i gutpela long gavman i putim na skruim Stet ov Imejensi long ol dispela samting:
• Long sait bilong lukautim sekyuriti;
• Stapim ol ausait lain i go pulap nabaut long ol kea senta bikos dispela bai kamapim hevi long ol helpim kaikai we ol kea senta lain i kisim
• Stapim ol pipel long go long raunwara eria we nau i bagarap long ol dai sting bodi i drip antap long en.



Wewak em saplai senta bilong Aitape

YAKAM KELO i raitim

EMEJENSI Komiti long Aitape bagarap i bin makim Wewak olsem senta bilong bungim olgeta kago na saplai bilong salim i go long ol manmeri bilong Aitape husat i bin kisim bagarap long solwara long Julai 17.

Siaman bilong dispela emejensi komiti Bitan Kuok i tok komiti bilong em i skelim olsem Wewak i moa klostu long Aitape na kos bilong karim ol kago na saplai i go bai isi liklik na tu bai i hariap.

Mista Kuok i tok ol i bin tingim long bungim olgeta samting long Vanimo taun aninit long lukaut bilong Provinsel Gavman bilong Sandaun provins yet. Tasol bikos long dispela luksave we i longwe long sait bilong trenspot na kos bilong haiarim helikopta o ka bai i bikpela moa na tu ol samting bai i westim taim long kamap long Aitape.

Komiti i bin laikim tu long surukim taim bilong karimaut emejensi wok long hap i go moa long tupela mun. Dispela em long larim ol wokman i stretim gen ol ples we i bagarap, stretim gen ol haus, skul, haus sik, haus lotu na ol arapela samting moa we i bin bagarap. Na bikpela samting em long lukautim gut ol manmeri husat i bin kisim bikpela bagarap long bodi na skin bilong ol. Dispela tu bai mekim ol dokta na nes i mekim gut wok bilong ol long stretim ol kain bagarap olsem. Narapela bikpela samting tu em long larim ol sios na arapela kaunseling lain long i go sindaun wantaim ol manmeri husat istap nau long bikpela wari na krai na pilim pen i stap.

Mista Kuok i bin tokaut long palamen haus las wik olsem bikpela wok i stap yet long stretim ol hevi na bagarap long Aitape olsem na Gavman i mas surukim narapela tupela mun gen long ol wokman i mekim wok long hap.

Palamen i bin wanbel na givim narapela tupela mun gen long wok bilong Stet ov Emejensi i go het.


Praim Minista Bill Skate i tok em i gat bikpela amamas tru long lukim ol helpim i kam long olgeta manmeri bilong Papua Niugini, Australia manmeri na Gavman, Amerika, Frens na planti arapela kantri moa. Mak bilong olgeta mani bai kamap olsem K6 milien wantaim ol kaikai, kolos, ol tuis bilong wokim haus, marasin, na planti arapela samting moa. Nau yet mani i sanap olsem K3.74 milien long pasbuk.

Mista Skate i tok olgeta mani bilong ol ovasis kantri na ol kampani, grup na ol manmeri bai i go stret long karimaut wok bilong em long Aitape. Na bai i gat rekot bilong olgeta wok mani i go long en.

Mista Skate i tok long rekot em i kisim long dispela bagarap, moa long 2,000 manmeri na pikinini i dai pinis long birua bilong dispela solwara. Na mak olsem i kisim bagarap long bodi na skin nabaut na slip long ol haus sik long Vanimo, Wewak na tu long Aitape kea senta.

Bikpela wok bilong Gavman nau em long painim wanpela hap graun bilong mumiv ol dispela manmeri i go stap long en. Ples bilong ol i bagarap pinis na Gavman wantaim atoriti bai painim hap ples bilong ol manmeri i ken go sindaun na statim nupela laip bilong ol long en.

Askim bilong kompensesen kamap nau



FELIX RAMRAM i raitim

ASKIM bilong ol pipel husat i kisim bagarap long solwara long Aitape em

husat nau bai baim kompensesen long planti samting ol i lusim long dispela birua.

Komyuniti lida bilong ol pipel bilong ples Yakoi ausait tasol long Aitape taun, Jerry Amuas, i mekim dispela askim bikos planti nau i gat kain kwesten long bel na tingting bilong ol.

Mista Amuas i tok em yet i nogat ansa long kain askim. Tasol em i autim long pablik bikos dispela askim o tingting i stap long ol papamama na famili.

Em i tok bekim bilong dispela askim i mas kam long ol lain i lukautim na ronim wok bilong dispela taim nogut insait long Aitape. Sapos nogat nesenel gavman yet i mas gat ansa bilong dispela askim.

Em i tok ol pipel i lusim samting bilong ol olsem ol haus, autbot moto, ol dingi o raba bot, kanu na narapela moa.

Em i tok ol lain long ples Yakoi na Tumleo ailan na Raihu viles i gat askim long pes bilong ol long dispela belhevi. Bikos ol i lusim

traipela moni, taim na hatwok long planti yia long gat ol dispela samting. Tasol insait long dispela bikpela solwara, ol i lusim pinis olgeta propeti na moni bilong ol.

Em i tok long Yakoi viles, papa bilong wanpela pementen haus i kos long K25,000 long taim em i pinisim. Tasol taim dispela solwara nogut i kamap, em wantaim famili bilong em i lusim dispela traipela haus insait long sampela seken tasol.

Ol narapela i lusim ol dingi wantaim moto, ol haus slip, kopra draiya, ol tenk wara, ol liklik stoa wantaim ol narapela. Na ol dispela samting i kisim mipela de, wik i go long mun na planti krismas. Long wok na painim mari long mekim sindaun bilong mipela insait long ples i kamap gutpela, em i tok.

Tasol insait long sampela seken tasol long apinun bilong 17 Julai. Olgeta samting we mipela i tuhat na hatwok long en i pinis nating tasol. Na nau mipela olgeta i sanap olsem wanpela diwai i nogat lip. Na mipela tu i luk olsem ol trangu man olsem nau tasol i kam long narapela hap, em i tok.



• **Post PNG mensa long Goroka opis, Eric Eribiang (sanap raithan) wantaim ol hatpela wokman meri bilong em i soim sampela saplai em ol manmeri i bungim na givim long ol long helpim ol trangu long Aitape.**

Poto na Stori: Sape Metta

Ol Post PNG Goroka woka bungim sapot long helpim Aitape pipe

BIRUA long Aitape we solwara i kilim na bagarapim planti manmeri na pikinini i kisim stret lewa bilong planti pipel long kantri na ovasis wantaim.

Na long soim belsore bilong ol, planti i givim kainsain helpim long klos laplap, plet sospen bilong kuk, sel haus, marasin,

kaikai, wara bilong dring na mani wantaim. Wanpela grup long Goroka husat i givim helpim tu em ol wokman meri bilong Post PNG opis. Ol i bungim sapot na go raun long olgeta hap kona bilong taun, na tu long ol ples arere long taun. Na kisim bikpela sapot stret i kam long ol pipel

bilong Isten Hailans. Ol i bungim K1,061 olgeta. Ol bai bungim dispela mani long disasta benk akaun long Goroka.

Post PNG mensa long Goroka, Eric Eribiang i tenkim olgeta pipel long sapot ol i givim. Em i tok opis bilong em bai op long salim fri ol kago i go long

Aitape, we ol pipel i no inap long baim. Em i tok dispela sevis bai op long sampela moa wik i kam.

Em i tok tu olsem planti kaikai olsem beg kaukau em ol pipel bilong ol ples arere long taun i bungim nau. Na bai kiism i go long opis bilong em long salim long Aitape.

4-pela Madang memba givim K70,000 long Aitape

BEN TAUMAI i raitim

FOAPELA Memba bilong Madang provins long Palamen i bungim K70,000 olgeta na tokaut long givim i go long ol pipel bilong Aitape.

Long dispela mani, Gavana Jim Kas i givim bikpela tru. Em long K50,000. Dispela mani bai kam long lilektorel Developmen Fan

bilong em, em nau ol i kolim Rurel Eksen Program (RAP).

Ol arapela memba husat i givim helpim em Memba bilong Madang, Jacob Wama wantaim K10,000, Raikos Memba, Stahl Musa wantaim K5,000, na Usino-Bundi Memba, George Wan i givim narapela K5,000. Gavana Kas yet wantaim sampela opisa bilong em i bin go lukluk raun long bagarap long Aitape. Dispela em long namba wan wik

bihain long birua i kamap. "Mi go lukim ol bagarap na mi no inap long bilip. Olsem na mi askim nau olgeta pipel insait long provins long givim helpim mani long mani na ol arapela samting," em i tok.

Gavana Kas i tenkim ol tripela memba, em long Musa, Wama na Wan long kam wantaim na ol bungim dispela helpim. Em i askim tu ol arapela memba bilong Madang long givim wankain helpim.

WANTED: "THE TIKTOK GANG"

3 NEW TASTY FLAVOURS ON THE RUN

REWARD: "GREAT TASTING BISCUIT"

Ol Bogenvil stori wantaim VERONICA HATUTASI

Pipel mas autim tingting

OL PIPEL bilong Bogenvil i mas autim na bungim tingting wantaim long wanem samting tru ol i laikim. Olsem ailan i kisim indipendens. Na ol i mas wokim disisen long laik bilong ol na i no wanpela grup i fosim long ol.

Wanpela man Bogenvil husat i no laik bai nem bilong em i kamap long niuspepa i bin tok-tok long Wantok niuspepa na autim tingting bilong em long dispela samting we i wok long kamap planti long nius long dispela wik.

Em i laikim tu ol BRA/BIG, BTG na ol bikman long ailan i

mas holim miting na bungim ol tingting bilong ol wantaim na tokim ol pipel bilong ol wanem samting tru ol i laikim.

Tasol man ya i tok bipo ol dispela samting i kamap, ol BRA na resistens grup long ailan i mas lusim ol samting bilong pait.

"Olgeta ol dispela samting i mas kamap taim ol pipel i sindaun gut na nogat pret pasin i stap. Gutpela sindaun i mas kamap pastaim na ol pipel i no inap pret long autim tingting bilong ol.

"Dispela bai kamap taim ol grup we i bin stap insait long pait

long Bogenvil i lusim ol samting bilong pait. Maski yumi toktok long indipendens, referendum o vot, long bihain taim bilong Bogenvil na gutpela sindaun, ol dispela samting bai i no go gut inap long ol lain i karim ol samting bilong pait olsem ol BRA, resistens na husat grup moa i lusim ol disepla samting," man ya i tok.

Em i tok planti pipel bilong Bogenvil, maski ol i stap long ailan o long narapela hap bilong kantri i laikim vot long mekim disisen wanem kain gavman ol i laikim long ailan bilong ol.

Bogenvil lida bung bai kamap long Ogas 20-23

BUNG bilong olgeta Bogenvil lida ol i kolim long Pen Bogenvil miting wantaim nesene gavman bai i kamap long tupela wik i kam.

Opis bilong Bogenvil Trensisenel Gavman long dispela wik i tok bung bai i kamap insait long tripela de na em long Fonde Ogas 20, 21 na 22.

Ples bilong holim bung em ol i no wanbel tumas long em yet tasol planti lain i laikim olsem bung i mas kamap long Buin.

Robert Tapi husat i eksekutiv opis bilong BTG i tok wanpera bikman bilong Bogenvil Interim Gavman, Andrew Miriki na lain

bilong em i wanbel long bung i kamap long Buin. Ol siefs bilong not na saut Bogenvil insait long bung bilong ol tupela wik i go pinis i bin wanbel long holim bung long Buin, saut Bogenvil.

Mista Tapi i tok as long ol siefs i les long Arawa na ol i laikim Buin long holim bung long en em ol i laikim ples we ol bai lukautim gut sefti na sekyuriti bilong ol Na ol bai noken pret long autim ol tingting bilong ol.

Em i tok maski Arawa i stap olsem nutrel eria na em i tambu long ol ami na ol arapela grup husat i holim ol samting bilong pait, ol meknais we i wok long kamap

yet long hap (Arawa) i mekim ol man i wari long sefti bilong ol.

Tasol ol ripot i tok BRA/BIG lida Joseph Kabui i laikim bung i kamap long Arawa bikos em i namel hap.

Long dispela bung, BTG bai i prisenim long nesene gavman, BRA/BIG wanem ol tingting bilong em long edresim politikel futja bilong Bogenvil na tu gavman bilong ailan we ol bai fomim bipo long dispela yia i pinis.

Mista Tapi i bin tok BTG i no laik mekim toktok egensim BRA/BIG long ol toktok long indipendens bilong Bogenvil bikos em i laik stap long namel. Tasol

em i lusim dispela long han bilong nesene gavman.

Em i tok BTG i laik lukim olgeta sait i kamap long wanpela kompromais o agrimen.

Long wankain taim tu, ripot we Wantok i kisim long Bogenvil i laikim bai ol i mas wokim ileksen long makim ol lida long nupela gavman bilong provins. Dispela em gavman bai i kisim ples bilong BTG.

Gavman ya bai i karamapim BTG na BRA/BIG long en.

Ajenda bilong gavman ya em bai i stap long top lista bilong dispela Bogenvil lidas bung.

Kabui strong long Bogenvil mas kisim indipendens

BOGENVIL bai mas kisim indipendens yet.

Dispela em toktok we Bogenvil Revoluseneri Ami lida Joseph Kabui i tok. Em i tok em na lain bilong em bai i toktok na wok hat yet inap Bogenvil Ailan i kisim indipendens.

Long ol ripot bilong dispela wik, Mista Kabui i tok em no laikim narapela samting moa, tasol long Bogenvil i mas kisim indipendens.

Em i tok insait long laspela nainpela krismas, ol BRA/BIG i bin pait wantaim ol gan samting. Tasol ol i senisim tingting bilong ol las yia long lusim pasin bilong pait na bihainim pasin bilong sindaun na paitim toktok long kamapim gutpela sindaun long Bogenvil.

Tasol em i tok tingting na laik bilong ol i no senis, rot tasol.

"Mipela bai sanap strong yet long Bogenvil i kisim indipendens. Mipela no nap laikim narapela samting o salim posisen bilong mipela wantaim gavman," Mista Kabui i tok.

Em i tok grup bilong em i wok long toktok wantaim nesene gavman long larim ol pipel bilong Bogenvil i vot n atokaut sapos ol i laik ailan i kisim indipendens o sapos nogat, stap wantaim PNG.

Mista Kabui i tok bipo ailan i kamapim gavman bilong em long dispela yia, em na lain bilong em i laikim bai i gat vot long Bogenvil long kisim

kliapela tingting bilong ol pipel long wanem samting tru ol i laikim long Bogenvil.

Em i tok em na lain bilong BRA sief Francis Ona, i no birua bikos ol laikim wanpela samting na dispela em indipendens.

Mista Kabui i tok sampela gavman minista long gavman bilong Bill Skate na Nali na tu ol sampela ausait grup i wok long saposim Bogenvil long kisim indipendens.

Em i tok Bogenvil i no bin hap bilong koloniel gavman bilong Britis Papua na Jemen Niugini long ol yia 188 inap long 1949 taim ol i putim tupela hap wantaim aninit long wanpela gavman aninit long Australia. Em i tok asua bilong ol koloniel gavman bilong Australia, Jemeni na Inglan na ol i purim Bogenvil wantaim PNG.

Mista Kabui i bin tok ol pipel bilong Bogenvil em ol i wanlain bilong ol pipel bilong Solomon Ailan bikos histri, pasin kastom bilong ol tumbuna, skin kala na ol arapela samting i wankain long ol pipel bilong Solomons.

Em i tok laik bilong ol Bogenvil pipel long kisim indipendens i stap wantaim ol long bipo yet na long 1976, em i bin kamap long ples klia na long stapim em long skruim dispela laik moa, nesene gavman i bin larim Bogenvil i kisim namba wan provinsel gavman long kantri.

Salvesen Ami givim K30,000 long Boram Haus Sik

WENCESLAUS MAGUN i raitim

SALVESEN Ami bilong Papua Niugini i givim Boram Haus Sik K30,000 long Trinde Ogas 12 long Mosbi bihain long ol i ritim ol hevi bilong Boram Haus Sik we Wantok niuspepa bilong las wik i bin tokaut long en.

Lutenen Kenel Roy Bungay bilong Salvesen Ami i tok dispela em wanpela bilong ol arapela helpim Salvesen Ami i wok long givim ol lain i kisim bikipela bagarap insait long bikipela solwara Tsunami i bin karamapim ol ples bilong Sissano, Warupu, Arop na Malol

long Aitape, Sandaun provins long Julai 17 samting olsem 7 kilok long nait.

Long makim maus bilong ol pipel bilong Is Sepik na Boram Haus Sik, Siv Eksekutiv Opisa (CEO) bilong Boram Haus Sik, Dokta Linda Tamsen na namba tu bod siaman Laura Martin wantaim narapela bod memba Michael Mosoro i kisim dispela mani na givim bikipela tok tenkyu i go long Salvesen Ami.

Dokta Tamsen i tok dispela mani Salvesen Ami i givim, em ol bai yusim long lukautim klostu olsem 147 pipel bilong Sandaun provins husat i stap nau long Boram Haus Sik. I luk olsem 87 pipel olgeta i



Lutenen Kenel Roy Bungay bilong Salvesen Ami i givim K30,000 sek mani long Siv Eksekutiv opisa bilong Boram Haus Sik Dokta Linda Tamsen na namba tu haus sik bod siaman Laura Martin na bod memba Michael Mosoro long Mosbi. Foto: IVAN BAYAGAU.

kisim bikipela bagarap na ol arapela i gat ol liklik bagarap. Sampela ol lain em ol wantok bilong ol lain i kisim bagarap na i stap long haus sik bilong helpim ol lain i kisim bagarap.

Dokta Tamsen i tok bikos i nogat inap mani, Boram Haus Sik i no inap long baim ol gutpela kaikai na ol betsit na ol arapela samting bilong givim ol lain bilong Sandaun husat i stap nau long Boram Haus Sik.

Em i tok long dispela wik em i bin go sekim ol lain long Fainens Dipatmen long Waigani bilong kisim sampela

moa mani long wokim ol wok long Boram Haus Sik tasol ol i bin tokim em olsem i nogat mani.

Wantaim dispela K30,000 Dokta Tamsen i tok ol bai yusim inap long tupela wik samting bilong helpim ol lain bilong Sandaun husat i stap long Boram Haus Sik. Tasol dispela mani em i no inap bilong mekim olgeta wok.

Toktok bilong i nogat mani em i no nupela samting. Long helpim Dokta Tamsen, Misis Martin i tok, stat long mun Januari yet ol i bin askim Fainens Dipatmen long mani tasol i kam inap tude Fainens Dipatmen i no givim ol gutpela bekim. Em i tok i luk olsem long

mun Julai ol i kisim tasol K50,000 na dispela em i olsem hap bilong olgeta baset mani ol i mas gat bilong mekim olgeta wok.

Misis Martin i tok Boram Haus Sik i wok long bruk i go daun na sapos ol i kisim sampela mani ol inap baim ol bikipela samting we haus sik i mas gat nau yet kain olsem waia bilong pasim ol windua bai natnat i noken go insait long haus sik na givim sik malaria long ol lain long haus sik. Em i tok nau yet ol windua na dua i nogat gutpela banis waia na ol natnat i wok long go insait long haus sik na mekim save long ol sikmanmeri, ol wasman na ol wokmanmeri bilong haus sik.

Nau, Laip i hat tumas!

Plenim gut sindaun bilong yu na femili bilong yu. Bihainim ol rot bilong femili plening.



Sapos yu laik save moa long ol rot bilong femili plening; rait i kam long:

PNG Family Health Association,
P.O. Box 839, Lae, Morobe Province.
Phone: 472 6523 Fax: 472 6296
Clinic Phone: 472 3104

Paia kukim haus bilong wanpela Kiunga famili

IAN KAKARERE i raitim

WANPELA famili long Kiunga i lusim olgeta samting bilong ol taim haus bilong ol i paia long Trinde Ogas 5 long apinun.

Petrus Malongim, wanpela sinia pablik sevan na meri bilong em, Alice, wanpela komyuniti helt woka long Kiunga haus sik wantaim ol pikinini na famili i stap wantaim tupela i lusim olgeta samting long birua ya.

Haus bilong ol i sanap long timbai tasol. Olsem na em i paia kwik tru. Na ol i nogat taim long sevim. Maski ol paiaman bilong Ok Tedi Maining Limited (OTML) i helpim long kilim indai paia.

I nogat save long wanem samting i statim paia. Tasol i gat ripot olsem ol pikinini mas pilai long masis. Na dispela i statim paia.

Nogat wanpela manmeri o pikinini i dai o painim bagarap long dispela paia.

Na nau em kaunsil bilong Kiunga taun atoriti long wod 2, Jonathan Boru, i askim

pinis ol manmeri long Kiunga taun long givim wanem kain helpim ol i ken long famili bilong Malongim.

Bipo long dispela birua long moning bilong Mande Ogas 3, ol paiaman bilong OTML i wokhat long kilim indai paia we i bagarapim bikipela wolsel na ritel outlet stua long Kiunga Famili stua. Em wanpela bilong tupela bikipela stua insait long taun.

Bikipela bagarap i kamap long dispela stua. Olsem ol manmeri bilong Kiunga taun bai yusim wanpela bikipela stua tasol nau long baim kaikai na arapela samting.

Ol Edukesen opisa lainim long givim saplai kwik long ol skul

Sampela bilong 35 provinsal edukesen opisa long ol provins husat i bin kamap long wanpela skul bilong ol long Lae Melanesian Hotel. Ol i skul long redim baset o mani plen, plenim wok na we bilong heipim ol kampani save saplaim skul samting i go stret long dua bilong wanwan skul kwik. Dispela i bihainim toktok bilong Vais Minista bilong Edukesen, Profesa John Waiko long las yia olsem planti skul i no kisim saplai kwik olsem buk. Mekim na ol student save tilim o serim ol samting. Na dispela i no gupela. Foto: Ben Taumai.



Madang Fores Asosiesen skulim ol papagraun

WENCESLAUS MAGUN i raitim

WANPELA nupela lokol non-gavman ogenaisesen, Madang Fores Risos Ownes Asosiesen (MFROA) i wok hat tru long skulim ol papa graun, rot bilong lukautim ol bus, graun, wara na olgeta samting bilong wara, bus na graun.

Eksekutiv Dairekta (ED) bilong MFROA, Steven Kadam i tok astingting bilong dispela asosiesen em bilong skulim ol pipel bai ol i ken was, lukautim na helpim ol yet long lukautim bus, graun, wara, diwai, ol binatang na ol arapela samting bilong bus, graun na wara bilong ol.

MFROA em i wanpela rejistred NGO we Mista Kadam,

Kevin Gibson na ol arapela risos owna bilong Madang i kamapim long Januari, bihain long ol i lukim planti ol hevi i wok long kamap na bagarapim ol gupela bus, graun, wara, solwara long Madang provins.

"Dispela asosiesen em bilong lukautim ol papa graun husat i gat ol risos olsem diwai na arapela samting long bus bilong ol na helpim ol long painim gupela rot bilong kirapim developmen yusim han na tingting bilong ol yet," Mista Kadam i tok.

Em i tok pastaim long ol papa graun i ken go het na mekim dispela, MFROA i go kisim namba wan step long ranim ol kos. Dispela ol skul o kos bai stiaim ol papagraun long kirapim ol liklik developmen we i no inap kamapim bikipela bagarap long bus na graun

bilong ol bihainim fores. sastenebel praktis ol planti pipel long wol i sanap strong long en.

Mista Kadam i tok ol bikipela loging kampani long kantri tude i no gat dispela tingting long helpim ol pikinini blong bihainim taim. Laik na tingting bilong ol em long pinisim ol diwai na mekim moa mani tude. Ol i save mekim olsem bihainim giaman pasin bilong baim liklik royalti mani i go long ol papagraun tasol wok ol i mekim i save kamapim bikipela bagarap we i no gat wanpela man i ken stretim.

"Olsem na wok bilong asosiesen em long givim gupela rot na kamapim gupela menesmen trening we i ken helpim ol papagraun long kirapim gupela developmen bilong ol yet na tu bringim sampela liklik wok insait long komu-

niti bilong ol yet long ples," Mista Kadam i tok.

Em i tok ol i holim pinis planti ol miting na ranim sampela trening long helpim ol memba bilong asosiesen long rot bilong kamapim developmen long bus graun bilong ol. Long Julai 6-10, asosiesen i bin holim wanpela bikipela trening long Madang Risos Senta na moa long 15 memba bilong asosiesen i bin sindaun insait long dispela kos. Insait long dispela kos ol i bin kisim skul bilong katim timba, prais bilong wanwan diwai, we bilong makim diwai stat long volumn i go long kubik mita na tu painim ol rikaveri ret long hamas ol i bin spendim long kamapim wanpela palang long wanwan diwai na luksave long wanem kain prais bai ol i ken salim timba bilong ol.

Askim long BRA lusim pait samting

VERONICA HATUTASI i Raitim

SINGAUT i go long BRA lida Joseph Kabui long toktok strong long ol paitman long Bogenvil i lusim ol samting bilong pait. Na lukim olsem sefti na sekyuriti bilong ol pipel i orait na ol pipel i sindaun gut wantaim nogat lain i holim ol samting bilong pait na wokim nabaut long ol.

Ripot we Wantok i kisim i tok em i bikipela samting tru long tingim pastaim ol pipel long sait bilong sekyuriti na sefti bipo long ol arapela samting.

Ripot i tok planti pipel long ailan i tingim bikipela hevi na bagarap we ol i bin kisim long han bilong ol BRA taim ol sekyuriti fos i bin lusim Bogenvil long 1990. Long dispela taim, ol BRA i bin kilim dai planti asples Bogenvil man husat ol i sutim tok long ol long no helpim ol long pait bilong kisim indipendens na tu sutim tok long ol olsem ol spai bilong PNG gavman na ami. Tu ol dispela we ol i bin gat ol arapela kain kros long ol em ol i peibek long ol long dispela taim. Planti manmeri ol i bin kisim ol olsem ol kalabus lain. Mekim na ol pipel i bin stap tasol wantaim maus i pas bikos ol i pret long tok wanpela samting na sapos i no stret long ol paitlain, ol bai kisim taim nogut.

Ripot i tok Mista Kabui i noken mas wokim ol strongpela toktok long Bogenvil i kisim indipendens.

"Tru planti Bogenvil pipel i laikim vot we bai skekim wanem samting tru ol i laikim na sapos ol i laikim bruk lusim PNG o ol i laikim wanem kain gavman long bihainim taim.

Tasol bikipela samting Mista Kabui na ol atoriti long Bogenvil i mas tingim bipo ol i toktok long rausim ol ami long Bogenvil em long ol paitlain long lusim ol samting bilong pait. Dispela em bikipela samting tru na Kabui i mas givim bikipela tingting long edresim dispela," ripot i tok.

Ripot i tok kain gavman we Bogenvil i kisim long bihainim taim i mas noken olsem ol dispela bilong pastaim we i no bin strongpela bikos nesenel gavman i bin yusim ol tasol long bihainim ol disisen bilong em.

Gavana Kas tokaut long helpim Good Sheepard Hai skul

BEN TAUMAI i raitim

MADANG prprovinsal gavman bai givim mani bilong wokim wanpela dabol klasrum bilong Good Sheepard Luteran Hai skul. Na dispela mani bai kam long provinsal baset bilong neks yia, Gavana Jim Kas i tok.

Gavana i tokaut long givim dispela helpim taim em wantaim Memba bilong Raikos, Stahl Musa, i mekim wanpela lukluk raun i go long hap. Na skulim i tokim tupela olsem ol i nogat gupela laibreri o haus buk na hom ikonoms klasrum.

Hom ikonoms em kos bilong skulim ol studen meri long samap, kukim gupela kaikai, na mekim ol arapela komyuniti wok, wantaim ol dispela bilong haus tu.

Mista Kas na Musa i lukluk raun tu long skul. Na toktok long ol studen long skul gut na kisim save. Na mekim wanem kain wok ol i driman long mekim long bihainim taim.

Sem taim ol studen bilong skul i givim tu gavana 6-pela katon klos laplap, ol kuk samting na tupela bokis buk na jok bilong rait wantaim K102 mani bilong helpim ol trangu pipel i bagarap long solwara long Aitape.

"KEEPING IN TOUCH BY PHONE"

NEVER GET DISCONNECTED!

All accounts over 30-days will be disconnected without further notice.

Reconnection will be subject to strict credit worthiness checks.

RESULTS

EMBARRASMENT
❖ LOSS OF BUSINESS
❖ THREAT TO SAFETY AND SECURITY
❖ UNSATISFIED CUSTOMERS
❖ UNATTENDED EMERGENCIES
❖ LOST OPPORTUNITIES
... and many more.

PLEASE PAY YOUR PHONE BILLS NOW!!

TELKOM PNG
Now we're really talking!

Wok blong stretim olupela Angliken Dogura wara saplai i go het gut

WENCESLAUS MAGUN i raitim

WOK blong stretim 60 yia olupela wara saplai sistem we ol namba wan Angliken misinari i wokim long 1930's i kisim helpim mani i kam long Melbon Rotari Klub ol i kolim "Lukautim wara lukautim laip" grup.

Dispela wok i stat long dispela wik. Moa long 40 pipel i putim han long mekim dispela wok fri wantaim supavaisa Davis Hobday bilong Rosari long Australia i go pas long wok. Ol wokman bai stetim olupela wara saplai, rausim olupela paip i bagarap pinis na putim ol nupela paip. Ol bai wokim tu foapela semen wara tenk bilong saplaim wara i go long Dogura stesin na tu long Wedau ples.

Ol Rotari lain bilong Australia i bungim pinis samting olsem AU\$40,000 bilong dispela projek. Ol i yusim pinis sampela bilong dispela mani long baim ol meteriel na trenspot. Rotari grup blong Australia i salim

tu sevenpela wokman long kam mekim dispela wok.

Holi Nem Grama Skul i helpim wantaim K6,000 bilong dispela projek. Angliken Daiosis bilong Dogura i givim K2,200 na i givim tu bot bilong ol, MV Maclaren King long wokim wok.

Dispela wok bai i stap klostu olsem foapela wik. Sekreteri bilong Dogura daiosis, Cecil Raurela i tok planti lain long komuniti i givim bikipela sapot long mekim dispela wok wantaim pasin bilong mekim fri wok.

Dogura daiosis bai salim tripela man i go long Lae long pinis bilong dispela mun long kisim skul blong wara we ol i ken go bek long Dogura na skulim ol arapela pipel long we long lukautim wara.

Mista Raurela i tok dispela em i wanpela gutpela projek bikos wantaim gutpela wara, ol pipel i ken lukautim gut laip blong ol. Dogura em i wanpela ples blong longpela drai sisen olsem na ol pipel blong Dogura bai benefit gut long dispela wara saplai projek.

Ol Bogenvil Kristen bung na lotu

LEROY BATIA i raitim

SAMTING olsem 80 deliget bilong Yunaited, Katolik na Sevent De Adventis (SDA) Sios i bung na lotu long Sande Jun 21 insait long Marimari sios long Arawa.

Secreteri bilong Sosel Konsens des bilong Papua Niugini Kaunsel bilong Sios (PNGCC) Rev Timothy Luke i go pas long dispela lotu. Het Bisop bilong Evanjelikel Luteran Sios bilong Papua Niugini, Bisop Wesley Kigasung i go pas long dispela kibung na tu i givim gutpela skul long taim bilong lotu.

Namba tu Primia bilong Bogenvil Trensisinel Gavman, Thomas Anis na Provinsel Plis Komanda bilong Bogenvil, Joel Kehan tu i stap insait long dispela lotu.

Astingting bilong dispela lotu em bilong bringim wanbel na gutpela pasin namel long ol Kristen insait long lotu

bilong Yunaited, Katolik, na SDA sios. Dispela lotu i kamap bihainim laik na tingting bilong ol Kristen Sios long Bogenvil na sapot bilong PNGCC.

Nupela bisop bilong Yunaited Sios long Bogenvil, Rev. Tutumona Himata i makim sios bilong em long dispela bung na i givim bikipela tok sori long nem bilong ol memba bilong sios bilong em insait long hevi bilong Bogenvil long ol Katolik na SDA na i askim ol long pogivim ol Kristen bilong Yunaited Sios.

Em i tok tu olsem ol memba bilong sios bilong em i redi long wok bung wantaim ol arapela sios long bringim bel isi na strongim gutpela pasin long Bogenvil.

I no bin gat ol lida, pater o mausman bilong Katolik na ol pasto bilong SDA sios tasol ol arapela memba bilong sios bilong ol tasol i bin stap long dispela kibung na i tok sori long makim sios bilong ol.

Oltaim God i save ansaim prea bilong yumi

ATING planti yumi les long pre. Ating sampela yumi i save ting, prea bilong yumi i popaia na i sutim graun nating. Nau mi laik autim wanpela liklik stori bilong strongim bel bilong yumi long skruim pasin pre i go.

Long kantri Itali i gat wanpela liklik skulboi nem bilong em Beppo. Em i gat 6-pela bratasusa na ol haus bilong ol i pas tru; no gat liklik spes moa. Tasol Beppo i lukim mama i gat bel na Beppo i wari long nupela bebi bai stap we.

Long wanpela moning Beppo i wok-about i go long skul, na long rot em i lukim wanpela man i salim ol balun. Em i baim wanpela na em i go arere liklik na i sindaun raitim wanpela bebi long famili. Tasol mipela no gat spes long haus na nogat ol bebi klos tu. Inap yu ken salim sampela i kam long mipela? Tenkyu." Na em i sainim pas: Beppo.


Orait, nau Beppo i foldim pas i go liklik tru na i pasim em long wanpela string, na i pasim string long balun, na larim balun i flai i go antap long skai.

Nau Beppo i stat long wet, wet inap ansa bilong pas i kam bek. Bihain long 5-pela de nau ol man bilong pos opis i bringim wanpela katon i kam long haus bilong Beppo. Tasol papa bilong Beppo i no laik kisim katon. Em i tok ol i no bin odaim wanpela samting. Na tu katon i kam long taun Rovero, we ol i no gat sampela wantok o wanfamili. Beppo i strong long ol i mas opim katon, long wanem, em i gat adres bilong ol antap long en. Orait, nau ol i opim katon na ol i painim em i pulap long olkain klos bilong bebi.

Nau papa i longlong tru. Husat i bin salim dispela katon i kam? I no gat adres antap long en na olsem ol i no inap salim em i go bek tu.

Maski papa i no save katon i bin kam olsem wanem, Beppo i save pinis. Em i save: God i bin salim em i kam: God i bin bekim pas bilong em.

TU MINIT TINGTING



FRANK MIHALIC i raitim

Na tru. God i bin mekim olsem tasol. Long dispela moning we Beppo i bin salim pas i go, wanpela lapun i limlimbur long taun Rovero na em i lukim wanpela retpela balun i pas long wanpela liklik tri. Na long string bilong em, i gat wanpela pas.

Orait, lapun ya i ritim pas na em i smail na i ting, "Maski, mi ken kisim ples bilong God na bekim pas bilong Beppo." Olsem na em i bungim olkain bebi klos na pulimapim long katon na salim i go. Lapun ya i no save, God i wok long yusim em yet long ansaim prea bilong Beppo.

Olsem tasol na God i bin ansaim tru prea bilong Beppo - long pasin na laik bilong em yet. Yu lukim: balun i no bin pundaun long wara; em i pundaun klostu long rot we lapun i mas wok-about. Na God i putim gutpela tingting insait long kru bilong lapun. Lapun ya i no ritim pas na troimoim tasol i go. Nogat.

Harim! God i save ansaim olgeta prea. God i save ansaim ol prea long planti kain we. Tasol em i no larim ol prea tru i popaia. Nogat. Em i ansaim ol.



• Ol Rosari Sista bilong Wewak daiosis wanpela lokol kongrigesen Akbisop Leo Arkfeld i kamapim bilong karim lokol sios i go het yet long bihain taim. Planti ol Rosari sista i wok insait long ol peris bilong Wewak daiosis na mekim ol pastorel wok, wok tisa, nes na ol arapela wok we Katolik Sios i save mekim.

Arkfeld i laikim lokol sios i mas sanap long lek

WENCESLAUS MAGUN i raitim

BISOP bilong Wewak daiosis, Raymond Kalisz i tok, papa bilong Wewak daiosis, Akbisop Leo Arkfeld husat i selebretim 50 yia bilong em olsem bisop bilong Wewak daiosis long Julai 26 i gat bikipela laik long lukim ol pipel bilong Papua Niugini yet i mas karim wok bilong sios.

"Em i gat bikipela laik long lokalizesen. Em i statim ol Rosari sista, ol secred hat bruda na bihain St John maina seminari

long Kairiru ailan bilong skulim ol man husat i laik kamap pater. Em i kamapim tu Kaindi tisa koles na Yarapos hai skul bilong ol meri wantaim Xavier hai skul bilong ol man na moa long 80 praimer skul long taim bilong em," Bisop Kalisz i tok.

Em i tok astingting bilong Akbisop Arkfeld long wokim ol dispela skul na kamapim ol lokol kongrigesen bilong ol sista na bruda em bikos em i laikim ol pipel bilong PNG yet i mas i gat save bilong bilip bilong Katolik Sios bai ol yet i ken go het long karim sios i go long yia 2000 na i go moa yet.

Bisop Kalisz i bilip lokol sios long Wewak daiosis nau i redi long lukautim ol yet. Em i tok bihain long faipela yia bilong em olsem bisop bilong Wewak daiosis em bai putim pas bilong kisim malolo. Long dispela taim em i gat bikipela bilip olsem wanpela lokol pater bilong Wewak daiosis yet bai kamap namba wan bisop bilong Wewak daiosis.

Bisop Kalisz i tok wok bilong em nau em bilong strongim ol wok Akbisop Arkfeld i kamapim pinis insait long pastorel program bilong daiosis.

Sinato tenkim ol sios, na ol arapela ejensi

BOGENVIL Trensisinel Gavman (BTG) Primia, Gerard Sinato i givim bikipela tok tenkyu na amamas i go long ol Sios, ol ejensi i save helpim ol pipel na ol statutori ogenaiesen long bikipela wok ol i bin mekim bilong bringim bel isi na kamapim gutpela sindaun long Bogenvil.

Em i tok pasin bilong bringim bel isi i ken kamap sapos olgeta pati i stap insait long dispela toktok i wok bung wantaim, i gat bel isi na sigan pasin na lukluk long painim gutpela politikel rot.

Mista Sinato i tok BTG i wekamim ol sios, ol ejensi i save helpim ol pipel na ol statutori ogenaiesen husat i wok bung wantaim gavman na bihainim tingting bilong ol lida bilong Bogenvil.

Em i givim tu bikipela tok tenkyu i go long gavman bilong Australia insait long AusAid na Yuropian Yunion. Em i tok wantaim helpim bilong AusAid ol i go' het long kamapim gen planti ol helt na edukesen sevis olsem Bisop Wade Hai Skul, Tarlean Nisan Hai Skul na kisim ol saplai bilong ol komuni-

ti skul.

AusAid i redi tu long putim mani bilong stretim ol rot na bringim sampela gutpela developmen long bikiples Bogenvil long dispela yia. AusAid i redi tu long helpim BTG na Bogevil Revelusinari Ami (BRA) na Bogenvil Interim Gavman (BIG) wantaim ol samting bilong bringim bel isi olsem helikopta na ol arapela masin samting.

Mista Sinato i tok Yuropian Yunion i putim tu K1.2 milion bilong stretim ol rot long Buka ailan. Dispela ol wok bai stat long

dispela wik. Long taim ol Sios, ol ejensi i save helpim ol pipel na ol statutori ogenaiesen i go het long mekim dispela, ol provinsel lida i mas wok bung wantaim ol nesanel lida long paitim gut toktok na bringim gutpela sindaun i go long Bogenvil.

Mista Sinato i tok ol lida bilong BTG wantaim ol lida bilong ples i stat pinis long toktok long dispela samting insait long ol kibung bilong BTG insait long wanpela kibung bilong ol rijinel lida blong ples long Hutjena bilong ol Not Bogenvil lida,

Asitavi blong ol Sentrel Bogenvil lida na Buin blong ol Saut Bogenvil lida.

"Mipela bai go het long paitim toktok bilong politikel sindaun bilong Bogenvil long bihain taim insait long Pan Bogenvil lida miting," Mista Sinato i tok.

Em i singautim ol nesanel lida bilong Bogenvil long bung wantaim ol pipel bilong Bogenvil insait long dispela kibung na askim ol long givim sampela taim bilong ol long stap wantaim ol pipel bilong ol long ilektoret blong ol long dispela taim.



• Wok bilong salim buai i save planti mani bikos i gat planti lain bilong kaikai buai.

Buai prais go antap long Goroka

'Tasol ol lain bilong kaikai buai i no inap stop'

LONG Goroka taun na planti eria insait long lsten hailens, bisnis bilong salim buai i wok long i go het strong tru. Na trangu ol lain bilong kaikai buai i kisim taim stret nau, long wanem prais bilong buai i go antap tru long stat bilong mun Julai i go pinis.

Foapela wik i go pinis ol lain husat i save salim buai i bin salim long 10 na 20 toea long wanwan, tasol dispela prais i suruk hariap tru i go antap na long nau yet ol man na meri husat i wok long salim buai i sasim long wan wan em 40 na 50 toea long buai maket na long ol arapela liklik sait maket nabaut.

Wantok i mekim wanpela lukluk na

askim raun (street survey) long Goroka taun na i painim aut olsem bikos sisen bilong buai i kam long pinis bilong en, buai i sot na long dispela as prais tu i go antap tru. Mekim na ol lain husat i save pas gut tru long kaikai buai i stat long lusim bikos ol i no inap long tromoi 40 na 50 toea.

Ol i tok em i wanpela gutpela skul long ol yet i luksave na em i gutpela

sapos ol i ken lusim na maski long tromoi mani nating long ol liklik buai nabaut.

Na tingim, wankain olsem prais i go antap long ol buai, ol kaikai samting long stua tu i wok long sut i go antap yet. Dispela em i bikpela mekim save, olsem na yumi ol man na meri i mas tngting gut na spenim mani long ol gutpela kaikai.

Ol skul pikinini amamasim Nesenel Buk wik



• Raita bilong buk bilong ol pikinini, man Australia, Garry Crew husat i stap long kantri long Nesenel Bukwik. Wantok i kisim piksa bilong em wantaim ol pikinini naol mama husat i bin go long Bukfea long Getwe las Sarere. Garry i bin ritim sampela buks bilong em long ol pikinini.

VERONICA HATUTASI i raitim

OL SKUL insait long kantri i makim Nesenel Bukwik wantaim ol ektiviti insait long ol wan wan skul bilong ol yet.

Planti skul insait long Nesenel Kapitel Distrik i kisim ol sumatin bilong ol long raun long ol pablik laibreri na lukluk long ol kain sevis we em i save givim long pablik.

Ol atoriti long nesenel pablik laibreri long Waigani, NCD taim ol i amamas long sevim pablik na ol skul pikinini husat i save ples na ol buks long karimaut wok bilong ol o long kisim. Ol buk long ritim i wari long planti buk i bagarap na lus.

Het laibrerian, Heru Noua i tok laibreri long Waigani i gat tripela seksen na em long Childrens seksen, Adalt fiksen na non-fiksen na Referens seksen bilong ol rises na non fiksen buk.

Misis Noua i tok bagarap i kamap long olgeta seksen we ol lain i yusim ol buk i brukim ol pej, rait o dro insait long ol pej na

katim ol sampela pej na piksa wantaim resa o sap samting. Na tu planti buk em ol yusa i kisim na ol i no karim i go bek bihain long yusim o ritim.

Em i tok ol buk i bilong olgeta man meri na pikinini long ritim, laikim o kisim ol infomesen long ol na i no gutpela long liklik lain i bagarapim ol.

Em i tok ol man i mas save olsem dispela ol buk i bilong helpim yumi olgeta na ol i mas lukautim ol gut na larim long ol arapela lain i kam bihain long ol i ken yusim tu.

Bos bilong laibreri Florence Griffin i tok laibreri ya i bungim ol gutpela buk na em sori long lukim olsem sampela lain i bagarapim planti ol buk.

Em i tok ol i moabeta long ol papamama i lainim ol pikinini long lukautim ol buk bikos ol pikinini i ken lainim planti samting long ol.

Em i tok planti pikinini i gat laik long ritim ol buk bikos em i save lukim planti i pulapim laibreri long ol wiken na pasin we liklik kain i wokim long brukim, dro na

lusim ol buk i bagarapim gutpela laik bilong planti pikinini long rit.

Em i tok planti lain i save rit na taim ol i painim olsem sampela pej i lus, dispela i save bagarapim rit bikos ol i laik save wanem samting i stap long stori.

Misis Griffin i tokaut long sampela rot we ol papamama i ken mekim long helpim ol pikinini bilong ol long lukautim ol buk em

• Wokim ol liklik laibreri bek we ol pikinini i ken putim ol laibreri buk long en. Putim ol bek we ol liklik brata susa, ol pusi, dok na ol kokros i noken bagarapim ol na

• Lusim bek long laibreri wantaim nogat bagarap long en.

Em i tok em save amamas long lukim planti pikinini i yusim laibreri na em i strongim moa yet long go. Tasol em i laikim ol long lukautim gut ol buk bikos em i hat long kisim ol nupela gen long wanem pe bilong ol buk i go antap tru. Na tu mani i sot long baim ol nupela buk na mekim ol arapela wok bilong laibreri.



COFFEE INDUSTRY CORPORATION INDUSTRY AFFAIRS DIVISION PRAIS LONG WANWAN WIK

*Average prices (t/kg) as at:		10/08/98	Range	03/08/98	Aug-98
ARABICA:					
Green Bean	Y1	418	405 to 440	399	354
(DIS LAE)	Y2	NQ	NQ	NQ	NQ
	X	468	430 to 550	435	396
	A	498	450 to 600	472	424
Parchment	Class 1	272	200 to 300	260	246
(Factory Door)	Class 2	259	180 to 290	250	234
	Class 3	227	150 to 280	238	223
Cherry (Factory Door)		57	52 to 55	52	55
ROBUSTA:					
Green Bean		265	- to 265	260	251
Parchment		183	170 to 190	173	178
Cherry (Indicative)		45		46	38
NEW YORK "C" CLOSING 07/08/98					
Other Mild Arabicas					
US cents/lb		135.2		129.2	109.73
1 Kina=US\$.4193		.392	.443
Toea/kg:-					
Without discount/premium		710.86		726.62	546.12
With discount of 4c/lb		684.57		698.50	523.72
Y-grade (Gross f.o.b. Lae) * (1)		684.57		698.50	523.72
Levy on (1)	(2)	56.00		65.00	70.00
Y-grade (Net f.o.b. Lae) (1-2)		628.57		642.50	453.72
* Indicative					

MAKET TOKTOK

Las wik prais bilong kopi i surik i go antap 4 pesen long Nu Yok taim ol i baim na salim kopi long mak bilong mun Septemba. Prais i go antap bikos i gat nius olsem bai straik i kamap long bikpela bris long Santos, Brasil na sloim wok bilong salim kopi i go long ol ovasis maket. Ol kontrak bilong Desember i go antap long 2 pesen tasol na bungim mak bilong 124.8 sens long wan wan paun.

Hia long PNG, Y-gred FOB prais i pundaun long 2 pesen. Sampela ekspota na procesa i no luk save yet long gutpela prais bilong kopi long intenesenel maket na givim gutpela prais i go long ol groa.

Ol i bungim fiusa prais na eksens ret na kamapim FOB prais. Tasol prais bilong ol wan wan ekspota tu i no wankain.

PRAIS LONG OL FAKTORI DOA (t/kg) Wik i girap 03/08/98				
AREA CLASS	ARABICA			ROBUSTA
	1	2	3	
NATIONAL	210 to 265	180 to 260	200 to 240	170 to 190
KAINANTU	- to 260	- to 260	NQ	50 to 62
GOROKA	250 to 280	240 to 270	220 -to 230	NQ
KUNDIAWA	NQ	NQ	NQ	52 to 55
MINJ/BANZ	260 to 290	250 to 280	250 to 260	NQ
MT. HAGEN	-to 230	-to 230	-to 230	-to 50
WAPENAMANDA	NQ	NQ	NQ	NQ
LAE	-to 250	220 to 230	-to 210	NQ
ASEKI	-to 250	-to 220	NQ	NQ
MUMENG	NQ	NQ	NQ	NQ
WAW/BULOLO	NQ	NQ	NQ	NQ
WASU	NQ	NQ	NQ	NQ
MADANG	-to 210	NQ	NQ	- to 260
EAST SEPIK				170 to 190
Robusta cherry - Indicative				46

Notes:

1. Dispela stail CIC Ltd. Industri Afes Divisan i wokim long soim ol Prais long wanwan wik.
2. Ekseins Reit: Long prais bilong US\$ wantaim kina PNGBC let kolim pei long kina wantaim US\$ long Mande long wanwan wik.
3. 1kg = 2.20462 lb
4. Prais bilong kofi long dispela wik ikam long prais bilong ol espota na procesa long Mande wantaim prais bilong ol future prais long las Fraide.
5. Long kisim save moa long dispela telefonim CIC Industry Affairs Division long telefon numba 732 1266.

WANSOLWARA NIUS

Fiji:

30 kilogram posin kemikol tromoi long Fiji . . . na kempein long rausim bai i kamap insait long tupela mun

Wanpela wok painimaut we environmen grup long Pasifi, Saut pasifik Rijnol Environmen Program (SPREP) i karimaut i pain olsem planti posin kemikol i stap yet long 13-pela ailan kantri insait long Pasifik.

Fiji Taims niuspepa i ripotim olsem ol lain i karimaut dispela wok i bin painim planti bilong ol posin kemikol i stap yet long kantri Fiji.

Ol bin painim ol long eitpela hap insait long ol ros dram, ol bru bruk bokis, na ol kontena i bruk na ol kemikol i kapsait insait long ol ples we ol pikinini inap go long ol.

Ripot i tok long wanpela hap, ol bin painim 4,000 kilogram kemikol. Ol SPREP opisa bai i autim ripot na ol ol i laikim klin ap kempein insait long tupela mun samting.

**Nu Silan:
RNZI katim
ol Pasifik
progrem**

Redio Nu Silan Intenesenel (RNZI) i bin katim sampela progrem bilong em i go long ol saut pasifik kantri las wik bihainim hevi long mani bilong ranim sevis.

Ol ripot i tok stat long las wik, stesen i bin stapim ol apinun na nait nius brotkas long ol redio lisina insait long Pasifik rijon.

Dispela i bihainim disisen we gavman bilong Nu Silan i mekim long katim mani em i givim long ranim RNZI redio stesen long dispela yia.

Stesen bai i sotim trensmisen taim long ol progrem we em i save mekim long ol tokples bilong ol Pasifik kantri na tu ol nius buletin long olgeta nait.

pasin we Nu Silan gavman i mekim long katim mani em i save gviim RNZI long operet i bihainim wanpela rivyu we Dipatmen bilong Foren Afeas na Tresari i bin karimaut na prisanim i go long gavman. Wanpela long ol rot em pasin stesen olgeta.

Vanuatu:

Vanuatu bisnisman givim bikipela hap mani long helpim Aitape birua

Plantu helpim i kapsait yet long kantri na ovasis, bilong helpim ol pipel bilong Aitape we birua bilong bikipela solwara i bin bagarapim ol tripela wik i go pinis.

Long dispela wik, wanpela bisnis man bilong Vanuatu, Din Van Than

i bin givim US\$3,000 (long mani bilong Amerika) long helpim ol Aitape birua lain.

Em bin givim donesen bilong em long han bilong PNG honoreri konsal long Vanuatu Eileen Nganga. Ol ripot i tok dispela em bikipela hap kes mani we wanpela man em yet i givim long helpim ol Aitape birua lain.

Mista Dinh em i ejen bilong Vanuatu long PNG Halla Simen kampani. Kampani bilong em i gat nem olsem top kampani long baim simen long PNG.

Long wankain taim tu, ol meri long Laganvil taun bai holim ol fan resing long kamapim mani bilong helpim ol Aitape birua lain.

Nuku'alofa, Tonga:

**Wari long ol
Pasifik dokta
kisim wok
ausait long kantri**

Ol helt opisel insait long Pasifik i autim wari olsem bikipela mak bilong ol asples dokta i wok long lusim ol kantri bilong ol long wok ausait.

Ol helt dairekta bilong olgeta hap long Pasifik rijon i bin autim wari long dispela samting taim ol i bung long Tonga.

Ol i tok sot long ol dokta i wok long kamapim hevi insait long helt sevis long wan wan kantri.

Saut Pasifik Komyuniti i bin sponsorim dispela bung. Bung i bin harim tu olsem taim ol dokta i pinisim ol speselis trening kos, ol i save lusim ol asples bilong ol na go painim wok we ol i givim moa pe long ol arapela kantri.

Plantu pipel dai taim ol paitman i bomim embasi bilong Amerika

Nairobi, Afrika:

Samting olsem 148 pipel i bin dai long Kenya na Tanzania bihain ol teroris (paitman) i tromoi bom long embasi bilong Yunaited Stets insait long tupela kantri ya. Moa long 2,200 pipel moa i kisim bagarap.

Birua i bin kamap long las wiken, Sarere long Nairobi, biktaun bilong Kenya na Dae es Salaam, biktaun bilong Tanzania. Birua i bin kamap pastaim long Nairobi long 10.40 moning na kwiktam wankain birua i kamap long Dar es Salaam.

Ripot i tok wanpela trabel lain bilong Saudi Arabia we Man ol i kolim Osama bin Laden i go pas long en i bin karimaut dispela birua.

Insait long wanpela intevyu

long mun Me, em bin tok ol Islamik teroris bai salim bodi bilong ol Amerika lain i go bek long ples insait long ol kofin. Em bin tok em no kea sapos ol lain i wok long ami ol i manmeri nating, ol bai kilim ol tasol.

Israel i bin salim ol reskyu woka na ol dog bilong helpim long wok bilong painim ol daibodi na ol lain i stap laip bihainim birua.

Ol ripot i tok reskyu grup bilong Israel i drilim hol long US embasi bilding long Nairobi na pulimaut wanpela man husat i bin pas insait. Ol i painim sampela hap hap bodi bilong ol daiman.

Ripot i tok wanpela bom i bin pairap long wanpela ka we ol bin sanapimlong ples bilong putim ol ka long en baksait long US embasi long Nairobi. Telivisen piksa i stap long dispela eria i bin

kisim piksa bilong birua, tasol ol ripot i no klia yet sapos telivisen kemra ya i bagarap tu insait long birua.

Amerika i belhat long dispela birua na long Kenya na Tanzania, bikipela sori i stap, moa yet long ol pipel husat i lusim ol hauslain na famili bilong ol.

Ol ripot i tok 11-pela lain bilong Amerika i bin dai na 12-pela we 10-pela long ol i wok long embasi opis na narapela tupela em ol priavet sitisen i bin dai long birua. Ol bin kisim dispela lain i kisim bagarap i go long Ramstein Amerikan ea beis long Jemeni. Ol arapela pipel i dai i bilong Kenya na Tanzania.

Ol kantri long, olgeta hap bilong wol i salim tok sori long dispela birua we i bagarapim planti pipel.

Lewinsky tok prenpasin wantaim Presiden i tru

Washington, Amerika:

Monica Lewinsky, yangpela wokmeri long Wait Haus, opis bilong presiden bilong Amerika we tok i sut olsem Presiden Bill Clinton i bin prenim i bin sanap long ai bilong bikipela kot, Gren Juri long las wik Fraide.

Em bin tok em i tru em long tupela Presiden Clinton na em i wokim prenpasin insait long 18 pela mun. Na tupela i bin slip wantaim tu moa long 12-pela taim long taim ol i pren.

Ol niuspepa, telivisen na redio long Amerika i bin karim top stori long dispela samting long wiken tasol presiden Clinton i no bisi. Em bin givim strongpela toktok egensim pasin we sampela lain i wokim long bomim ol embasi bilong Amerika long Kenya na Tanzania na ol arapela samting moa.

Long kot long mun Janueri bilong dispela yia, Mis Lewinsky i bin tok em i no slip wantaim Mista Clinton tasol nau em i tokaut olsem tru em wantaim bikman i bin wokim prenpasin na slip wantaim long planti taim.

Washington Pos niuspepa i bin ripotim olsem Mis Lewinsky i tokim kot olsem Mista Clinton i no tokim em long giaman long prenpasin bilong ol tasol ol yet i wokim ol stori long haitim trupela samting we i bin kamap namel long ol.

Inap i kam long dispela taim, Presiden Clinton i strong yet olsem nogat samting i bin kamap namel long em na Mis Lewinsky.

Long Ogas 17 Mista Clinton bai i kamp long ai bilong Gren Juri long autim ol toktok bilong em long dispela samting. Indipenden kaunsila loya Kenneth Starr bai i karimaut intevyu wantaim presiden long Wait Haus na ol bai wokim piksa long en.

Ripot i tok Mis Lewinsky na famili bilong em i amamas olsem dispela samting we i givim planti hevi long ol i klostu pinis.



• Presiden Bill Clinton.




Em i taim bilong Peking Opera festival . . . Em i taim bilong Peking

Opera festival na dispela liklik manki Taipei long Taiwan i lukluk long wanpela mask taim em i raun long Foik Kastom festival. Biuro bilong Edukesen aninit long Taipei Siti gavman i bin ronim festival long dispela yia bilong promotim ol pasin kastam bilong ol pipel.

Piksa i kam long Free China Journal.



• Monica Lewinsky.



Kennedy Wenge i joinim Gavman

MEMBA bilong Nawae Kennedy Wenge i lusim Oposisen na go joinim Gavman sait long dispela wik. Mista Wenge i stap wantaim pati bilong Pipels Demokretik Muvmen (PDM) long sait bilong Gavman.

Kennedy Wenge em bikpela brata brata bilong Morobe Gavana Luther Wenge.

Mista Wenge i tokaut long disisen bilong em olsem planti lain bilong em long Morobe provins istap long Gavman sait. Olsem na em i pilim i gutpela long em tu i mas stap wantaim Gavman sait long wok bung wantaim ol Morobe lida long hap sait. Dispela em long kisim gutpela sapat na wok bung wantaim bilong ol Morobe lida long ol hevi na wok insait long ilektoret bilong em long Nawae.

Mista Wenge i tok tu olsem em i joinim PDM pati bikos em i laikim polisi bilong PDM. Em i tok polisi bilong PDM i gutpela na inap

kamapim gutpela senis long ilektoret bilong em.

Kennedy Wenge nau i apim namba bilong ol Morobe lida long Gavman sait i go antap long 6. Ol dispela memba em, Tukape Masani memba bilong Huon Galp, Thomas Pelika memba bilong Menyamya, Mao Zeming memba bilong Siassi, Ginson Saonu memba bilong Kabwum, Luther Wenge Gavana bilong Morobe provins na nau Kennedy Wenge memba bilong Nawae ilektoret.

Tripela Morobe lida i stap long Oposisen sait em Samson Napo memba bilong Bulolo, Andrew Baing memba bilong Makam na Bart Philemon memba bilong Lae Open.

Mista Wenge i tok em i bin toktok pinis wantaim ol lain long ilektoret bilong em na kisim tingting bilong ol pastaim long em i mekim dispela disisen long go joinim Gavman sait.

Turis bod kisim ples long Morobe turis bisnis

MOROBE Turism Bureu i tokaut long ol bod memba bilong em long dispela wik.

Ol memba em Vanesa Pelgen wanpela meri husat i go pas long balus bisnis long Lae na siaman Bill Guille jenerel menesa bilong Lae Intanesenel hotel.

Arapela bod memba em Brian Pearce bilong Niugini Diving, William Lau, program edvaisa komes na turism long Morobe edministresen, Muttu Gware bilong provinsel kalsarel kaunsel, Allan McLay bilong Lae Samba ov Komes na Industri na Ongai Habilong i makim Fisika Dvelopmen Atoriti.

Dispela em 5 yia plen bilong Morobe Provinsel Gavman long kamapim na kirapim wok na bisnis bilong turis insait long Morobe provins.

Dispela bureu i stap aninit long lo bilong provinsel asembli na bai i wok klostu wantaim Morobe Tourist Association na Tourism

Promotion Authority long kirapim provins long sait bilong wok turis.

Provinsel program edvaisa, William Lau i tok amamas long ol bod memba tasol em i tok lukaut long ol bikpela salens na hevi i stap het long dispela wok.

Tasol em i tok em i gat bilip long TPA na Vais Minista bilong Turism, Kalsa na Tred Ginson Saonu, bai dispela wok i go long-we moa.

Memba bilong Lae Bart Philemon i tok amamas long ol lain ya na askim ol long wok strong long dispela turism indastri long mekim em i kamap gut.

Long dispela taim nau bai i gat nupela turis sip bai ron long dispela wik long ol nambis bilong Morobe provins.

Papa bilong dispela sip *MV Heduru*, Ross Bishop i tok em i statim dispela kampani long bihainim plen bilong turis long Paradais Laiv kempen bilong gavman insait long Papua Niugini.

Dispela sip em pastaim Gavman i save yusim long karim ol helt saplai na helt sevis i go long Milen Be na planti arapela komyuniti long ol provins.

Papa bilong dispela sip i baim dispela sip long 1997 na i lusim bikpela taim na mani long stretim em long nupela wok bilong em long karim ol ovasis turis raun lukluk long ol ples insait long Papua Niugini.

MV Heduru i ken karim 12-pela pasindia na 9-pela wokman bilong sip na i ken ron long solwara inap 14 de.

Mista Ross i tok bot bilong em i ken karim arapela samting olsem ol pas na niuspepa. Tasol laisens bilong em i makim stret long wok bilong turis na i no bilong karim kago.

MV Heduru long dispela wik i bin ron long Madang na go long Wasu, Sio, Finsafen, Tami Ailan na kamap long Voko Poin nambis long Sande.

Lae Nius - Komyuniti toksave

Miss Morobe Red Cross danis

Dispela toksave i go long olgeta manmeri istap long Lae siti olsem, Miss Morobe Red Cross Susan Gari bai holim wanpela fan raising nait pati long Ren Dou Woo klab antap long haus Tisa long Ogas 13, Fonde. Geit Fi em K25.00 long wanwan manmeri.

Sapos yu laik kamap long dispela pati yu ken ringim Miss PNG Lisa Linibi long telefon namba 472 2644 o Carol Yawing long 473 5098 o Janet Tabo. Sapos yu no kisim tiket yu ken baim long geit.

Miss Morobe Red Cross danis

Narapela fan raising danis bilong Miss Morobe Red Cross tu bai kamap long klab 96 long Sarere Ogas 15, 98. geit fi em K10.00 long olgeta manmeri. Sapos yu laik go tromoi lek liklik orait kolim ol dispela meri Lisa Linibi long telefon 472 2644, Carol Yawing 473 5098 na Janet Tabo long Morobe tours. Tiket tu bai ol i salim long gate.

Toksave i go long olgeta pablik long Lae na Morobe Provins olsem Wantok niuspepa i gat spesel ripot bilong Lae na Morobe Provins long olgeta wik. Sapos yu gat ol toksave yu laikim mipela putim long pepal: yu ken salim i kam long **Edita WANTOK - Lae Nius**, PO Box 1982, Boroko NCD. Telefon 325 2500 o salim fax long 325 2579.

Toksave bilong Edita



Sia bilong king!

• Ol pipel bilong Keweng long Kabwum distrik i amamas long lukim Praim Minista Bill Skate long ples bilong ol olsem na ol karim em long bet.

Poto: GINSON SAONU.

Pasin pamuk bikpela long Lae siti

LAE siti i wok long go bagarap wantaim pasin pamuk. Dispela toktok i bin kamap long Gavana bilong Morobe Luther Wenge.

Gavana Wenge i tok olsem long las tripela mun igo pinis, namba bilong ol meri husat save wokim dispela pasin pamuk igo antap stret. Em i tok "traim draiv long nait na bai yu lukim ol long olgeta hap strit bilong siti"

Wenge i tok em i bilip olsem igat samting olsem 200 meri olgeta i wok long go raun mekim ol dispela pasin. Wanpela ples we dispela pasin save kamap olgeta taim de na

nait em olpela ples balus. Dispela ples em i go pas long gro bilong pasin pamuk, spak na tok nogut nabaut long ol manmeri.

Gavana Wenge i askim pinis wanpela strongpela grup long Morobe ol i kolim Maus Morobe long kamap wantaim sampela pablik miting o forum long tokaut long dispela kain hevi nau kamap long siti. "Haus

Tutumang (provinsal asembli) yet ino inap long stretim dispela pasin. dispela kain pasin we kamap long komyuniti em ol yet mas gat sans

long toktok na stretim" Wenge i tok.

Em i tok em i laik pablik bung mas kamap long wanpela taim long tupela mun long narapela, narapela hap bilong siti. Em i tok, hevi bilong graun tu wantaim ol arapela Papua Niugini na husat lain kam stap em wanpela bikpela hevi Provinsal Gavman i wari long en.

Igat bikpela hevi stap namel long pipel bilong Morobe olsem ol stat givim graun i go long ol man husat ino bilong Morobe we i mekim hat long ol as papagraun long traimekim bisnis bilong ol. Ol

graun bilong tumbuna tu em ol i givim igo long autsait lain na ino tingim long bihain bilong ol, em i tok.

Maus Morobe Asosiesen lidas i askim ol pipel bilong Ahi long was gut na salim graun bilong ol. Asosiesen i bilip olsem dispela ol pasin i wok long kamap long dispela hap ples. Wenge i tok, "rausim ol man long graun bilong gavman em bai nogat rong, tasol long graun bilong Tumbuna em bai narapela samting olgeta. Em i tok mi askim ol pipel long skelim gut na tingting na salim graun bilong ol we bai hat long stretim bihain"

Las rispek long indai manmeri

BUSTIN ANZU i raitim

PLANTI hap bilong Papua Niugini na long wol, pasin bilong rispek long ol i dai man na meri i save stap. Dispela em long tok tenk yu na tingim i go bek long ol gut taim bilong en taim em i stap laip olsem yumi yet. Dispela kain rispek em yumi i no inap lus tingting long planti taim.

Long sampela manmeri, dispela pasin bilong rispek i save kisim wanpela o tupela wik. Tasol sampela manmeri, ol i save soim stret pasim bilong kastom na save kisim wanpela mun o tupela mun.

I gat kain kain stail bilong soim dispela las rispek o tok sori i stap. Insait long Papua Niugini tu yumi save i gat planti stail. I gat kain kain stail is tap tasol yumi ken lukim long ol tupela hap; long ples kana-ka bilong Hailens na long ol taun na siti.

Long ol ples, taim wanpela manmeri o pikinini i dai, ol lain bai kam bung na sindaun long haus kra i na soim las rispek bilong ol. Ol bai tingim ol gut taim bilong em em i bin stap, raun, kaikai, silip, pilai, tok pani na mekim ol gutpela samting. Long dispela taim tu ol bai stori long em wanem kain manmeri o pikinini.

Ol lain i stap klostu em ol pes lain long kam tok sori na kra i. Bihain toksave i save i go aut long ol narapela ples. Ol i save kam bihain. Toksave tu i save i go long we tru bihainim ol lain bilong dispela i dai lain, maski em i stap long skul o wok long taun na siti.

Longpela na sotplea taim bilong stap long soim rispek o toksori is ave dipen long man, meri o pikinini i dai. Sapos em wanpela man i gat nem long ples, maritim planti meri, i gat planti bisinis na haus-pik, lida long ples na i gat nem long ples long sait bilong mekim moka, em taim bilong tok sori na soim rispek i save longpela stret. Mak bilong 3-4 pela wik.

Pes taim bai ol i putim em long ples klia o ples singsing na kra i.

Bihain bai ol i planim em na sindaun sori long haus bilong i dai lain. Ol lain long longwe bai ol i lusim ples. Na ol liklik lain tasol bai i stap wantaim lain bilong man i dai.

Bihain long dispela ol lain bai traim long rausim ol lain husait i kam soim sori na stap wantaim ol. Dispela em long wei bilong wokim liklik kaikai. Bihain long dispela i dai em bai ol bai bruk nabaut na lus tingting long dispela i dai lain.

Sapos meri o pikinini bilong wanpela bikman sem pasin bilong soim rispek i save kamap.

Tasol sapos em wanpela manmeri o pikinini i nogat dispela kain biknem, em bai taim bilong soim rispek i no inap longpela liklik em bai wanpela wik samting.

Sapos em wanpela lapun man o meri i dai, sampela taim ol i no save sindaun long haus kra i na soim rispek. Long wanem ol i save olsem em taim we em bai ol i dai klostu. Ol bai planim pinis na bihain salim toksave long ol lain autsait.

Sapos em wanpela lapun i gat biknem, em bai pasin bilong soim rispek i wankain olsem ol bikman meri olsem pastaim mi stori long en.

Long Hailens i gat kain kain stail bilong soim rispek tasol dispela em wanpela rot o pasin.

Narapela hap em longol lain i stap long ol biktaun na siti. Yu save em ples bilong mani na stail bilong wokim haus kra i na tok sori i narapela kain olgeta.

Taim wanpela man o meri dai, ol i bai sanapim haus sel. na ol lain bai stap isnait long dispela haus sel na pulim ol narapela lan i kam. Dispela tu long sait bilong soim rispek is ave kisim sampela taim liklik.

Ol lain husait i save long dispela lain i dai, bai baim kaikai i kam na lusim i stap long haus sel. Ol lain husait, i kam longwe hap na i lain husait i hangre mas kaikai.

Long dispela taim tu ol manmeri tu i save bungim mani na givim i go long lain bilong dispela i dai lain



• Ol plisman long Lae Siti i laik givim bodi bilong wanpela wanwok husait i dai i go long ollain bilong em long ples Kol, Jimi WHP.

long baim rot bilong en i go bek long ples bilong en.

Bihain long dispela ol lain bilong i dai, lain, is ave go bek na wokim liklik kaikai olsem ol lain long ples na bihain rausim dispela haus sel i kam daun. Ol lain tu i save lus tingting long i dai lan na tingting long naapela samting.

Dispela kain pasin bilong soim rispek i save kamap wanpela taim tasol. I no olsem taim nating

yumi save wokim pati o babakru na kamap long olgeta taim.

Dispela em long taim bilong i dai olsem na ol i save gut tru long soim rispek na tok sori na stap long haus kra i.

Maski o waitman i kam wantaim kain kain save long sait bilong wok mani. Bisinis na pilai, tasol pasin olsem dispela, long soim rispek i mas stap long olgeta taim.

Ol bikhet man kilim man lalibu long 4 Mail blok

Wanpela man lalibu long hap bilong Sauten hailans provins i bin dai long Lae long Sande. Dispela man lalibu i bin kisim bagarap long naip bihain long wanpela bikpela pait i bin kamap long 4 Mail blok insait long wanpela klap long Sarere nait.

Bos bilong plis long Lae, Metropolitan Suprintenden Tony Wagambie i tok tripela man i bin go dring long dispela 4 Mail klap na bihain ol i bin kros nabaut i go na kamapim pait. Insait long dispela pait, ol i sutim dispela man lalibu long naip.

Mista Wagambie i tok plis i bin hariap long sekim dispela birua na holim wanpela bilong dispela tripela man. Narapela tupela i ronawe yet tasol plis i luksave pinis tupela man ya.

Mista Wagambie i tok bai dispela man i bungim birua i bin go long Angau haus sik na long Sande em i dai.

• Ol PMV bas long Lae i kamapim wanpela straik long Mande dispela wik bikos ol i no amamas long pasin ol plisman i save mekim long ol.

Mista Wagambie i tok ol bas draiva na papa bilong bas i kros bikos ol i tok ol plisman i save ol bikpela tumas long ol liklik trabel bilong ol.

Tasol Mista Wagambie i tok ol PMV bas em olsem 100 tasol na ol pablik manmeri husat i save yusim bas sevis em moa long 1000. Na ol i save komplem olsem ol i save baim bas tripela o foapela taim long wanpela de. Bas i save lusim ol long hap rot na go na ol i save kalap gen long narapela bas i go long wok. Sampela taim ol bas i no save pinisim ron bilong ol i go long hap mak bilong ol i go long en.

Dispela i mekim na ol manmeri long Lae i no amamas na kamapim dispela komplem bikos ol i wok long kisim bikpela hevi long pasin bilong ol PMV bas insait long Lae siti.

Mista Wagambie i tok ol bas i go bek long wok bilong ol tasol long Fonde tude bai i gat wanpela bung bilong ol wantaim ol lain i lukautim wok bilong Trensport, wanpela wok-ing komiti bilong ol PMV bas na tu ol bai bung wantaim Morobe Gavana Luther Wenge. Dispela bung em long toktok na stretim gut dispela hevi bilong ol PMV bas na tu stretim hevi bilong ol pablik manmeri long Lae siti.

Distrik wokmeri tisa bilong Morobe na Madang i bung

PAULUS TALI i raitim

DISTRIK wokmeri Tisa bilong ELC/PNG long 6-pela skul olsem Baitabag, Kaipati, Kentag, Satelbeg, Finsapen, Katam, na Tarabo bin kamap long Baitabag Wokmeri skul pinisim tupela wik kos long Madang.

1997 ol tisa bin kamap long Lae holim kos na toktok moa long kurikulum o program long skulim ol meri long skul, lainim ol long kristen laip i pisikol pasin, tu spiritsol pasin.

Ol tisa olgeta kamap 16pela olgeta. Kodineta bilong dispela woksop Mis Hofogao Kaia i tok ol kamap bilong stretim kurikulum we ol tisa inap mekim gut program bilong ol long skulim ol manmeri.

Narapela D.W.M.T woksop bai ol holim gen long Kaiapit Girl's Skul long Yabim Distrik long neks yia. Insevis bai kamap long Banz long Westen Hailans.

Wokmeri skul ol save lainim ol yangpela meri long wok mama, long spiritsol, pisikol tu. Long ol dispela skul ol sanap long strong bilong ol yet tasol nem em aninit long ELC/PNG.

Kodineta bilong woksop Ms. Kaia tok, "Mipela hamamas long nesanel sios long luksave long ol Distrik skuls bilong ol meri."

Tu em i tok neks yia, 1999 bai mi singaut go long 15 distrik presiden long mas lukluk long bihainim kalenda bilong Sios long salim moni long helpim ron bilong skul long wanwan distrik. Kodineta tok tu bai gat akaun bilong em stret.

Narapela samting tu kodineta bilong woksop i tok nesanel sios mas opim ai na lukluk long ron bilong skul na sapatim long hevi na sot bilong em.

Baitabag Wokmeri skul na Katam em tupela olpela skul i stap olsem 32 yia nau. Long dispela ol bod na komiti bilong wokmeri tingting long makim Baitabag olsem Nesanel Wokmeri Skul.

Ol tisa bilong wokmeri pasim woksop long 9-7 98.

Tisa misinari bilong Amron Evangelis Skul Klaus Walls pasim bung wantaim Holi Komunio. Nesanel opis long Ampo Kodineta Miss Gabby Gedisa i no bin kamap long dispela namba tu woksop tasol em salim bikpela tok hamamas long wanem samting ol kamapim long woksop.



• Ol ELC-PNG wokmeri Tisa long Morobe na Madang provins i kamap long tupela wik woksop long Madang.

Helt Minista sevim Angau haus

ANGAU Memorial haus sik long Lae i kisim yesa bilong Helt Minista Ludger Mond olsem Gavman bai stretim hevi bilong em.

Klostu Angau haus sik i pasim wok long las wik bikos haus sik i nogat mani bilong karimaut wok bilong em. Na tu em i gat hevi long baim wara we mita bilong wara i soim olsem haus sik i mas baim K193,800 i go kwiktam long Waterboard.

Bos bilong Waterboard long Lae Thomas Chee i salim pas i go long bos bilong Angau haus sik Sief Eksekutiv Opisa Margreth Samei olsem haus sik i mas baim dispela K193,800 kwiktam tasol.

Tasol Misis Samei i tok bikos Gavman i bin katim daun baset bilong haus sik long dispela yia, haus sik i sot olgeta long mani nau. Olsem na ol inogat rot na ol i ken pasim haus sik tasol, em i tok.

Gavana bilong Morobe Luther Wenge i askim Nesenel Gavman long hariap painim mani bilong stretim hevi bilong Angau haus sik.

Mista Wenge i tok Angau haus sik i no save lukautim ol pipel bilong Morobe provins tasol. Haus sik i save kisim ol sikmanmeri i kam long arapela provins we haus sik bilong ol i save salim ol i kam. Ol i save olsem long Hailans, Momase rijen yet na tu long Niugini Ailan rijen.

Mista Wenge i tok Morobe provins yet i bin stap insait long planti wok we em i skelim mani i go long ol na em i no inap helpim tumas inap em i kisim sampela mani bihain. Tasol em i askim Nesenel Gavman long go pas long dispela hevi we Helt Minista Ludger Mond i mas mekim kwiktam, Gavana Wenge i tok.

Minista Ludger Mond i tokaut las wik olsem bai Helt Dipatmen i stretim dispela hevi bilong Angau haus sik.

Dispela i mekim siaman bilong Angau Hospital Bod Mark Humpries i amamas long lukim haus sik bai i wok yet long sevim ol sikmanmeri bilong Lae, Morobe provins na tu ol arapela provins.

Praim Minista sori long Kabwum pipel

MEMBA bilong Kabwum Ginson Saonu i bin kisim Praim Minista Bill Skate i go raun long Kabwum distrik las wik. Na Praim Minista i givim K20,000 sek mani i go long helpim Kiyawio Komyuniti skul long Keweng. Mista Skate em namba tri Praim Minista long go raun insait long Kabwum distrik.

Dispela raun bilong Praim Minista i bin pulim tu planti arapela lida na ol bikman bilong Gavman long go wantaim em long dispela bus ples long boda bilong Morobe na Madang provins.

Long witnesim opisel opening bilong tripela komyuniti projek long Yus Lokol Gavman Kaunsel eria, Praim Minista Bill Skate i go wantaim Kabwum memba Ginson Saonu nau Vais Minista bilong Tourism, Tred na Industri. Poromanim tu em Morobe Gavana Luther Wenge Minista bilong Agrikalsa na Laivstok Tukape Masani, memba bilong Nawae Kennedy Wenge, Seketeri bilong Agrikalsa na Laivstok Utula Samana na Yabim distrik Bisop Robert Gisungtau. Em i makim het bisop bilong ELC-PNG Dokta Wesley Kigasung.

Praim Minista Bill Skate i bin harim toktok bilong ol pipel long hap na givim ol dispela mani antap long nupela dabol klasrum we ol i kolim nem bilong em Skate Bilding bikos Mista Skate em namba wan Praim Minista long go dispela hap eria na em yet i opim. Em i bin opim tu wanpela wara projek na tu wanpela haus bilong haus sik woka (edpos odali).

"Mi ken pilim laip na sindaun bilong yupela bikos planti taim mi save stap tasol long Mosbi siti na arapela bikpela taun tasol yupela i stap laip long dispela hatpela ples. Wanem hatpela samting yupela i bungim em mi ken lukim tru, na mi redi long helpim long wanem kain rot mi ken."

"Sapos em i rot, mi no inap tokaut amas tru bai



• Praim Minista Bill Skate i toktok long ol manmeri bilong Keweng long Kabwum distrik las wik.

mi givim long helpim tasol bai mi putim sampela mani long baset bilong neks yia. Bai mi givim yupela rot, na long tupela wik bihain bai mi salim ol enjinia na Minista bilong Woks i kam long Distrik bilong yupela long glasim na skelim ol rot bilong mekim dispela naispela ples i gat rot i go bungim ol arapela ples, taun na provins, Praim Minista i promis.

Ol pipel bilong Keweng i bekim amamas bilong ol i go long Praim Minista wantaim tripela pik olsem sain bilong tok tenkyu.

Memba bilong Kabwum Ginson Saonu i mekim bikpela tok amamas i go long Praim Minista long harim tok na mekim em yet i redi long go raun lukluk long Kabwum distrik na long ples Keweng.

Mista Saonu i tokim Mista Skate olsem dispela raun i go long Keweng em gupela tingting long givim malo- lo long bodi bihain long bikpela wari na hatwok Praim Minista i bin mekim long go lukim ol bagarap bilong Aitape pipel long Sandaun

provins. Na tu dispela raun i ken mekim tingting bilong em i stap isi na redi long arapela wok na raun bilong em.

"Kamap bilong yu long Keweng i olsem raun bilong yu insait long Kabwum distrik na dispela raun i ken go insait long tingting bilong ol pipel olsem dispela em bikpela sans ol i ken lukim senis long ples bilong ol."

Long dispela taim tu, Minista bilong Agrikalsa na Laivstok Tukape Masani i tokaut long nupela senis bilong Kabwum distrik long sait bilong wok didiman na bisnis.

"Raun bilong mi long dispela eria i opim tru ai bilong mi na mi laik putim stret long rekot olsem Minista i go pas long Agrikalsa, Kabwum bai kisim olgeta helpim em i laikim."

Mista Masani i tok Nesenel Gavman plen bilong surukim agrikalsa ekstensen sevis insait long kantri na em bai kamap tu long Kabwum.

Em i tok moa wok bai i sut long stretim na kirapim gut ogenik kopi prodaksen na arapela

bikpela kaikai bilong gaden olsem karot, brokoli, koliflawa, pasion frut na orems.

"Plen bilong Gavman em long stapim pasin bilong baim ol kaikai i kam long narapela kantri we mipela yet i ken kamapim long kantri bilong mipela. Olsem na Kabwum em wanpela eria dispela wok i mas kamap long en," Minista Masani i tok.


Long sait bilong wokim rot i go long dispela distrik, Morobe provinsel gavman i putim pinis K500,000 i go long wokim dispela projek.

Plen i stap pinis long opim Lae Kabwum rot, wantaim K300,000 we i stap pinis long karimaut fisibiliti stadi bilong wokim rot na Wantoat - Teptep rot projek i kisim K100,000. Ol pipel i givim sevei plen na disain rot bilong Wantoat - Teptep rot i go long Praim Minista.



Mista Skate na Bisop Robert Gisungtau i sindaun antap long sia na ol Keweng pipel i karim tupela i go long makim amamas bilong ol long Gavman na sios lida long kamap lukim ples bilong ol.

NIU PRAISES


NOKEN BAIM MOA



20^t tasol



Em 10^t Yet



NAU
2 PELA
NIUPELA
FLEVA

SAPOS OL I ASKIM MOA.... GO LONG NARAPELA STOA



**PNG
HIT
PARADE**

**1
9
9
8**

SPONSOR: TRADEWINDS

W/B	LW	T/W	SONG	ARTIST
1	1	1 (8)	Goipex 105	Wass Kadoi
2	2	2	Halfie	Lista
3	3	3	Kusai	Azzimbah
4	4	4	Maupaisa	Azzimbah
5	5	5 (5)	Tingting Bilong Mi	Wass Kadoi
13	8	6	Tabele	Patti Doi
6	6	7	Vada Bolaumu	Azzimbah
7	7	8	Tingim Mama	Bagita Souls
20	13	9	Lebu Lebu Keken	Willie Tropu
9	9	10	Mama Bilong Mi	Patti Doi
17	14	11	Rabaul	Patti Doi
18	15	12	Beautiful Madang	M/ Malbak
10	10	13	Soldier Boy	Noel Asi
8	11	14	Oh My Dear	Patti Doi
11	12	15	Goi Medley	K-Dumen
0	20	16	Fugu Fugu	Azzimbah
0	0	17	Takere Medley	Original Siros
0	0	18	Coco	Daniel Rae
16	19	19	Pacific Islands	Patti Doi
12	16	20	Dedicate My Love	Apprentice

IN: Takere Medley Original Siros
Coco Daniel Rae

OUT: Kuti Mangi Robert Oeka
Taurama Beach K-Dumen

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Ol PMV bas sevis long Lae bai pusim hevi bilong ol

OL PMV bas long Lae i bin holim wanpela bikpela straik long Mande dispela wik. As bilong dispela straik em ol papa bilong PMV bas i no amamas long ol plisman long Lae i save holim ol long sampela hevi we ol inap long stretim isi bihain.

Ol papa bilong ol PMV bas i tok ol i no amamas long ol plisman i wok long holim ol planti taim tumas na sasim ol planti taim we ol i wok long tromoi planti mani tumas long baim sas we ol plis i bin harim na luk-save pinis long en.

Arapela i tok ol plis i giaman na pusim lo i go strong tumas long wok bilong ol na i bagarapim gutpela wok bilong ol PMV bas long givim gutpela sevis long ol wokmanmeri na skul pikinini na tu ol pablik manmeri insait long siti.

Tasol plis ripot i tok bekim olsem ol PMV bas i giaman bikos ol plisman i mekim tasol wok bilong ol.

Ol plisman i traim long stapim ol PMV bas long i no ken katim rot nabaut. Ol i mas ron stret long hap ol i save go long en long kisim na lusim ol pasindia.


Plis ripot i tok tu olsem planti pasindia manmeri i komplem olsem ol PMV bas i no save bihainim stret rot bilong ol. Sampela i save go kisim pasindia long narapela hap na mekim turangu ol manmeri bilong narapela sait i save wet longpela taim tru long kisim bas i go long wok o go bek long haus.

Plis ripot i tok tu olsem ol manmeri i komplem long ol PMV bas i no save stop stret long bas stop na planti bilong ol i no

gat PMV rejistresen o laisens bilong ol draiva i save pinis. Tasol ol i save ronim bas yet.

Plis ripot i tok ol i mekim wok bilong ol tasol long sekim na stretim ol dispela kain hevi. Olsem na ol PMV bas i no ken straik nating na bagarapim turangu ol manmeri nating. Sapos bas bilong ol i nogat hevi long sait bilong laisens na rejistresen bilong bas na i save ron stret long rot bilong em, ol i no ken pret na straik nating, plis ripot i tok.

Long Tunde dispela wik olgeta PMV bas i go bek long ron bilong ol. Tasol ol papa bilong PMV bas i pasim tok olsem ol bai bung gen wantaim PMV asosiesen bilong ol na pusim gut dispela hevi bilong ol.



• Eriku i luk gut nau wantaim ol liklik wok bin kamap long stretim rot.

Stori bilong Morobe

Provinsel Flak na Piksa bilong em.

Hia em ol samting we i makim flak bilong Morobe Provinsel Gavman.

Yelo kala i makim kunai bilong Makam na arapela kunai eria bilong Morobe provins na ol risoses bilong ol. Em i makim tu gol long Wau na Bulolo eria.

Blu kala i makim ol nambis na ailan na ol samting long bus bilong Morobe provins.

Piksa bilong Kundu i makim singsing tumbuna, pasin bilong wokim bikpela kaikai na amamas na pasin bilong toktok wantaim narapela narapela insait long provins.

Piksa bilong spia o bunara i makim pasin bilong painim abus na strong bilong ol man long pait. Man i olsem lida husat i go pas long ol pipel bilong em long pait long wanem samting i bilong ol.

Tit bilong pik i makim ol bikpela samting bilong ol pipel we i stap wantaim ol na bisnis. Piksa bilong pisin Kumul i makim bikpela piksa bilong Papua Niugini.

Wankain piksa tu i makim long arapela bilas olsem pas-pas na pulpul we i hangamap long flak bilong Morobe provins.

Ol dram (Garamut na Kundu) i makim pasin bilong toktok wantaim narapela narapela na tumbuna danis na ol bikpela amamas kaikai.

Het bilong pik. Tit bilong pik na sel mani i makim hap graun Morobe provins i stap long en na wanem samting i stap long graun, bus na solwara bilong provins na arapela samting moa we i makim kastom na pasin tumbuna bilong Morobe pipel.

Siti na Taun Atoriti

I gat tupela taun atoriti na wanpela siti atoriti long Morobe provins.

Ol em: Wau - Bulolo Atoriti, Gagidu Atoriti na Lae Siti Atoriti.

Ol Taun na Siti Atoriti i bin kamap bihainim Atoriti Act 1981. Ol Atoriti i save wok wankain olsem olpela Lokol

Gavman/Taun Kaunsel, tasol lo bilong i bin senis.

Wok bilong ol Atoriti em long kamapim sampela sosel sevis olsem klinim ol taun, lukautim o rabis na baret long rot na ples bilong tromoi ol pipia, kamapim ol ples bilong sindaun kisim win na malolo, planim ol flawa long taun na mekim ples i gutpela, lukautim ol rejistresen na laisens bilong ol kain kain wok na arapela developmen wok insait long boundri o banis bilong ol.

Ol Atoriti i gat ol bod memba, edministretiv na arapela sapot wokmanmeri. Ol dispela bod memba i makim ol kain kain grup olsem Gavman, Sios, Samba ov Komes, Yut Grup, Wimens Grup, Setelmen na ol manmeri i stap long siti na taun. Ol dispela bod memba i kamap bihainim laik bilong ol manmeri long makim ol.

Rurel Developmen Atoriti

I gat tripela Rurel Developmen Atoriti long provins. Ol em:

Anga Developmen Atoriti, FISIKA Developmen Atoriti na Huon Developmen Atoriti.

FISIKA i bin kamap namba wan taim aninit long nem FKPDa long 1975 bihainim Lokol Gavman Ekt (lo). Taim Morobe Tutumang i kamapim Developmen Atoriti Act 1981, FISIKA, we i bin stap pinis i kam long Nupela Ekt (lo) wantaim ol nupela Developmen Atoriti.

Ol Atoriti i bin kamap aninit long Developmen Atoriti Act 1981 na ol i save wok raunim rijen. Dispela i min olsem Anga Developmen Atoriti isave wok tasol long Menyamy Distrik, FISIKA Developmen Atoriti i save wok raunim tasol hap bilong Finsafen, Siassi na Kabwum Distrik na Huon Developmen Atoriti i save wok raunim Huon Distrik (ol i save kolim Lae Rurel) na hap bilong Kaiapit Distrik.

Ol dispela atoriti em developmen ejens bilong Provinsel Gavman na wok bilong ol em long mekim plen na karimaut developmen wok long eria bilong ol we ol i stap long en.



Ox & Palm Mad Minutes Promotions



**I KAMAP
LONG OLGETA
STOP & SHOP
STUA LONG
MOSBI**

Baim ol Ox & Palm Prodak

- Raitim Nem, Adres na Telipon Namba long baksait bilong risit na putim insait long boks i stap long stua we yu baim dispela prodak.

- Ol wina bai inap wokim "FRI TRI MINIT" shopping long stua we ol i baim dispela prodak.
- Mad Minutes Shopping i save kamap long olgeta Trinde moning tasol long ples we ol i salim ol kaikai tasol.
- Ol i tokaut long nem bilong ol prais wina long Mande moning stat long:

Ogas 17	- tupela wina
Ogas 24	- wanpela wina
Ogas 31	- wanpela wina
Septemba 7	- wanpela wina
Septemba 14	- wanpela wina
Septemba 21	- wanpela wina



Bai mipela i ringim ol wina na toksave long ol.

Ol Onarebel Memba bilong Palamen

Nesanel Eksekyutiv Kaunsil (NEC) i tokorait long katim takis bilong eksportim ol diwai na ol i salim i go long Palamen long kamapim lo.

Ol i haitim tok tasol i gat plen bilong katim moa takis long bihaintaim, we ol kampani bai kisim moa mani long ol top kwaliti diwai.

Em i orait long ol pipel bilong Papua Niugini i karim hevi bilong baim moa takis na larim ol ovasis timba kampani i kamapim moa profit?

Wanem as bilong tok?

- Ol dispela kampani i salim ol profit bilong ol i go ovasis na ol tarangu pipel bilong PNG i kisim taim stret.
- I no gat helpim i go bek long ol papagraun.
- Gavman i no inap kisim takis long taim we kantri i gat bikpela hevi tru long mani.
- Ol intenesenel dona bai i no gat bilip moa long pasin bilong gavman i bosim wok mani bilong kantri.
- Ol narapela grup/kampani i ken yusim dispela sans long askim gavman i rausim takis ol tu i save baim nau.
- Ol kampani bai katim tasol ol strongpela diwai olsem kwila na taun na dispela i ken pinisim ol dispela kain diwai long ol bus bilong kantri.

**Plis tru, mipela i askim yupela ol memba
long tok rausim dispela plen bilong
senisim LOG EKSPOTTAKIS.**

PACIFIC
HERITAGE
FOUNDATION



Individual Community
Rights Advocacy Forum Inc.

GREENPEACE



MELANESIAN
ENVIRONMENT
FOUNDATION, INC.

CONSERVATION
MELANESIA INC.



Partners With Melanesians Inc.



WWF World Wide Fund
For Nature

Village
Development
Trust

L A I P S T A I L

KANAGE

"Em nau, narapela wik bilong mi ken?"



Kanage em ples man ya. Em i gat tupela mama dog em i save lukautim long haus. Nem bilong tupela em Buka na Papi. Buka i karim 5-pela pikinini na Papi i karim 5-pela pikinini tu. Na tupela wantaim i stap long haus.

Wanpela apinun Kanage pinis wok gaden na kam i stap long haus. Na poro bilong em i kam lukim ol pikinini dog na askim em: "Hamas pikinini dog olgeta yu gat?"

Kanage ting em moa yet long metimetiks o kaunim namba. Na em i kirap na tokim poro bilong em: "Ha, Buka karim 5 na Papi karim 5, putim olgeta wantaim 6."

WINA BILONG DISPELA WEEK EM

MAX YAWI

VANIMO, WEST SEPIK PROVINIS

SAPOS yu ting yu gat wanpela gutpela pani stori, orait katim hap pepa long fran pes i makim, "Mutrus Kanage bilong dispela wik" na salim wantaim stori bilong yu i kam long Wantok Nuispepa, PO Box 1982, Boroko, NCD, PNG.

Putim nem na adres bilong yu long pas na bai yu gat sans long kamap wina bilong "Mutrus Kanage bilong dispela wik" na winim wanpela praiz. SANS, YAH!

Stori na nem bilong yu bai kamaut long wanwan wik so noken lus tingting long balm Wantok nulispepa na painimaut!

MUTRUS

• Wanpela taim Kanage i sik na i go raun long Kimbe haus sik. Kanage i go sindaun nau na nes i kam na askim em: "Yu sik olsem wanem?" Nes askim pinis na kisim glas na putim long han bilong em. Na Kanage tok: "Nogat, het bilong mi i pen."

Tasol nes putim glas long han bilong papa na tokim em: "Papa, yu noken rausim dispela glas long han bilong yu inap mi kam bek." Nes tok olsem na go ausait.

Tasol Kanage rausim glas long aninit bilong han supim long het bilong em. Taim nes i kam bek, em i painim glas nau. Na papa Kanage tokim em: "Yu mas longlong ya, mi tok het bilong mi, i no han."

Samson Pori (Namba 2 wina)
KIMBE

• Wanpela de Kanage na junia i go long gaden. Tupela klinim gaden pinis na Paps Kanage kukim sampela pitpit bilong tupela i kaikai. Kanage wanpela kaikai ol pitpit, pikinini i les. Kanage fosim junia long kaikai tasol junia i les.

I no longtaim Kanage i no sindaun gut na brata em i airaun na pundaun i kam daun Junia lukim pinis na askim papa Kanage: "Papa, em olsem moran ya." Kanage ting junia iukim wanpela moran snek, na laik painim. Bihain em kalap nogut olsem em i no sindaun gut.

Na em tokim junia: "Harim, sapos yu laikin kain moran, yu mas kaikai pit."

Junia harim na kwiktai em pinisim olgeta pitpit na tupela go long ples.

Steven Kukil
LAE

Lukim moa tokpilai long pes 19

Papa stori long bagarap bilong em na famili long Aitape birua



• Solwara i brukim ol haus na ples i bagarap olgeta.

NEVILLE CHOI i raitim

LONG dispela Fraide, san i bin lait gut, solwara i slip isi, olgeta manmeri i go aut long solwara long kisim pis na kindam."

Julian Kempa bilong ples Sisano i tokaut long dispela moning bilong Fraide Julai 17.

Em i no inap tingim olsem dispela naispela de inap bungim taim nogut, bagarap na wari nau bai i stap wantaim em planti taim bihain.

Em i taim tupela bikpela guria i kamap long Sisano Lagun o Sisano raunwara long Sandaun provins we i kamapim bikpela tait bilong solwara ol i kolim Sunami. Dispela tait wara i go insait na brukim tripela bikpela ples na bagarapim tu arapela ples i stap long nambis.

Julian em wanpela long ol manmeri husat i stap laip bihain long bagarap bilong dispela solwara. Em i gat hevi long sait banis bilong em na i kisim marasin long Vanimo haus sik i stap, i wok long oltaim tingim meri bilong em Ruth husat tu i wok long kisim marasin bikos long bagarap em i kisim long bodi bilong em. Tupela pikinini boi bilong em tu i bin stap laip long dispela taim bilong birua na bagarap. Tasol em i wok long krai yet long narapela tupela pikinini man bilong em husat i lus long birua bilong solwara. Solwara i karim tupela i go pinis na nau yet nogut man inap painim bodi bilong tupela.

Mista Kempa i stori liklik long dispela taim birua i kamap long Fraide. Em i traim long tingim bek wanem samting i bin kamap.

Em i skul holidet taim na ol pikinini wok long pusim Julian na meri bilong em Ruth long ol i laik go long ples bilong ol Nimas, wanpela bilong namba foa ples

insait long Sisano. Ol i laik go pinisim holidet bilong ol long ples.

Bikpela pikinini man bilong tupela, Ben i stap long gret 2 na em i laik malolo wantaim ol pren na ol famili lain pastaim long em i go bek long skul.

Taim em (papa) i lusim Ruth (meri) na ol pikinini man bilong tupela, Philemon krismas 6, Nigel krismas 4, Bonnovento krismas 3 na lukaut pikinini man Mesa krismas bilong em 9 long ples Nimas, Julian i go bek long Vanimo taun long wok bilong em.

Long Fonde apinun Julai 16, em i go bek long ples long kisim famili bilong em i go bek long Vanimo taun. Ol i makim Sarere olsem de bilong go bek long Vanimo.

"Mi kisim spitbot long Vanimo na mi go long Sisano. Mi kamap long ples long dispela apinun olsem long 6 kilok," Julian i ken tingim.

Haus bilong ol long ples i stap long fran bilong nambis. Taim em i kamap, ol 5-pela boi bilong em i kirap nogut long lukim em.

"Olpele 5-pela pikinini bilong mi i kirap nogut long lukim mi. Mi tokim ol olsem mi kam bek long kisim ol i go bek long Vanimo," em ken tingim. Ol manki bilong em i amamas na ol i go raun long haus bilong ol kandre, ol lain famili na pren long tokim ol olsem ol bai lusim ples na go bek long Vanimo long Sarere.

Meri bilong Julian, Ruth i salim tok long ol famili long redim liklik buai na saksak bilong em long kisim i go bek long Vanimo long Sarere.

Julian i tok em i bin sindaun wantaim famili long dispela nait na ol i stori nabaut. Ol pikinini tu i amamas long stori long wanem samting ol i mekim long ples long dispela holidet bilong ol.

Long Fraide moning, Julian i tingim, em i bin wanpela gutpela de tru.

"Long dispela Fraide, san i bin lait gut tru, solwara i slip isi tru na ol manmeri i go aut long kisim pis na kindam.. em i bin wanpela gutpela de tru," em i tok. Mi bin redim ol samting bilong famili long kisim i go bek long Vanimo.

"Long dispela apinun, Ruth, Ben, Philemon na Mesa i pul long kanu i go long arapela sait bilong ples (brukim Sisano raunwara i go) long kisim ol saksak na buai ol i putim oda long en.

"Mi stap wantaim liklik boi Nigel long haus. Yangpela brata bilong mi wantaim mi i wok long stori i stap," Julian i tok.

Guria kamap

Long 6 kilok apinun, taim ol i wok long stori i stap, ol i pilim namba wan guria. Em i namba wan guria. Taim em i laik skelim taim bilong guria long hanwas (kiok) bilong em, Julian i tingim olsem Nigel i bin laik go long nambis. Guria i bin stap olsem 15 minit, em i tok.

Sunami (birua solwara)

Em i ron i go long kisim Nigel taim em i lukim wanpela kain samting long ai bilong em.

"Mi tingim taim Nigel i laik go pilai long nambis, na guria i kamap olsem na mi ron i go long kisim em. Mi kamap na holim Nigel long nambis taim mi lukim solwara i wok long bruk lusim nambis na i go bek... na dispela taim mi harim bikpela krai olsem bilong bikpela balus i kamap.. dispela i no longwe tumas na ples i wok long go tudak. Long ai bilong mi stret, mi lukim solwara i boil o pulap i kam. Mi holim pikinini bilong mi Nigel na stat long ron," Julian i tingim.

Em i ron i go bek long haus na bikmaus long brata bilong em na ol arapela ples manmeri long ron.

Papa stori long bagarap bilong em na famili long Aitape birua

i kam long pes 17

Julian i harim kra i bilong belo long ples, ol i save yusim long bungim ol manmeri i kam bung long bikples long ol wok bilong ples olgeta Mande, na long dispela taim ol manmeri i stat long ron long laip bilong ol.

"Mi tokim wanpela man long paitim bel na long dispela taim ol manmeri i stat long ron nabaut.. Mi wok long karim liklik pikinini bilong mi (Nigel)... na birua i kamap pinis," em i ken tingim.

Bihain long dispela, Julian i tok solwara i holim em na tromoi i go i kam.

Em i tok long namba wan solwara we i bruk i go insait long ples.

"Solwara i tromoi mi go antap long pam wara bilong ples," em i tok.

Long dispela taim Julian i tingim olsem em i bagarapim sait banis bilong em bikos em i bamim pam wara long sait bilong em.

"Bihain solwara i tromoi mi go antap long tupela kokonas. Taim mi bamim namba tri kokonas, strong bilong mi i pinis na han bilong mi i lus long Nigel. Em dispela taim mi lusim pikinini man bilong mi," em i ken tingim bek.

Longpela taim bihain na em i tingim bek olsem meri bilong em i bin go long narapela sait bilong ples.

Ruth i bin ronawe wantaim ol boi bilong mitupela tasol ol i no ronawe longwe tumas long solwara. Wara i karim Ben i go. Ruth i tokim Mesa long holim strong wanpela diwai na noken lusim han. Mesa i holim strong diwai na em i stap laip. Em i wok long kisim marasin long stretim ol sikirap na sua long skin bilong em.

Taim birua i pinis

Taim buria bilong solwara i pinis, ples i bin tudak nogut. Em i ken tingim olsem i bin nogat nois tru long dispela taim.

Julian i tingim taim em i kirap na painim pikinini bilong em. Sait

banis bilong em i pen nogut tru na tu em i no inap lukim gut ol samting.


Em i stat kolim nem bilong ol, tasol em i no harim wanpela samting. Liklik taim bihain em i harim ol manmeri i kra nabaut. Ol i pilim pen na kra long kisim helpim.

"Mi lusim olgeta samting, kolos mi werim tu i raus na mi sanap skin nating. Mipela i lusim ples bilong mipela, haus bilong mipela na mipela i singaut long helpim..sampela bilong mipela i stap gut na laip.

"Mi kra na wokabaut painim ol lain bilong mi taim mi bungim lukaut pikinini bilong mi Mesa. Mi holim em i kam pas long mi. Mi no save mi painim em olsem wanem," Julian i tok.

Painim famili

Bihain long em i painim pikinini bilong em Mesa, Julian wantaim arapela lain husat i stap laip i stap long wokabaut igo long Maindron ples we brata bilong em Jerry i



. ANTAP: Strong bilong solwara i daunim ol bikpela haus i go daun.

LEPHAN: Ol sampela manmeri i karim kago i go long kea senta long stap long kisim helpim.

ANINIT: Ol bikman i wokim giaman haus long ol lip kokonas we ol pikinini i slip long en.



stap. Long haus bilong brata bilong em, em i askim long sampela kolos bilong werim. Ol i givim em wanpela hap betsit we em kisim na pasim olsem laplap.

Em i wokabaut i go bek long ples bilong em taim em i bungim meri bilong em long rot.

"Meri bilong mi i wok long kra i na kolim nem bilong mi. Mitupela i holim narapela na kra i na kolim ol pikinini bilong mitupela man bilong mitupela," Julian i tok.

Tupela i go bek long haus bilong brata bilong em na askim em long ol i mas painim tripela pikinini man bilong ol.

Tupela i kisim wanpela liklik lam na ol i wokabaut i go bek long ples long painim tripela pikinini bilong ol.

"Mipela i wokabaut wantaim ol sua na bagarap long skin bilong mipela, tasol bikpela tingting bilong mitupela i pas long painim pikinini bilong mitupela," Julian i tok.

Namel long rot i go long ples, ol i bungim tripela man husat i tokim ol olsem ol i mas go bek bikos ino gat man long ples na i no gat haus i stap moa. Tupela i go bek long haus bilong brata bilong em na slip inap tulait we tupela istat gen long painim tripela pikinini man bilong tupela.

Tupela i painim Philemon. Kandre bilong em i sevim em we tupela i go antap long kokonas na stap gut long birua bilong solwara.

Las pikinini man bilong tupela, Bonnovento i stap laip tu bikos ol kandre bilong em i sevim em. Julian i tingim na wari long Ben na Nigel.

Ol manmeri long ples i pulap long ol manmeri i kra na wokabaut raun long painim famili na lain bilong ol.

"Mitupela i kra na wok long painim tupela pikinini man bilong mitupela. Mi no save wanem samting i kamap long tupela na inap nau, mi no painim tupela yet," Julian i tok. Julian na meri bilong em i wokabaut long ples na

sekim wantaim ol lain famili na ples lain husat i stap laip tasol i nogat na tupela i go painim yet i go moa long arapela ples.

"Mipela i pret bai narapela solwara i bruk i kam gen olsem na mipela i go longwe long nambis," Julian i tok. Nogat marasin samting na ol manmeri wantaim bagarap long skin na bodi i slip nabaut long bus.

Long Sarere apinun, Julian i tok ol i harim kra i bilong balus long wanpela ples balus we i klostu.

Bihain toksave i go long Julian na ol manmeri long bus olsem husat i gat bikpela bsagarap i mas pul long kanu bihainim wara i go daun long kisim marasin. Em i tok taim ol i laik pul long kanu i go daun, ol manmeri long narapela ples i tok nogut bai narapela bikpela solwara i kam gen. Ol i pret na go bek gen long bus, Julian i tok.

Long Sande moning tru, Julian i go kamap long ples balus we ol dokta i wet long givim marasin long ol manmeri i kisim bagarap.

Julian i kisim marasin long bikpela sua long sait lek bilong em na pen long sait banis bilong em. Meri bilong em Ruth i kisim marasin long lek bilong em we i bin tanim na ol sua long beksait bilong em. Na lukaut pikinini man bilong em Mesa i wok long kisim marasin long ol sua long skin na tu em i gat hevi long pulim win bikos em i bin dring planti solwara na wasan i go long bel bilong em.

Julian i tokaut olsem wanem samting i bin kamap i olsem bikpela kirap nogut. Bikpela kirap nogut we i pusim em long lusim wok bilong em wantaim Woks Dipatmen long Vanimo. Tasol meri bilong em i askim em long noken mekim olsem.

"Mi no inap go bek long ples bikos mi lusim tupela pikinini man bilong mi long hap, Julian i tok. Ating bai mi go stap long Madang long ples bilong meri bilong mi. Tasol bel bilong mi bai bagarap tru taim mi go bek long ples."

KANAGE



Kanage em bilong Sepik. Gutpela poro stret bilong Kanage em bilong hailens. Kanage i gat nupela baisikel. Tasol em i pes taim na tupela i wok long lainim long ronim bsisikel.



Oke poro i tokim Kanage: "Yu holim baik antap long maunten na bai mi kalap antap long baik. Na yu pusim mi na bai mi ron i go daun long maunten." Oke, Kanage i pusim poro bilong em. Man taim poro bilong Kanage i ron i go daun long maunten, em spit nogut tru i go daun na em i no moa tingting long stiarim baik. Em makim stret koknas na ron i go. Na Kanage i singaut: "Poro! Yu saitim!" Man, taim poro i harim Kanage singaut yu saitim, em popaia na givim gutwan long kokonas. Na kisim bikipela bakarap tru long pes bilong em. Nus tu i krungut.

Kanage laik narakain stret insait long tingting bilong em. Em i o soim long ples klia bikos poro i kisim bikipela bagarap tru.

Oke Kanage i lukim poro kisim bakarap na em pret. Na em tokim poro: "Nau mi pilim les ya. Mi bai lainim baisikel long moning."

Poro hailens i no amamas long kain tok-tok bilong Kanage. Na em tingting long mekim sampela samting bai Kanage tu i kisim wankain bagarap. Oke long nait, poro hailens digim graun long hap tupela save lainim baisikel. Na putim sampela graun antap na haitim hul ya. Na long bik-moning tru, Kanage kisim baiksikel na i go antap long maunten. Em i no lukim ol poro i mekim trep long em. Kanage i kalap antap long baiksikel na boiros kilim kam daun long maunten. Poro bilong em i hait na sindaun isi tru. Na lukim Kanage kilim kam daun long maunten, man em kirap nogut fran wil i go daun long trep. Kanage kisim bikipela bagarap stret. Poro kam ausait long ples hait na singaut: "Sori poro, yu do it, I do it."

Francis Makis (Namba 3 wina) MADANG

Kanage wok long wanpela waitman kiap long Mumeng long Morobe provins. Em save gut long olgeta wok. Olgeta taim pig bilong ol ples man kam baragarapim flaua gaden long haus bilong kiap, Kanage i save tokim kiap.

Mekim na waitman kiap belhat na givim gan na katres long Kanage. Na kiap tokim em: "Neks taim pig i kam, yu sutim." Orait wanpela taim ol pig i kam na digim graun arere long haus. Kanage lukim na go kisim gan na putim katres. Na makim gan long pig, na em tokim gan: "Sutim". Tasol gan i no pairap. Em mekim olsem i go na ting gan i mas hangere. Orait em kisim bisket wantaim tin mit na subim long maus bilong paip. Tasol gan i no pairap.

Mekim i go na em belhat. Na em kisim tamiok na brukim gan na pulmapim long bikipela beg na putim. i stap long haus. Apinun waitman kiap i kam na em tok: "Masta, gan hangre na tamiok kaikai gan na mi putim insait long beg."

Karu Bandib 4 Mile Stage 2 LAE

Kanage bilong ples Kembrement. Long independens de olgeta yangpela bilong blekwar: i bung long Sengrimen long pilai soka. Pilai pinis na ol i pasim tok long pin-



isim independens amamas wantaim danis long nait long narapela ples klostu.

Klostu tudak na Kanage wantaim ol arapela i bung na wokabaut i go kamap long ples ya em danis i stap. Man Kanage i no pilai long kaikai long ples bilong pati. Boi nogut i kisim strong pinis, na boi holim geit i go tulait. Tulait i buruk na olgeta manmeri i go bek long wanwan ples bilong ol. Em taim bilong drai wara tu ya. Olsem na Kanage wokabaut isi isi long rot i go bek long ples bilong em.

Taim em i kamap long haus, em i no moa wet. Em pundaun antap long bed na kilim indai strèt long slip.

Aninit long pos haus em junia mekim-save long pilai i stap. Kanage slip i go na em kapupu strong stret olsem: "Piu-u-u". Pikinini kirap nogut tasol na singaut: "Ho-o-lo pa-a-pa! Maski toktok long driman, mi ken smelim maus bilong yu ya."

Samting tru em Kanage kapupu na junia i no save.

K. Patrick ANGORAM

Wanpela nait Kanage i go painim prenmeri long Mambu taven long Lae. Na tupela mekimsave long danis i stap. Tupela danis na stori i go na Kanage pilim pekpek. Na em tokim meri ya olsem em bai go long bus toilet.

Em i go na rausim pekpek i stap. Na harim wanpela feveret musik bilong em i kamap. Na em hariap tasol kisim wanpela lip bilong salat na ronim as bilong em pinis na i go insait.

Em kisim meri ya sanap danis i go na em pilim sikirap. Na stat long wokim kalap kalap danis. Na prenmeri askim em: "Yu danis olsem wanem, Darling?" "Nogat ya, em feveret musik bilong mi ya, olsem na mi mekimsave pastaim?"

Taim em pilim sikirap moa yet, em kalap kalap moa yet. Na prenmeri i paul olgeta na tokim em: "Hei, danis bilong yu narakain olgeta ya." Na Kanage bekim: "Darling, mi laik kisim filings ya, yu stap isi."

Samting tru em meri ya i no save olsem salat i mekimsave long as bilong Kanage ya.

Dick Dickol KIMBE

Kanage em miiks burut mangi. Papa bilong ples Buhem, hap bilong Bukawa. Na mama bilong ples kande-Kurung, em long hap bilong swit Finsafen.

Na Kanage Amunga em wanpela bikhet pikinini stret. Olgeta skul wok em feilim tasol.

Wanpela taim papa bilong kanage o belhat. Na tokim Kanage olsem: "Kanage, yu wanpela saccang pikinini steret, mitupera mamang birong yu putim yu rong gav-mang sukuru, yu peil, mitupera putim yu rong mising sukuru, yu peil. Ating mitupera putim yu rong saccang sukuru bai yu pas orogeta."

Thomas Mumungte LAE

Kanage bilong ples Sosera long Is sepik provins. Tasol em i stap na wok long kakao plantesin long Manus. Wanpela apinun em wokabaut i go long haus. Na namel long rot em lukim sampela Manus poro bilong em i dring sampela bia i stap.

Em laik hait long ol tasol wanpela sol i lukim em na singaut: "Hei Chagi, kam kisim wanpela tasol na yu go." Orait Kanage i go na tok: "Ol sol, mi bai kisim wanpela tasol na bai mi go." Tasol nogat, bia i go swit na em sindaun i go tripela bool pinis.

Bihain long dispela sol ya i kirap na tokpilai long Kanage: "Hei Chagi, yu em yu pukpuk. Tasol mipela ol Manus, mipela em sak bilong dip solwara ya. Yu painim pis long solwara, bai sak i kam brukim kanu bilong yu. Na kaikaim yu long solwara yet. Yu no ting bai mipela givim yu sans."

Kanage i harim pinis na bekim: "Sol yu pinis a? Mi em yu yet i save, mi em pukpuk ya. Pukpuk tu bai mi brukim kanu bilong yu long dip solwara. Tasol pukpuk i no inap long kaikai yu. Mi bai larim yu

swim i kam long nambis. Mi bai bihainim yu isi isi long beksait. Taim yu kam long nambis, mi bai bihainim yu isi isi long beksait. Na yu bai poret na ron hariap hariap tasol i go long haus. Na bai yu lokim dua bilong yu. Tasol pukpuk bai kam yet. Na bai go antap long veranda bilong haus bilong yu. Na bai apim tel i go antap, na bai brukim dua bilong yu. Na taim mi kam insait, yu save pinis, bai mi bagarapim stret sindaun bilong yu."

Kanage wet liklik na bihain em aksim: "Em tasol na sol, yu gat moa?"

Sol nogat moa tok na bekim tasol olsem: "Em inap, yu win pinis."

PM Koninda KIMBE

Kanage bin stap long Mosbi siti na ritim wanpela gutpela stori bilong waitpela Scarlet nambis long Finsafen, Morobe provins. Na planti taim em i save tingting long go na lukim stret long ai bilong em.

Orait wanpela taim em askim wanpela poro bilong Finsafen: "Poro, sapos ol man o meri givim mi samting, bai mi tok tenkyu olsem wanem long tokples Kote?" Finsafen ya i bekim na i tok: "Poro, em i no hat tumas. Taim ol givim yu samting, yu mas tok 'Dange Sengge', we i min tenkyu sista bilong yu."


Stap i go na Kanage bungim inap mani na redi long long Finsafen. Taim em MBA balus i pundaun long Finsafen ples balus, em kisim ka na go stret long Scarlet nambis. Em lukluk raun na bungim wanpela mangi wantaim susa bilong em. Tupela lukim Kanage na givim wanpela kulau kokonas long em.

Kanage amamas tru na kisim kokonas na tok: "Dange Sengge" long mangi ya. Man, mangi ya belhat na givim wan nok long Kanage. Kanage pundaun long nambis na bekim: "Tenkyu mangi, wesan bilong nambis i bilak na mi kaunim olgeta faiaflai bilong Finsafen."


Benson Zake FINSAFEN




OL memba husat i bin kalap lusim Oposisen na go joinim Gavman bilong Bill Skate




• Ian Ling Stuckey
Kavieng




• Sir Rabbie Namaliu
Kokopo




• Bernard Vogae
Wes Nu Briten




• Nakikus Konga
Gasel




• Luther Wenge
Morobe rijinel




• Charlie Benjamin
Manus Open



• Jim Kas
Madang rijinel




• Kennedy Wnege
Nawae




• Kilroy Genia
Abau




KOT i bin rausim ol dispela lain memba bilong palamen. Ol i no moa memba bilong palamen olsem na olgeta i bin apil long traim rausim disisen bilong kot na kisim bek sia bilong ol olsem memba bilong nesanel palamen. Kot bilong ol i wok long kamap yet.



• Pater Louis Ambane
Simbu Rijinol



• Peter Peipul
Imbongul




• Masket Iangalio
Wapenamanda



• Ron Ganarofo
Daulo



• Takai Kapi
Wabeg



• David Basua
Kagua Erave



NEM: John Walter

KRISMAS: 22 (man)

ADRES: Wahgi Tailoring Services, Highlands Gateway, P.O. Box 255, Banz, WHP.

SAVE LAIKIM: Lav leta, senisim ol presen, tok pilai na lukim TV. Mi laikim wanpela meri i gat 17 krismas na i go antap na mi laik kisim bekim i kam long Popondetta, Kokoda Trail na Tufi Ailan. Mi promis long bekim olgeta pas mi kisim.

NEM: James Timbi

KRISMAS: 22 (man)

ADRES: Magupeng, SDA Church, P.O. Box 1845, Mt. Hagen, WHP.

SAVE LAIKIM: Ritim Wantok Niuspepa. Raun long narapela ples. Raitim pas. Waswas long wara. Go lotu. Helpim narapela. Mekim pren wantaim meri bilong maritim bihain taim. Harim ol gospel musik na amamas.

NEM: Bethy Owusu

KRISMAS: 18 (meri)

ADRES: C/- Mista Andrew Yarquah, Electricity Corporation of Ghana, P.O. Box 154, Cape Coast.

SAVE LAIKIM: Raitim, senisim presen, kukim kaikai na raun.

NEM: Mary Yarquah

KRISMAS: 22 (meri)

ADRES: C/- Mista Andrew Yarquah, Electricity Corporation of Ghana, P.O. Box 154, Cape Coast.

SAVE LAIKIM: Spots, raun, tok pilai na senisim ol presen.

NEM: Nicholas Yarquah

KRISMAS: 20 (man)

ADRES: C/- Mista Andrew Yarquah, Electricity Corporation of Ghana, P.O. Box 154, Cape Coast.

SAVE LAIKIM: Senisim presen, raitim pas na kukim kaikai.

NEM: Catrina Kanawi

KRISMAS: 18 (meri)

ADRES: C/- Court Furnishers, P.O. Box 1326, Lae, Morobe provins, Papua Niugini.

SAVE LAIKIM: Raun, danis, kemp, pilaim basketbal, ridim stori na planti moa.

NEM: Pary Kisky

KRISMAS: 24 (man)

ADRES: C/- Sirilus Apkup, Private Mail Bag, Ambunti High School, Ambunti.

SAVE LAIKIM: Raitim pas long ol pren, pilai soka, go long lotu, harim gospel musik na laik go raun long narapela provins.

NEM: Rohland Wahlai

KRISMAS: 22 (man)

ADRES: P.O. Box 36, Aitape, WSP.

SAVE LAIKIM: Save laik harim na mekim musik, pilai spots na raun long nupela ples.

NEM: Regina Mine

KRISMAS: 18 (meri)

ADRES: Kefamo Con/Centre, P.O. Box 109, Goroka, EHP.

SAVE LAIKIM: Lotu, pilai basketbal, waswas, harim lokal musik na pren long narapela lain provins na mi promis bai mi bekim olgeta pas mi kisim.



PANIM LUS PREN:

Mi yet mi Kumove Fono bilong Nupagimi Komyuniti Skul. Na mi wok long painim tupela tisa manmeri. Nem bilong tupela em Mista na Mis Enos bilong Kevian na Popondetta. Mi no save long wanem skul na ples tupela i stap long en, tasol husat man o meri i save long wanem ples tupela i stap? Plis tokim tupela olsem Kumove Fono i wok long painim yutupela na tokim tupela long rait i kam long dispela adres.

Eskei Phono

Lufa Provincial High School
P.O. Box 305, Goroka,
Eastern Highlands Province,
Papua Niugini.

Wanpela man i maritim tupela meri



STORI i go olsem long Goroka Isten Hailans provins insait long Lufa viles Nipinaga i gat wanpela man em i maritim tupela meri na ol i stap. Ol i stap i go na taim bilong san i kamap na ol i hangere long kaikai abus.

Na man i tokim tupela meri bilong en olsem yutupela i redi na yumi i go antap long bikbus na painim masrum na

kapul nambaut na yumi kam daun. Em i tokim tupela meri olsem nau na slip kirap, moning tru ol i wokabaut i go antap long bus na ol i painim kumu, masrum na Kapul i kam i kam na ol i no painim wanpela Kapul na ol i kam kamap long rot long ol i laik go daun long ples nau.

Ol i kam na em i tokim tupela meri, yutupela stap long hia long dispela wel karuka ya i luk olsem haus bilong kapul ya na mi go sekim na kam. Em tokim tupela olsem na em i lusim tupela long rot na em i kisim bunara bilong em na em i wokabaut i go sekim.

Em i wokabaut i go na em i go sekim ya wanpela kapul pundaun nau, em i kilim. Em i kilim na karim i kam karim i kam pulmapim long bilum bilong wanpela meri na em i karim. Em i karim na tupela man na meri i amamas wantaim tupela i go. Tupela i go

na meri i nogat Kapuru long bilum ya bel bilong em i no amamas na em i kam isi isi bihain tupela i kam bihain. I kam olsem ya nogat pitpit i katim han bilong em na blut i no isi long pundaun i kam. I kam nau na em i mekim wanpela singsing olsem: Hutonaga feva feva dagogo'o adavakaiyo yaga kaikava-mona gudivi - o'hane'e dayogo'o adavakaiyo, hutonaga feva feva dagogo'o aclavakaiyo yaga kaikava-mana gudivi a'hane'e dagogo'o adavakaiyo, adavakaiyo.

(Em i tok olsem Kapuru i no stap long bilum bilong mi na mi kam nating ya pitpit bilong bus hutes, yu no ken katim mi). Em i mekim dispela kain singsing i kam na man i putim ia na em i harim ya nogat, em i mekim dispela kain singsing i kam.

Em i harim i kam na painim naip i kam ya naip nogat naip

nogat nau em i brukim spia bilong em na rausim Kapuru na katim long namel na pulmapim hap long bilum bilong narapela na pulmapim hap long bilum bilong narapela na nau bel bilong ol i gutpela na ol i wanbel na ol i amamas i go daun long ples. Ol i go daun long haus na ol i kuk kaikai na ol i stap amamas.

Em tasol long stori i kam inap. Na dispela stori i mas skulim yumi tu long ol husat man yu maritim tupela meri.

Wanem samting yu laik hia long tupela meri mas tupela wantaim i lukim na sekelim sem levlong long tupela. No ken wansait long narapela.

Em tasol liklik stori bilong mi yet.

Mista Jerryson Walewuya
P.O. Bo 7391,
Boroko, NCD.

Mi gat wari long gras bilong mi kamaut



Dia Laipplain,

Mi wanpela yangpela meri na mi wari bikos mi gat hevi long gras bilong mi.

Mi save lukautim gut gras tasol taim mi holim, sikirapim na komim, planti i save kamaut nating tasol. Mi wari olsem gras

bilong mi i wok long lus nating. Bai mi wokim wanem samting long stapim dispela samting na gras bilong mi i stap gut?

Hair Care

Dia Pren,

Long olgeta taim wanwan bilong yumi i komim o brasim gras, sampela bilong em bai i kamaut. Na yu noken wari. Tasol sampela taim em bai antapim mak bilong em.

Hia em sampela samting yu ken wokim long helpim yu lukautim gras bilong yu i no givim yu hevi;

- Yusim afro kom long komim gras na i no narapela we bai i rausim gras bilong yu;

- Ronim han/pinga bilong yu long het na gras long sekim (gras) olgeta nait na moning;

- Katim gras bilong yu planti taim na em bai helpim stapim gras i bruk na gro gut na strong;

- I moabeta yu wasim gras wantaim sempu na kondisina. Sop i no gutpela tumas long wasim gras long en. Ol woklain long kemis bai helpim yu long wanem kain sempu i gutpela moa long gras na;

- Sekim olsem yu nogat lais long gras o yusim wanpela kondisena ol i kolim long dendraf long stapim yu sikirapim tumas het na gras bilong yu. I gat ol kain pauda na marasin i stap long kemis bilong yusim sapos het bilong yu i sikirap planti.

Sapos ol dispela rot i no helpim yu wantai hevi long gras bilong yu, i moabeta yu lukim dokta na kisim etvais bilong em. Sampela taim gras i pondaun bikos man i gat sampela kain sik long bodi bilong em.

Laipplain



Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!

Skate mauswara long ol Simbu pipel

Dia Edita,
Mi wanpela mangi husat i save laikim long ritim Wantok niuspepa. Asples bilong mi em long Gumini insait long Simbu provins. Nau mi kam wok na stap long Maunten Eriama Wota Tritmen Projek insait long Mosbi siti.

Long 1992 long nesenel ileksen taim, mi bin stap long Godens pilai graun na mi lukim Praim Minista bilong mipela nau, Bill Skate, i go kempen.

Mista Skate i kempen na tok yupela ol manmeri bilong Simbu, yupela harim. Yupela noken ting biknem lida bilong yupela long bipo, lambake Okuk i dai, mi bai tok em stap laip yet. Em husat? Em mi tasol.

Yupela votim mi bai mi wok olsem lambake Okuk. Ol Simbu long Mosbi pasim vot na givim long Skate.

Skate win long ileksen na em i no tingim ol manmeri bilong Simbu we ol stap long Mosbi. Na mi ken tokaut olsem dispela em i no pasin bilong lambake Okuk, wanpela trupela lida bilong mipela. Mi ken tok Skate i giaman

manim tru mipela ol Simbu pipel ya.

Nau mi lukim ol promis i go wara nating. Na mi laik tokim praim minista olsem em mas sem long yusim nem bilong biknem lida bilong mipela, Okuk. Mi laik tokim em long noken moa yusim nme bilong biknem lida bilong mipela ol Simbu pipel.

Mi ken tok tu olsem kain pasin bilong giamanip mipela ol Simbu pipel em pasin bilong mauswara man ya.

Mipela olgeta Simbu save olsem Okuk em wanpela rait man bilong mipela tasol em dai. Dispela rispek mas stap na ol lida bilong tude noken yusim nem bilong Okuk long winim ileksen.

Em tasol liklikhap toktok bilong mi. Yu husat laik sapatim o egensim dispela tingting bilong mi, yu rait tasol i kam long Wantok niuspepa na mi bai ritim.

**Gul Mike Bal
Mt Eriama WTP
NCD**

Ol meri Tolai fit nating

Dia Edita,
Mi wanpela meri Tolai na mi save stap long Kimbe long Wes Nu Briten provins. Mi laik bekim pas bilong susa Julie Saimon, em i bin kamap long dispela niuspepa bilong Julai 2, 1998.

Susa Julie Saimon i bin tok olsem bilong wanem na ol meri Rabaul i save salim buai long Kimbe? Mi ken laik askim susa Julie olsem bilong wanem na em i semim ol meri Tolai olsem. Mi laik tok klia olsem

ol meri Tolai is alim buai bikos Rabaul buai i bagarap wantaim daka i swit long kaikai.

Olsem na ol i kam salim bai ol manmeri i baim. Bikos ol manmeri i no laikim buai bilong yupela ol lain olsem Julie.

Susa Julie i tok tu olsem ol meri Rabaul i save painim man. Mi laik askim olsem ol meri Kimbe i no save painim man?

Mi laik tok olsem planti meri Kimbe tu i gat nem long painim man long Rabaul ya. Ples bilong danis long 6 klok nait i go inap long moning em ol meri Kimbe tu bai stap ya. Olsem na noken bagarapim ol meri Tolai tasol.

Em tasol na ol meri Tolai em ol fit naing ya. Sapos hap toktok ya i kukim yu, bekim tasol long Wantok niuspepa na bai mi lukim.

Yauro.

**Alice Joel
KIMBE**



Boi Tari sapatim ol meri Rabaul

Dia Edita,
Mi wanpela mangi bilong Wes Hel long Iba Tigibi eria bilong Tari long Sauten Hailans provins. Nau mi laik bekim pas bilong susa ya, Julie Saumon.

Em bin rait long dispela niuspepa na komplem long ol meri Rabaul husat save painim maket long olgeta hap. Em i tok olsem em i no save long olgeta hap na tu ol lain Kimbe i no planim buai na daka. Na bagarapim stret ol meri Rabaul olsem ol save painim tu man long olgeta hap.

Em tok tasol nogat sem bilong ol. Bikos ol i no save sem liklik ating long kain bikhet pasin na maunten i paia long Rabaul. Maunten i paia long wanem ol painim mani na disko long

olgeta de. Em tok olsem bikos em i go salim buai long Kimbe maket na ol i no kisim liklik bilong em. Na belhat bilong en i putim long pepa.

Mi laik tok olsem kain toktok i bilong susa i mas jeles tasol long ol stail meri Rabaul ya. Em ol feveret bilong mi ya. Olsem na mi sapatim ol.

Kain pasin bilong tok long birua bilong maunten paia i no gutpela. Em samting papa God yet i laikim na i kamap. Mi hop olsem kain birua i kamap long ples bilong yu, bai yu tu pilim.

**Nelson K. Ega Igin
Tari
SAUTEN HAILANS**

Kabwum pipel wetim ileksen promis bilong Memba Soanu

Dia Edita,
Mi wanpela mangi Timbe insait long Kabwum distrik bilong Morobe provins. Nau mi stap long Mosbi.

Mi laik save long memba bilong mipela ol Kabwum pipel, Ginson Soanu. Nau mi laik save em i stap long wanem hap nau?

Long ileksen i go pinis, em bin raun long ol ples na mekim plan-

ti promis stret. Nau we kaikai bilong em? Mipela i no lukim wanpela han mak bilong memba nau.

Mipela ol pipel bilong Kabwum i votim yu long paitim toktok long Palamen. Na bringim sevis i kam long ol bus kanaka ples bilong mipela.

Noken stap tasol long Mosbi siti na lus tingting long mipela. Plis traim raun long olgeta hap kona bilong Kabwum. Na sekim wanem kain sevis o developmen ol pipel i laikim.

Mipela no laikim memba bilong Kabwum long putim ai long Gavana Luther Wenge long bringim developmen long mipela. Yu mas mekim wok bilong yu stret. Bikos Wenge em mekim planti samting. Na em raun long

olgeta hap. Na mekim gut wok.

Mipela les long kain memba bilong giaman na tok em mekim samting, we mipela ol pipel i no lukim wanpela han mak.

Pasin bilong giamanip ol tran-gu pipel long tinpis na rais em mipela mas lusim nau. Mipela ol pipel i no votim ol memba long go slip long Palamen, nogat.

Olsem na mi laik tok, samting em yu memba promis long mekim, plis mekim kamap samting ya.

Em tasol toktok bilong mi. Husat brata o susa i laik sapatim o egensim, rait tasol long Wantok niuspepa. Na mi bai amamas tasol long ritim.

**N. Sepman na P. Sugumo
MOSBI**

Sapos yu laik salim ol pas bilong yu i kam long dispela niuspepa. Salim i kam long dispela adres:
THE EDITOR
WANTOK NEWSPAPER
PO BOX 1982, BOROKO, NCD.

Daunim baunti peimen long helpim ol kofi groa

Dia Edita,
Mi laik autim tingting hevi na wari bilong mi i go olsem long ol PNG gavman lida.

Mipela 5-pela Hailans provins i gat planti manmeri long lukim moni long wanpela samting tasol, em long kofi. Olsem na olsem wanem na prais bilong kofi i go daun. Em wanem kain pasin tru gavman i wok long mekim nau long i no luksave na helpim mipela ol groa.

I tru olsem Brasil na wol maket

tu em prais i go daun. Tasol yupela ol gavana bilong ol provins inap painim rot bilong helpim ol liklik kofi fama o nogat?

Yupela traim na katim dispela mani ol i kolim baunti peimen i go stret long kofi fektori. Na ol kofi baya i ken apim prais liklik bai ol kofi groa i ken kisim bikpela mani liklik long kofi bilong ol.

Ol gavman na stesin o taun wokman meri i noken tingim yupela yet. Traim na tingim ol pipol bilong yupela long ol ples

kanaka. Sapos yupela i no laik apim prais o putim baunti peimen i go long kofi fektori, orait daunim prais bilong ol stua i go daun.

Em tasol wari bilong mi. Mi bilip ol bikman meri long wok kofi wantaim ol lida long gavman i luksave na mekim sampela gutpela senis long helpim mipela olgeta kofi groa long kantri.

God bles.

**Andrew M.S.
GOROKA**

RESIS BILONG RAITIM STORI

Yu save yu gat sans long winim kes prais inap long mak bilong K4000, wanpela Kundu Save akaunt na Mobil fuel voucher.

Raitim wanpela sotpela stori tumbuna, stori, redio pilai na essay.

Het tok bilong essay em, "Bilong wanem na pasin bilong rit na rait i gutpela?"

Long pilai yu mas katim dispela hap pepa daunbilo na raitim nem bilong yu wantaim na salim i kam.

Hia em ol prais:

Essay - K500 / bes essay

Ol man-meri:

Bes sotpela stori - K300/Mobil Oil fuel voucher
Bes redio pilai - K300

Haiskul/vokensol skul/code:

Bes tumbuna stori - K150
Bes sotpela stori - K150
Bes redio pilai - K150

Top UP-/ Kominiti skul:

Bes tumbuna stori - K100
Bes sotpela stori - K100
Bes redio pilai - K100

Name:

Adres:

Telepon:



Levol makim Haiskul, Top up, bikpela man/meri:

Wanem stori yu raitim:

Olgeta pas i mas kam long Word Publishing bipo long namba 8 dei bilong September.


Creative Writing Competition,
Word Publishing Co. Pty. Ltd.
P.O. Box 1982, BOROKO, NCD 111.
Telephone: 325 2500 Facsimile: 325 2579

Sapot bilong dispela resis i kam long;






OPIS BILONG GAVANA WESTEN HAILANS PROVINS



**Welkam toktok long Nesenel Kaunsel ov Wimens Enuel Konfrens
i kam long Hon Pater Robert Lak, MP
Gavana bilong Westen Hailans**



MISIS Susan Setae, presiden bilong Papua Niugini Nesenel Kaunsel ov Wimens, ol mausman bilong wanwan provins, ol bikmanmeri na yupela olgeta.

Mi amamas tru long tok welkam long yupela olgeta long siti bilong Mt Hagen. Mi amamas tru long Nesenel Kaunsel ov Wimens i makim Hagen long holim 1996 Enuel Konfrens bilong ol. Mi laik tok olsem yupela olgeta i ken stap amamas na bung bilong yupela i ken kamap gutpela wantaim ol gutpela tingting yupela i kamapim long dispela konfrens. Mi tok amamas tu long wanwok bilong mi, Gavana bilong Milen Be provins Dame Josephine Abaijah na Misis Rarua Skate long kam long provins bilong mi long dispela konfrens.

Dispela kain bung we olgeta lida long ol kain kain wok na level insait long komyuniti i save bung long kamapim tingting na painim gutpela rot bilong helpim ol pipel em gutpela samting tru. I nogat narapela gutpela rot moa long pasin bilong kam bung wantaim bungim tingting long stretim ol hevi bilong pipel.

Ol meri long wok politiks na arapela sosio ekonomik developmen long pasin bilong wok bung wantaim i bin kamap na stap bipo long taim Papua Niugini i kisim independens. Long 21 krismas i go pinis mi bin lukim Papua Niugini Kaunsel ov Wimens i bin kisim luksave long sait bilong politiks na sosio ekonomik developmen bilong Papua Niugini.

Nau ol man i luksave olsem ol meri i mas wok bung wantaim ol, mi bilip i gat planti samting yet long kamapim. Wanem samting yupela ol meri i kamapim i mas makim na helpim tu planti meri husat i stap long ples. Na mi no laikim ol kain pasin we ol man i maritim moa meri na ol i save paitim ol meri bilong ol.

Lukluk bilong mi nau em long nupela sistem we gavman i kamapim pinis na i wok gut nau. Lo insait long rifom sistem bilong gavman i luksave long ol meri long Provinsel Gavman na Lokol Level Gavman. Dispela lo i mekim ol meri i sanap wankain wantaim ol man long mekim disisen long olgeta level bilong gavman. Ol meri i mas stap insait long mekim ol senis long sosio ekonomik developmen long komyuniti, lokol na distrik level na tu long provinsel level. Tru olsem 13 lokol level gavman bilong Westen hailans provins em ol meri i stap tu. Sori samting em nogat meri i bin kamap olsem presiden o vais presiden bilong Lokol Level gavman tasol mipela i gat meri long asembli.

Bikpela samting insait long rifom em long kisim sevis i go long ol pipel. Polisi gol bilong rifom sistem bilong gavman i mas gat skul, helt sevis, rot na bris. I mas gat wara saplai, rurel pawa saplai, telefon sevis na arapela moa. Ol dispela

sevis i bilong helpim pablik. Gavman aninit long rifom sistem i mas lukluk long kamapim sevis long ol pipel moa long lukluk long kamapim ekonomik sistem. Tru olsem i gat rot insait long rifom long gavman i ken kamapim bisnis bilong pulim mani.

Long dispela rot, gavman bilong mi i laik helpim ol meri na kamapim kredit skim we mani bai i stap long Rurel Developmen Beng we ol meri i ken kisim dinau long en. Dispela mani bai i go long ol meri husat i rejista grup bilong ol meri. Mi save olsem ol meri i gutpela menesa long sait bilong lukautim gut famili. Na ol i ken gutpela menesa tu long luksave sait bilong wok bisnis bilong famili. Mi laik tok amamas long helpim we i kam long ol ogenaisasen insait long PNG na ovasis. Long kolim sampela, Wol Beng, Hom Afeas Dipatmen na Rurel Developmen Beng bilong Papua Niugini i bin luksave tru long hatwok bilong ol meri. Mi laikim ol dispela helpim i mas stap gut long helpim ol meri bilong Papua Niugini we planti i stap long asples.

Famili menesmen long sait bilong ekonomik em bikpela samting long gavman bilong mi biko sol sosel problem yumi bungim long PNG i ken slo daun, sapos yumi luksave long famili beis ekonomi. Sapos yumi givim ol samting long mekiminsait long famili, mi save ol i no inap mekim stil o mekim trabel long arapela lain insait long komyuniti.

Dispela em wanpela as tingting long polisi gol bilong gavman bilong mi we i stap insait long vison 2020 lukluk bilong mipela. "Stretim gut laip na sindaun bilong ol pipel bilong Westen hailans provins long yia 2020."

Samting mi toktok hia em, mi laikim olgeta pikinini i mas kisim gutpela skul, gutpela helt, gat sans long kisim wok we i ken helpim em long kisim ol samting olsem haus, kaikai, kolos, ol samting ol i laikim na stap gutpela laip.

Planti manmeri bai tok dispela em driman tasol na i no inap kamap, tasol mi laikim tru long pusim dispela driman i go het taim mi stap olsem Gavana bilong Westen Hailans provins yet.

Long pinisim toktok bilong opim dispela konfrens, mi tokaut olsem Nesenel Kaunsel ov Wimens Konfrens i open. Mi laikim bung bilong yupela bai kamap gut tru wantaim yupela olgeta wanwan na yumi laikim ol gutpela samting inap kamap long en olsem kaikai bilong dispela bung.

Tenkyu.

MUTRUS

RAGBI LIG NIUS



Muruks redi long winim Kimbe taitel

HENRY MORABANG i raitim

KIMBE United bai bungim Commdore Bay Muruks long Kimbe Ragbi Lig gren fainel long dispela wik Sande.

Insait long dispela gem, ol tripela brata bai salensim ol yet. Ol brata ya em Joe Nelson bilong United bai salensim tupela braks bilong em Paul na Richard bilong Muruks. Kimbe United em i maina primia ya. Na em i gat gutpela

KIMBE LIG RIPOT

sans tru long winim dispela taitel bikos namel long sisen, em i autim tiket bilong Muruks tupela taim. Tasol long priliminari fainel, Muruks i nekim ol.

United bai kisim strong long ol biknem pilaia olsem Joe Nelson, Isacc Glenwin na Albert Gorea. Ol tripela pilaia i save makim Kimbe long inta siti na i gat ekperians long go pas long tim.

Tripela pilaia bai kisim sapat i kam long arapela pilaia. Dispela tim, ol boi Talasea bai kapsait long foa kona taun bilong Kimbe long lukim dispela gem.

Kosa bilong United John Tuka i gat sampela kain puripuri long autim tiket bilong Muruks ya. Na puripuri i no min, samting bilong ples, tasol ol kain trik we i ken paulim stret Muruks.

Tuka bai kisim gutpela sapat pilai i kam long kepten bilong em Isacc Levi na Alois Nuli.

Muruks i gat nem. Em i sempion tim bilong bipo. Tasol dispela yia, em i save kisim taim stret long ol mangi United.

Muruks i gat planti ol pilaia i stap long Kimbe Bulls, olsem na United i mekim save long ol long namel long sisen. Tasol taim ol biknem pilaia i kambek, United i kisim taim stret long priliminari fainel ya.

Kosa bilong Muruks em lapun yet na olupela Kumul Darius Haili. Haili em wanpela strongpela pilaia long guttaim bilong em.

Muruks i gat ol biknem pilaia olsem kepten yet Paul Nelson, Max Maea, John Gouma, Patrick Loplop, Patrick Songi, Ben Kamule, Sylvester Pologau na Edmund Sauli. Planti ol dispela pilaia ya i save pilai long Kimbe Bulls na dispela bai helpim tru Muruks long winim gren fainel ya.

Planti sapota i makim pinis olsem Muruks bai autim United. Olsem na sapos yu wanem sapos bilong United na Muruks, mas kamap na lukim.

Country Warrior i stap king yet

SENTRAL LIG RIPOT

COUNTRY Warrior laik wokim rekot long winim olgeta gem insait long Sentral Ragbi Lig Asosiesen. Warrior i winim olgeta gem i kam inap las wik taim ol i autim maina primia taitel bihain long ol i nekim Gerehu Hunters 28-22 long Pari Ragbi Lig oval las wik Sande.

Dispela gem i bin strong tru. Tupela sait wantaim i pilai strong tasol Warriors i moa yet na ol i winim dispela gem long wanpela trai tasol. Warriors em i gat ol gutpela pilaia we i save kamapim gutpela pilai stret. Ol pilaia olsem Raymond Issac, Kiose Tete, Jack Taru, Moses Semo na Vele Goru i save pilaia gut tru na tu ol i save long gem bilong ol yet.

Long dispela wiken, Taurama Waves bai bungim Kisere Bears, Country bai bungim Muko United long kwalifa. Wanem tim i win namel long Muko na Country bai sindaun long gren fainel na wanem tim i lus bai salensim husat i winim gem bilong Taurama na Bears.



• Winga bilong Paga Panthers Augustine Daniel i ron namel long tupela bikpela fowat Francis Pegu (raihan) na Kiap Rumints (Iephan)

Kerema makim junia skwat bilong Sauten Zon resis

KEREMA LIG RIPOT

KEREMA Ragbi Lig i makim pinis wanpela Anda 19 skwat long stap insait long Sauten Zon ragbi lig resis. Dispela resis bai kamap long Pot Mosbi long dispela wiken (Ogas 15-16).

Ol selekta i makim 20 pilaia na tu 5-pela riserv bihain long tupela gem.

Ol opisel i amamas long dispela skwat na bilip olsem ol dispela liklik mangi bai hapim nem bilong Kerema taim ol i pilai long Mosbi.

Sekretari bilong Kerema Ragbi Lig Robert Dilu i tok em i ken lukim sampela ol yangpela junia Kumul i wok long pilai.

"Mi amamas tru long pasin ol yangpela pilaia i mekim long traime bilong seleksen trails. Sampela bilong ol dispela pilaia i bin pilai tripela gem olgeta, na tu bihain ol i go pilai long klap bilong ol. KRL bai wok strong yet long painim rot long salim tim.

Nau yet ol eksekutiv bilong KRL i wok long painim mani long salim dispela tim. Wokabout bilong tim i kam long Mosbi bai inap long K15-17,000.

Ol wanwan pilaia bai tromoi K50 olsem levi fi bikos KRL i nogat gutpela banis long kisim get fi long wokim mani ya.

Vais presiden bilong KRL Nao Kouoru i tok wok bilong painim mani bai i no inap stapim ol boi Kerema. Ol bai kam yet long Mosbi long soim stail bilong ol ya.

Skwat em Johnson Kevea, Neava Kokori, Ronnie Pirika, Keith Haiveta, Luxcy Solomon, Ben Morehari, John Haro Jnr, Kairi Kemo'o, Gabby Eri, Ila Sireh, Raymond Maiu, Marcus Omohae, Glen Nao, Mark Lavai, Patrick Kasau, Joe Avea, Seta Avaka, Jacob Lunefa, John Seafi na Morgan Airi.

Emmanuel Xavier - menesa, Daure Hosea - kosa, Morgan Pekaea - trenna na Elvis Pirika - dokta. Ol riserv em Reveal Okoko, Koaru Hereva, Siviri Kakaito, Bob Haro na Eho'o Omohae.

Tigers autim Difens long priliminari fainel

LAE LIG RIPOT

MOROBIE Tigers bai bungim Brothers long gren fainel bilong Lae Ragbi Lig long dispela wiken bihain long em i autim Defence 27-14 las wik. Kosa bilong Tigers Jaybee Biayaha i amamas tru long olgeta pilaia bilong em bihain long ol Tigers i putim 6-pela trai na Defence i bekim long tripela tasol.

"Mi amamas tru na mi no save bai mekim wanem toktok," Biayaha husat i bin wanpela memba bilong Tigers tim long 1989 taim Tigers autim Brothers. "Bikpela amamas bilong mi i go long olgeta pilaia bilong Tigers. Nau mi laik toktok long neks wik gren fainel," kosa i tok.

Dispela win bilong Tigers em i olsem bekim dinau. Long 1993, Defence i bin rausim trasis bilong ol Tigers na go pilai long gren fainel.

Sampela pilaia bilong Defence bai kamap long ai bilong judiseri komiti long ol i pusim referi i go i kam insait long namba tu hap bilong pilaia.

Defence i no westim taim. Ol i brukim kiau taim seken rowa David Guido i putim trai. Tasol bihain long em, Tigers i kirapim paia na putim tripela olgeta. Namba wan trai i kam long faiv-et Timothy Timeaus, Wilson Kombra na lan Epora long hapim skoa i sanap olsem Tigers 12 na Defence 4 long haptaim.

Long stat bilong namba tu hap, senta bilong Defence Philip Ericke i putim wanpela trai na surik skoa i go long 12-10. Tigers i kikim wanpela fil gol long 50th minit long apim skoa i go long 13-10. Orait, Timeaus husat i kikim fil gol, i go putim namba tu trai na winga Timothy Kulex na Nicky Mai i putim arapela long hapim skoa i go long 27-10.

Bob Kuk i putim las trai bilong Defence 27-14.

Bikpela fowat bilong Difens Simon Kundi i tok em i no laki long diospela yet, tasol bai traime gen neks yia.

Tasol ol Tigers bai laik traime bihainim wankain stail ol i bin mekim long 1989 taim ol i winim Brothers. Yu ting dispela i ken helpim long win o nogat.

Kosa bilong Lahanis i paia

GOROKA LIG RIPOT

BIKPELA toktok nau i sut i go long kosa bilong Goroka Lahanis Martin Nano long i no soim gutpela pasin long helpim spes long fainel bilong SP inta siti long dispela yia.

Na tu i gat sampela toktok i sut long ol selekta na tim menesmen long i no makim gutpela tim na tu i no save givim mekim save long ol pilaia husat i bikhet ya. Wanpela sinia pilaia husat i no laik tokaut long nem i tokim Wantok long Goroka olsem as bilong Goroka i no stap long fainel em bikos i nogat gutpela kosa na tim menesmen i slek long mekim save long ol pilaia husat i hambak.

Em i tok pasin bilong mekim save long ol pilaia (disiplin) em i gutpela tru ya. Na dispela i save helpim ragbi lig long kamap strong. Sapos nogat gutpela disiplin, ragbi lig tim bai i no inap strongpela. Dispela pilaia i tok taim em i save pilai long Lahanis na raun, tim menesmen i no save makim save long ol pilaia husat i bikhet o i no bihainim lo bilong tim. Dispela as tasol i save daunim tru tingting bilong ol pilaia long kem ya. Em i sutim tok long kosa Nano olsem em i gat wanpela kain pasin we, em i no kia, yu bikhet o nogat. Dispela kain pasin i bikpela tru taim Goroka Lahanis i save raun long arapela har bilong kantri.

Pilaia bilong Lahanis i tok taim em i skelim olupela kosa Leva Tete na Nano, Tete em i strongpela kosa na ol pilaia i save rispektim em. Na tu em i gat mekim save long ol pilaia husat i bikhet.

MUTRUS

Ragbi lig Nius

Royals i redi long winim taitel



• Hapbek bilong Royals, Godfrey Luke i laik stapim fowat bilong Paga Panthers Chris Lome.

MOSBI LIG GRENFAINEL RIPOT

HENRY MORABANG i raitim

ROYALS i kamap olsem feveret tim long winim Pot Mosbi Ragbi Lig gren fainel long dispela wiken taim ol ibungim Post Puma. Dispela gem bai kamap long Lloyd Robson oval.

Tupela tim wantaim i gat gutpela fowat. Tasol Royals i gat moa hevi bikos ol i gat bikipela ol pilaia olsem Kiap Rumints, Philip Wallia, Francis Pegu na Robert Sine.

Dispela ol pilaia tasol i brukim stret difens bilong Paga Panthers long winim spes long grenfainel.

Em i namba wan taim bilong tupela tim bai pilai insait long grenfainel.

Royals i gat gutpela sans bikos long ol hevi fowat.

Long beklain, yangpela Godfrey Luke na Gai Lapi i save kamapim ol stail pilai long winim birua bilong ol.

Tupela senta David Mune na Ben Uru bai givim hat taim stret long Paul Kiap na Samson Tamean bilong Post Puma.

Sapos Post Puma i laik win, ol i mas banisim gut winga bilong Royals Jonannes Dame na Selan Davies. Tupela pilaia i gat spit na save ran olsem wel maliau long go putim trai.

Askim ol pilaia bilong Paga Panthers na ol boi tokim yupela.

Tasol Royals tu i mas was aut.

Noken ting tumas long ol fowat. Kosa bilong Post Puma John Kume nau i wokim gem plen pinis long stapim gutpela bikipela pilaia ya, Kiap na Pegu.

Kume i tok olsem em i lukim Royals i autim Paga long fowat, olsem na em bai redim wanpela spesel plen long daunim ol fowat ya.

Post Puma i gat ol pilaia olsem Francis Wani, Aia Ilo, Sipa Bire, Billy Eki na Raphael Mua long go pas long fowat. Mua em wanpela pilaia, em Royals i mas was gut, sapos em i gat sans, em bai brukim stret difens bilong ol Royals.

Raphael Mua em i no save kia long yu wanem man. Em i liklik man long sais, tasol strong bilong em i olsem bafalo ya, na i ken karim wanpela o tupela pilaia taim em i ran wantaim bal.

Long beklain Tamean na Mua i save senis long senta. Olsem na ol Royals i mas was long dispela sapos, nogat, Puma bai autim tiket bilong Royals ya.

Bikipela samting em tupela tim wantaim bai kamapim strongpela gem tru.

Vipers i mas joinim Channel 9 resis

POT MOSBI Vipers i mas go bek na pilai insait long Queensland Statewide kompetisen neks ya. Ol opisel bilong PRL i mas kirapim bek dispela toktok na stretim wantaim Kwinslen Ragbi Lig.

Channel 9 i rausim Vipers bikos PRL Bot i nogat mani long stretim sampela ol dinau bilong ol.

Dispela ragbi lig resis long Kwinslen em i gutpela tru. Em i wanpela sans we ol pilaia i ken pilai na ol opisel long Australia ragbi lig klap i ken luksave long ol pilaia ya.

Nupela bot bilong PRL i mas stat long plenim ol dispela kain samting. Bikos sisen bilong PRL bai pinis nau, na em i sans we nupela bot i ken traim long stretim dispela ol rot long salim pilai i go ovasis.

Nau Kaizer Ivesmen i helpim tru PRL long opim nupela klap haus. Klap haus ya i gat olsem

gutpela samting, na i gutpela sapos PRL i ken yusim dispela kain kompetisen long bringim moa pipel i kambek long ragbi lig.

Mi save olsem planti ol lain bai lukim dispela Channel 9 Gems namel long ol tim long Kwinslen na Pot Mosbi Vipers.

Taim Vipers i joinim Channel 9 long 1996, tim i painim planti hevi sret long kosing, na wok bilong redim tim na tu seleksen bilong ol pilaia. Taim Vipers i stat long pilai long Australia, em i gat planti senis stret long kosa ya.

Tasol i nogat wanpela kosa i bringim tim i go long fainel. Bikipela astingting em long winim ol gem na pilai long fainel bilong Channel 9.

Arapela bikipela tingting long joinim Vipers em long helpim moa pilaia long joinim tim long Australia.

Vipers i gat planti ol sapota stret long Australia.

Na i gutpela sapos Vipers i ken joinim gen kompetisen ya

Long skelim Vipers, ol boi Vipers nau i gat gutpela sans moa long winim Channel 9 ragbi lig resis.

Wantaim gutpela sapot long Deloitte na Mutrus, ating Vipers i ken semim ol biknem tim long Australia ya.

Grenfainel bilong Mutrus PRL

Bikipela gem bilong ragbi lig gren fainel bai stap namel long Royals na Post Puma. Dispela em i namba wan taim tupela tim i stap insait long fainel. Gem ya bai kamapim sampela strongpela takol i kam long tupela sait wantaim.

Ol fowat bai tokaut long husat i win. Long sait bilong Royals em Francis Pegu na Philip Wallia. Na long Post Puma em Billy Yaki.

Krewanty joinim Melbourne Storms

HENRY MORABANG i raitim

JULIUS Krewanty i kamap namba tu Papua Niugini pilaia long joinim Melbourne Storms. Mangi Wes Sepik i sainim pinis tupela ya kontrak wantaim klap bilong Melbourne, na redi tasol long joinim ol.

Krewanty nau yet i wok long pilai wantaim Norths klap long ragbi lig resis long Brisbane, Australia.

Sapos ol lain i no save long Julius, em i smol brata bilong biknem winga Arnold Krewanty. Arnold tu i bin pilai wantaim Newcastle klap taim ol i joinim Australia Ragbi Lig long 1988.

Julius Krewanty bai poromanim wantok bilong em Marcus Bai. Krewanty em bilong Wes Sepik na Bai em bilong Wes Nu Briten, tupela boi Wes yet.

Krewanty i sainim pinis kontrak na wet tasol long joinim ol. Nau yet em i wok long mekim trening bilong we trena bilong Melbourne Storms Tony Ivers i salim long em.

"Mi no laik mekim planti toktok. Mi bai go soim ol lain olsem mi ken pilai ragbi lig ya.

Melbourne Storms i wok long lukluk long PNG bikos Marcus Bai yet i soim ol opisel bilong Australia olsem PNG tu i gat ol pilaia ya.

Bipo ol Australia i save ran i go long Fiji bikos long Noa Nadruku. Nadruku em wanpela viles boi long Fiji, tasol ol Canberra i luksave long em long

Wol Sevans tonamen long Sidni na go painim em long ples na kisim em i go long Canberra, Australia.

Nau yet Nadruku em i stap long North Queensland Cowboys.

Gutpela pilai bilong Marcus Bai i pulim stret ol opisel long klap long Australia long kam painim ol pilaia long PNG.

Melbourne Storms i makim pinis tripela pilaia Raymond Karl, Peter Noki na David Gomia long trening wantaim ol. Sapos ol dispela pilaia i trening gut, Storms bai kisim ol. Ol tripela pilaia bai go joinim klap long Novemba long op-sisen trening.

Arapela pilaia wanpela klap i lukluk yet em Chris Lome. Brisbane Broncos i wok long putim ai long dispela longpela muruk bilong Ulamona.

Lome i no bin go daun las wik long Brisbane long traim pilai wantaim liklik klap bilong Broncos, bikos klap bilong em Paga Panthers i stap long fainel.

Insait long arapela nius, Marcus Bai i go pas yet long kaunim bilong hit-ups long Nesanel Ragbi Lig long Australia.

Em i go pas wantaim 416, na Martin Lang (Cronulla) 376, Robbie Kearns (Melbourne) 359, Corey Pearson (St George) 349, Matt Adamson (Penrith) 341, Clinton Schifcofske (Parramatta) 332, Dean Pay (Parramatta) 327, Graig Smith (Illawarra) 314, David Furner (Canberra) 309 na Tony Butterfield (Newcastle) 306.



• Julius Krewanty (sindaun takol) i takolim pilaia bilong Japan long Hong Kong Sevans. Boi Wes Sepik i gat namba long makim kantri long union na ragbi lig.

OL RAGBI LIG DRO

KIUNGA RUGBY LEAGUE

Semi Finals

MONDAY, AUGUST 10, 1998

Knockout Round

A 4.00pm U19 Panthers v Tigers

SUNDAY, AUGUST 16, 1998

Semi Finals

B 1.00pm U19 Waliya v Winner Panthers/Tigers

C 2.00pm Res Panthers v Tigers

D 3.30pm A Cowboys v Tigers

SUNDAY, AUGUST 23, 1998

Grand Finals

E 1.00pm U19 Cowboys v Winner Game B

F 2.00pm Res Cowboys v Winner Game C

H 3.30pm A Waliya v Winner Game D

POINTS TABLE

A Grade	Reserve Grade	Under 19
Waliya 29	Cowboys 17	Cowboys 19
Cowboys 24	Tigers 13	Waliya 12
Tigers 19	Panthers 11	Tigers 10
Raiders 8	Waliya 9	Panthers 10
Panthers 7	Raiders 8	Hawks 7
Hawks 1	Hawks 2	Raiders 3

KOIARI POINTS LADDER

AS AFTER: ROUND 3/4 - DATE: 9.08.98

A Grade

Hooks Tigers	15	11	1	3	354	152	23
Crystal Lakers	15	10	2	3	239	199	22
Sogeri Crystal	16	9	3	4	284	178	21
S/Raiders	15	7	-	8	178	228	14
Ice Panthers	15	7	-	11	166	280	8
Vakasu Yuts	15	2	4	9	98	188	8

B Grade

Crystal Lakers	16	10	4	2	134	97	24
S/Raiders	15	8	1	6	112	90	17
Ice Panthers	15	7	2	6	98	82	16
Hooks Tigers	16	6	3	7	128	110	15
S/Owls	15	7	1	7	103	100	15
Sogeri Choice	16	7	1	8	101	89	15
Vakasu Yuts	15	1	3	11	48	149	5

LAE RUGBY LEAGUE

SUNDAY JULY 16, 1998

GRAND FINALS FOR A & B GRADES

Under 19s only Round 13 (Under 17s, no games this weekend)

9.00	U/19 Royals vs Tarangau
10.105	U/19 Brothers vs Panthers
11.10	U/19 Spiders vs Defence
12.15	U/19 Magani vs Tigers
1.20	B Spiders vs Brothers
3.00	A Brothers vs Tigers

MOROB Country RAGBI LIG (M/SEMI FINALS)

SATURDAY 14/08/98

12.30	B Pirates vs Brothers
14.30	A Wests vs Jets

PORT MORESBY MUTRUS CUP

Grand Finals

SUNDAY, AUGUST 16, 1998

Under 19

Dobo Warriors vs Souths

Reserve

Paga Panthers vs Magani

A Grade

Royals vs Post Puma

Preliminary Finals

Results

SUNDAY, AUGUST 2, 1998

Under 19

Dobo Warriors 6 beat Post Puma 4
Souths 12 beat Hawks 9

Reserve grade

Paga Panthers 17 beat Brothers 12
Magani 16 beat Kone Tigers 14

"A" grade

Poyals 28 beat Paga Panthers 14
Post Puma 18 beat Hawks 14

Mt Hagen Eagles holim presentesen long san

MT HAGEN LIG RIPOT

ALPHONSE PU i raitim

SEMPION inta siti team, Mt Hagen Eagles bai holim presentesen bilong em long Pope John Paul Oval long Fraide. Dispela presentesen bai kamap stret long belo bek we bai pulim moa pipel long lukim.

Eagles i laik holim presentesen long san long givim sans long ol papa mama, pikinini na ol sapota long i ken bungim ol pilaia na lukim wanem ol prais ol i winim. Em i namba tu taim Eagles i winim dispela taitel.

Tim menesa Paul Morris i tok olsem sapos ol i holim presentesen long hotel, dispela bai i no inap givim sans long olgeta sapota, famili na papamama long kamap lukim dispela bikpela de.

Dispela presentesen bai stat long 11 kilok we Eagles tim bai karim sil na raun long taun. Na sampela ol bikman olsem gavana Fr Robert Lak, sponsa Cambridge na Wamp Nga bai mekim sampela toktok.

Tim menesemen bai tokaut long ripot bilong ol na tu long rot ol i bin yusim mani bilong ol sponsa long dispela yia.

Morris i tokaut olsem ol bai givim prais long olgeta man na pilaia. Mak bilong prais i sanap long K5,000.



• Ol referi bilong Madang redi long kisim pilai namel long Hawks na Royals. Foto: Robert Kaia.

North Raiders daunim Panthers

MADANG LIG RIPOT

OL YANGPELA boi long asples Riwo, North Raiders i winim Panthers 2-0 insait long bikpela pilai bilong Madang Ragbi Lig las wiken. Dispela gem i bin kamap long Ron Albert oval.

Las wik, ol tim i wok long pait hat long winim spes long fainel. Panthers na North Raiders i no isi, ol i kaikai tit stret na brukim bun long winim ol spes long stap long Madang fainels.

Gem namel long tupela tim i strong tru. Ol i traim brukim banis long skoa tasol nogat wanpela spes i kam. Olsem na long namba wan hap bilong pilai, nogat wanpela skoa.

Insait long namba tu hap, Saimon Stanley bilong Raiders i givim sampela strongpela toktok long ol boi Riwo, na taim ol i go insait long gem, paia i lait stret olsem Kalibobo lait haus.

I nogat wanpela skoa i kamap. Olsem na 15 minits bipo long fultaim, sampela paul pilai i kamap na referi Ben Troupu i givim wanpela penalti long Raiders. Faiv-et bilong Raiders Bann Martin i no abrus, na kikim stret dispela penalti i go insait long win 2-0.

Ol pilaia husat i pilai gut long Raiders em Kenneth Gandi, Chris James na Martin yet.

Nem bilong Stanley Gene i kamap bikpela long Ingran

INTANESANEL LIG RIPOT

INTANESANEL pilaia Stanley Gene i wok long wokim nem bilong em long Fes Divisen ragbi lig long Ingran long dispela yia.

Las wik em i putim 4-pela trai long helpim tim bilong Hull Kingston Rovers long wilwilim stret Widnes Vikings 63-4.

Dispela 4-pela trai i apim nem bilong Gene i go olsem namba wan trai skora bilong Fes divisen.

Long dispela sisen yet Gene i putim 33 trai olgeta. Na dispela em 11-pela moa long husat i stap namba tu long em. I gat tripela gem i stap bipo long fainel, na dispela ol trai em 11-pela moa long husat i kamap namba tu.

Ol 4-pela trai bilong Gene em rekot ya. Tasol i noken ting lus tu olsem em i bin skorim tripela trai long wanpela 5-pela taim pinis long dispela ragbi lig sisen long Ingran.

"Ragbi Lig em tim spot. Tasol mi laki long kisim sans na putim trai ya. Olgeta pilaia long tim i mas kisim bikpela tok amamas bikos mipela olgeta i wok na win.

Gene i wok long pilai gut tru long traim helpim Rovers i kisim level bilong Supa Lig. Ol arapela tim i stap pinis long Supa Lig em Wigan, Leeds, St Helens na Widnes.

Rovers i promis pinis long holim yet Gene long arapela yia moa bihain long sampela Super League klap i laik kisim em.

Olsem na Gene yet i tokaut olsem em bai i no inap lusim Rovers.

Nau yet tu Gene i kisim sampela bagarap long baksait bilong em.

Dispela liklik bagarap i wok long kamapim planti nius tru long Ingran, na em i askim ol niusman long noken traim long mekim dispela nius i kamap bikpela.

Gene i krosim ol niusman long Ingran olsem dispela hevi long baksait em i samting bilong em, na i no samting bilong sapota bilong ragbi lig long save.

Boi Goroka ya i kisim wanpela bikpela sua long het na na ol i samapim em sikspela taim.

Goroka Lig i holim nesenel junia sempionsip

GOROKA LIG RIPOT

NUPELA opis bilong PNG Ragbi Futbal Lig long Goroka i no westim taim long holim nesenel zon junia sempionsip. Opis ya long Goroka i makim Ogas 29-30 olsem de bilong junia ragbi lig sempionsip.

Dispela PNGRFL opis i stap long Goroka. Na bikpela wok bilong em long strongim junia, referi na kosing developmen bilong ragbi lig.

Liklik taim PNGRFL bai tokaut long ol opisel husat bai lukautim wanwan eria junia, referi na kosing.

Nesenel zon sempionsip bai bihainim olpela stail we Noten Zon, Ailan Zon, Hailens na Sauten Zon long resis long ragbi lig.

Menesa bilong Nesenel Developmen Opis Kevin Murphy i tok ol bai makim 20 pilaia long wokim wanpela skwat long resis long Osenia Yut tonamen long Nu Silan neks mun.

Olgeta tripela zon, Hailens, Ailan na Noten i holim pinis intra junia zon sempionsip

pinis. Sauten Zon tasol i no yet, na ol i tingting long holim long Ogas 22-23.

Pot Mosbi yet bai putim tupela tim bihain long Kiunga i tokaut olsem em bai i no inap salim tim. Ol arapela senta bai stap long dispela sempionsip em Kerema na Central.

Sampela ol ragbi lig asosiesen i nogat junia kompetisen. Olsem na PNGRFL i wok long surikim mak bilong wanwan zon.

Goroka na Gembogl long Hailens i joinim Noten Zon. Na Dei, Wabag, Kagua, Nondugl i fomim Hailens Zon. Buka, Kimbe, Kavieng, na Duke of York i fomim Niugini Ailan Zon.

Murphy i tok dispela tingting long kirapim bek Anda 19 bai wokim planti senta i tingting gen long statim gen ol junia kompetisen long eria bilong ol.

I bin igat PNG Skulbois Ragbi Lig tasol dispela i no ran gut bikos nogat sapot i bin kamap long ol skul insait long kantri.

Peter Morrison em i olpela presiden bilong PNG Skulbois Ragbi Futbal Lig.

MUTRUS

RAGBI LIG NIUS



Royals, Post Puma winim spes long PRL fainel

MOSBI LIG RIPOT

HENRY MORABANG i raitim

NEW WORLD Resturant Royals i winim namba wan ples long gren fainel long Pot Mosbi bihain long em i autim maina primia, Paga Panthers 28-14 las wik Sande.

Na Post Puma i nekim ol boi Hanubada, Freeway Hawks 18-14 long kisim namba tu ples long salens long gren fainel.

Royals i moa yet long Sande na autim Panthers. Ol plisman ya i gat ol bikpela fowat husat i bin go pas long stretim rot na winim planti graun helpim tim bilong ol long putim trai. Fowat bilong Royals olsem Kiap Rumints, Francis Pegu, Philip Welia, Robert Sin, Wilfred na Philip Humar i go pas long stretim rot bilong dispela win. Ol dispela pilaia i bihainim gut plen bilong kosa George Kaupa na Adrian Genolagani long putim planti poin na win.

Long beklain yangela hapbek Godfrey Luke i plai olsem wanpela eksperiens pilaia na mekim tupela biknem pilaia Tuksy Karu na

Norris Selu olsem ol skul mangi. Em i kisim gutpela sapot pilai i kam long Gai Lapi, David Mune, Benard Uru, Selan Davis, Johannes Dame na fulbek yet Watkins Toloup.

Maski Lipirin Palangat i kilim indain Selan Davis tupela taim long ol gutpela takol, Royals i pasim tingting tasol pilaia gut tru.

Stail mangi bilong Royals, boi Wes ya - atus loket Dame yet i putim tripela trai. Kain stail long ran wantaim bal na tu trikim ol birua i mekim em i kamap namba wan pilaia long dispela de. Long sait bilong Paga, ol pilaia i no pilai gut tumas. Ol fowat olsem James Yali, Chris Lome, Vincent Okole, Michael Marum, Bebes Warima, Daniel Turpat na Anscar Valu, Mapua Tamtu na Vincent Joseph i traim hat tru tasol pilai i no go stret.

Planti ol pilaia i paul longlong olsem pis karua long wara ya. Olsem na ol Royals i yusim dispela olsem ekskus na winim ol.

Long beklain Ravu Tala, Kaule Rolly, Lipirin Balangat, Simon Rumet, Augustine Daniel na Leonard Tarum i traim hat tasol ol tu i popaia ya. Long bikpela gem, Post Puma i kamapim strongpela pilai stret na stapim Hawks long go insait long grenfainel. Planti sapota i ting

Hawks bai win taim ol i bihainim gutpela gem ples bilong kosa Doura Rei long putim trai. Namba wan trai i kam yet long winga Ben Owen Tonia na namba tu em long Lohia Ben Moide.

Dispela tupela trai wantaim i bihainim gut plen we planti ol arapela tim i no save mekim. Ol pilaia bilong Hawks olsem Rudolf Morris, Agalu Gavera, Lahu Ako, Anthony Arua, Ted Mea i wok long kirapim stret paia long stapim ol fowat bilong Post Puma. Tasol ol boi bilong John Kume long Post Puma i no wari. Ol i wok long pilai isi na bekim wanem samting Hawks i givim ol.

Long hap taim skoa i sanap skoa i sanap 14-all. Insait long namba tu hap, pilaia i wok long go strong yet, na Post Puma i bihainim gutpela plen na autim tiket bilong Hawks.

Ol fowat olsem Billy Eki, Sipa Bire, Raphael Mua, Francis Wani na Sam Tokopae i kamapim strongpela pilai stret long winim graun long putim trai. Long beklain Robert Volu na Tony Mote i pilai strong tru.

Volu na Mote i kisim gutpela sapot pilai i kam long Theo Dame, Francis Kiap, Tamean na Joe Mainde. Fultaim skoa em 18-14.

Royals i bukim gren fainel spot

GOROKA LIG RIPOT

ROYALS i winim pinis spes long pilai long grenfainel bilong Goroka Ragbi Lig taim ol i autim Norths 14-13 las wiken.

Em i namba tri taim Royals i bai pilai long grenfainel bihain long ol i joinim Goroka lig kompetisen long 1992. Na long dispela ya yet, ol i winim namba wan taitel bilong ol. Tim bilong ol plisman husat i maina primia las ya i autim tiket bilong Norths 14-13 long preliminari fainel ya. Dispela em wanpela bikpela win bilong ol plisman long Isten Hailens, na long soim olsem ol i laikim tru long pilai long gren fainel, planti mama bilong plis bareks i krai taim Royals tim i win. Norths inap long winim dispela gem tasol wanpela isi kik klostu long gol pos i abrus. Olgeta toktok nau i sut i go long George Abba husat i abrusim dispela kik ya.

Royals i winim namba wan gren fainel long 1992 taim ol i autim tiket bilong Tarangau, tasol long 1993, ol i lus long Tarangau. Tasol Royals klap i save pinis olgeta ya long fainels bilong Goroka ragbi lig. Skoa i bin sanap 14-9 long sait bilong Norths. Bikpela fowat bilong Norths Lawrence Goive i brukim difens na putim wanpela trai aninit stret long gol pos. Tasol yangpela Abba i abrusim dispela isi kik.

Planti sapota bilong Norths i laik Abba i mas kik na noken larim pilaia husat i save kik olgeta taim Ole Bebe. Taim em i abrusim kik em i sutim tok olsem kik bilong em i go insait tasol referi William Tovevai i strong yet olsem em i abrusim gol pos ya.

Royals i nogat tripela biknem pilaia bikos ol i bin kisim sampela bagarap long skul. Tasol ol arapela pilaia olsem Atu Isoi, Nigel Wagambie, Winnie Moihe, John Markham na Michael Kari i strong tru long fowat. Ol intasens pilaia olsem Rodney Philip na Paul Payesi i helpim ol long daunim biknem tim ya. Long beklain, Norths i gat hapbek Nick Aizue na Kenneth Kanduma. Tupela i poroman gut tru long autim birua tim bilong olsem Philip Bob na Abba.

Norths i no yusim sevis bilong Joseph O'Connor tasol ol i gat ol arapela pilaia olsem Steven Sike, Paul Panix, Suto Barilla na Ole Bebe long sapotim ol ya. Tasol Royals i putim kamap strongpela difens stret long bainisim Norths.



• Maina primia Paga Panthers long Mosbi i kisim poto bipo gem egensim Royals. Royals win 28-14 na bai pilai long gren fainel long Sande. Foto: Joe Ivaharia.

Pirates wetim gren fainel long MCRL

FRANCO NEBAS i raitim

DUNLOP Pirates long sande i autim KC Jets 10-8 long go wetim gren fainel long Morobe kantri ragbi lig asosiesen. Dispela win bilong Pirates em tupela brata yet Wai na Zinewe Titus i go pas long em.

Tupela brata husat i pilai long tupela haps wantaim i mekim hap ol liklik stail bilong tupela wel nabaut igo long eria bilong birua na setim dispela trai.

Planti manmeri i bin kamap long Omili spots oval long witnessim dispela gem we planti strong na hat-

pela pilai i bin kamap. Pirates ino westim taim long fes 20 minits bilong gem taim tupela stail brata ya Wai na Zinewe i mekim kamap gutpela stail pilai na setim Bago Kama long pundaun long trai lain. Marshall Keith i kisim dispela kik apim skoa i go antap 6-0.

Skoa ya i lukim ol Pirates i putim moa presa long Jets olgeta taim ol i kisim bal. Taim dispela i wok long kamap em referi i painim wanpela rong kamap long pilaia bilong Jets na givim penalti igo long Pirates.

Rong i kamap long 15 mita mak we Marshall Keith i kisim penalti gol na apim skoa igo antap 8-0. Tasol ol Jets i traim hat yet na

kisim wanpela penalti taim referi i painim fowat pas long John Kaks bilong Pirates na Yapi Kalawa i kisim brukim kiau 2-8 long hap taim.

Long seken hap pilai i go moa strong tru wantaim ol hatpela takle na strongpela ron kamap long tupela sait wantaim. Jets i wok hat tru long daunim skoa ya kam daun tasol ol Pirates tu i lokim olgeta liklik kona bilong ol long skoa, Tasol ol ino was gut na boi nogut ya John Gaima i wokim wanpela gutpela ron bihain long kisim wanpela gutpela bal long skoa. Yalep Kalepu i kisim dispela kik igo insait na levolim skoa 8-8.

Man taim skoa i lok. em nau bikpela pait i kirap long ol fowat na beklain long mekim sampela liklik trik bilong ol long skoarim gol. Dispela i wok long kamap igo klostu long ful taim we luk olsem bai gem bai dro. Tasol ino long taim wanpela liklik asua kamap long wanpela fowat bilong Jets Obert Natu na referi i givim penalti long Pirates.

Taim tu pinis ya na taim referi i givim penalti em Natu i belhat na wipim referi long pes bilong em. Referi i kirap wokabaut i go outsait long fil tasol ol i statim gem ken.

Keith i kisim dispela kik na lukim Pirates i kamap wina long fainel

skoa 10-8 long go wetim gren fainel.

Jets na bai traim lak gen wantaim West long bungim Pirates long gren fainel neks wiken. Ol lain husat i bin traim hat long Jets em, Gibson Ainamu, Obert Natu, Timothy Philip na Kaupa Eragren. Long Pirates em Keith, Wai na Zinewe Titus, Baro Kamo, Ben Kumba na Wags Wagani.

Long arapela nius presiden bilong MCRL Roy Miringke i tok Obert Natu bai sanap long gems kansol llong dispela trabel em i mekim long referi bihain long dispela wik taim ol i bung.



Ragbi lig Nius




• U19 Ragbi eksen namel long ol Harlequins na Defence long semi fainel bilong Mosbi Ragbi resis.

• Purple Haus husat i save pilai long Eagefa volibal asosiesen long Mekeo.

• Golsuta Deanne Dawanincura i makim mak long sutim gol long Mosbi netbal resis.

• Michael bilong Yuni i stailim kik long gem egensim ol Adau long Mosbi soka resis.



Hard Stones soim pawa long Karkum volibal fainol



• B gret tim bilong ol meri Hard Stones. ANINIT: A gret mens tim bilong Hard Stones.

JAMES KILA i raitim


KARKUM viles insait long Sumgilbar eria long not kos long Madang provins bipo i save gat nem long pilai soka insait long asosesin bilong en. Tasol long ol dispela yia long 1980 na 1990s gem bilong soka insait long lokal asosesin bilong ol i bin bungim planti ol kain liklik hevi nabaut. Dispela em bikos ol yangpela mangi long ples i save laik soim masol bilong ol. Yu save pinis, sampela taim ol i save laik win tasol. Olsem na taim narapela tim i laik win, pait i save kirap. Sori tumas, dispela em bipo.

Yes, nau yet volibal i kisim ples insait long lokal asosesin bilong ol long Karkum viles yet.

Long las wik i go pinis asosesin i bin lukim fainol bilong ol insait long mens A na B gret na womens A na B gret divisen.

Long A gret mens tupela tim ya Hard Stones na KK-Bees wantaim i bin strong tru long soim stail bilong ol. Dispela gem long fainol i bin gat 5-pela set olgeta na ol pilaias long tim i bin putim olgeta strong long win. Ol KK-Bees i bin soim stret stail bilong ol na long fes tupela set ol i bin go pas 2-0.

Hard Stones i kirapim enjin bilong ol long namba tri set wan-



pela gutpela pilai i kam long ol lain olsem Otto Kon, Willie Soron, Robert Nabui, Damun Iragu, Rawad Tony, Francis Nanai, Danny Meglik na Francis Arek. Strongpela sapota bilong ol dispela lain em Laki Tep na Marcus Yaiaim.


Hard Stones i winim namba tri na foa set na bihain strong tru na winim fainel set long winim sil bilong asosesin.

Long B gret divisen fainel ol meri Hard Stones tu i soim

strong bilong ol na bagarapim sindaun bilong Shadows 5-2 long winim gem.

Shadows i bin pilai gut tru long fes hap na go pas 2-0, tasol ol meri Hard Stones soim strong bilong ol long namba tri set na go olgeta long winim gem.

Ol meri husat i bin strong long win bilong Hard Stones em Susan Yapen, Josephine Batlo, Grace Apram, Patricia Marcus, Michelle Tep, Bessi Ronald, Janet Kila na Galum Iragu.



• Ol pilai bilong PJ Hawks i ran go insait long ples pilai las wik. Foto: Wally Ainui.

Wok redi bilong nesenel dats i ran gut

NESENEL DATS RIPOOT

HENRY MORABANG i raitim

WOK redi bilong nesenel dats sempionsip long Mosbi i wok long kamap gut tru. Dispela dats taitel bai kamap long Indipendens wiken. (Sept 15-21).

Tonamen darekta John Maliku na namba tu bilong em Mojeh Selsel i tok olgeta wok redi i kamap gut na bihainim stret olgeta plen.

Samting olsem 16 asosiesen i tokaut pinis long stap insait long nesenel sempionsip bilong dispela yia. Ol

asosiesen em Manus yet, husat i holim taitel, Popondetta, Oro Kantri, Tubuseria, Veifa'a, Poreporena, Daru, Goroka, Kainantu, Wapenamanda, Lae, Mt Hagen, Yonki, Kimbe na Elkadi.

Ol arapela senta husat i no givim nem yet em Buka, Aitape, Alotau na Kavieng.

Tupela bikman bilong dats i tokaut olsem sempionsip i pulim 48 tims, na samting olsem 500 pilai i kam long olgeta hap bilong kantri. Ol dispela pilai bai resis long autim Spia Dats kap we Wills kampani aninit long smuk Spear i bin givim olsem sponsasip.

Selsel i tok Wills i givim K10,000 long sapotim dispela tona-

men. Na ol i mekim bikpela tok amamas i go long Moonlight na tu Phantoms klap long givim spes long holim dispela sempionsip.

Dispela dats sempionsip bai kamap sem-taim wantaim Indipendens selebren na tu Hiri Moale festival.

Selsel i singaut i go long olgeta memba bilong Palamen bilong Nesenel Kapital Distrik long sapotim dispela dats tonamen. Na ol arapela wok long stretim sekjurit, trenspot, haus slip, ol opisel na tu disiplinari komiti i redi pinis.

Maliku i bilip olsem dispela nesenel dats sempions bai kamap wanpela gutpela stret long dispela yia.

Poro gat laik long winim LFA soka taitel

FRANCO NEBAS i raitim

PORO soka klab husat i pilai insait long Lae futbol asosiesen (LFA) i soim bikpela laik long winim ol taitels long dispela yia. Dispela em namba tu yia bilong ol mangi long Admin hostel pilai insait long LFA kompitisen.

Long resis bilong las yia ol i bin givim planti gutpela salens long ol namba wan tim taim ol i kam insait long lig divisen. Ol i mekim tru long fainels tasol i aut long mesa fainels.

Long dispela sison tu ol kamap wantaim ol gutpela pilai we lukim ol i sindaun nau long namba tri spot long leda bihain long Blju Kumuls na Mopi. Kumuls yet i stap antap long leda wantaim 42, Mopi 40, Poro 32 na West 29. Dispela em ol fes 4 tims.

Kompitisen nau em stap long namba tu raun we igat samting olsem 5-6 pela gems istap yet bipo long ol fainels. Long dispela sande Poro bai traime wokim wankain olsem las wiken we em i bin bagarapim sindaun bilong Topik 5-0 taim em i bungim Faze.

Kosa Peter Nime i amamas long pilai bilong ol pilaias bilong em na i redim gut tim bilong dispela sande long kisim faze. Em i tok, "tim em orait tasol long olgeta dipatmen na sambai tasol long sande. tupela olpela pilai bilong Mt Hagen skwat husat tu istap wantaim tim nau bai givim moa strong long tim"

Tuepla olpela pilai bilong Mt Hagen em, Augustine na Stanis Yarmi. Yarmi em save pilai straiika na Augustine long beklain.

Ful tim bilong Poro em, Kenerth Yanga bai sanap gol kipa, Barry Yanding, Nopi Dona, Andy Mark na Augustine long beks, Bobby Yanga na Augustine Michael bai pilai insait long senta midfil na Esa Nasa wantaim Sai Pakisa long tupela flank.

Top gol skora long LFA John Sam bai ron wantaim Stanis Yarmi long fran bai lukim net bilong Faze bai seksek.

Tasol ol ino ken ting olsem Faze bai pilai kaskas long ol. Faze wantaim ol nupela blut mangi ya bai traime long mekim wari long Poro sapos ol ino was gut long ol.

Ol igat pilaias olsem Roy Banga husat bai pilai long namel long lukim bal i go stret long ol flankas bilong em na tupela straiika long pinisim wok. Banga em wanpela hap stail man long pilai bipo ya tasol wok i mekim na boi ya i lus fom liklik tasol i wok long mekim kam bek bilong em.

Ol arapela pilaias husat bai sapot em, Marco Barry long beks, Dullen Tom, Yaka

Samuel long midfil na tupela straiika Kesa Demas na Dick Martin. Long dispela sison ol ino mekim gut tumas tasol igat sans yet sapos ol i stat winim ol dispela lasgems bilong ol. Ol lain ino gutpela bal wok tasol igat stail long pilai long wet graun na ken

Apo em i sempion bilong aussie ruls futbol long Goroka

AUSSIE RULS RIPOOT

WALLY AINU I raitim

APO STARS em i kamap sempion bilong aussie ruls long Goroka taim em i autim PJ Hawks las wiken.

Skoa i sanap olsem Stars em 10.9.69 na PJ Hawks em 1.7.13. Dispela skoa i soim olsem Apo Stars i memeim stret ol Hawks wan-sait.

Dispela em i namba wan aussie ruls fainel bihain long dispela gem i dai long Isten Hailens long 1980.

Stars i bagarapim tru sindaun bilong Hawks na putim 1.6.18 na Hawks i no putim wanpela poin. Wankain samting tu i bin kamap long namba tu kwata. Ol Apo i surikim skoa i go long 6.3.39 na Hawks i putim 0.3.3

Ol lain pilaias husat i pilai gut long Apo Stars em Raphael Robin, Paul Polas, Peter Lasssel, Kevin Mangai, Isacc Kena na Bobbie Bubu na long sait bilong Hawks em Bill Tabai, Paul Dakis, Robert Katu, Gabriel Agunan, Vincent Bailey na Elizah Demi.

Long arapela ol nius, Paul Laupu bilong Tisa Yunivesiti i kisim awot



Wiken Spots Dro


PORT MORESBY SOCCER ASSOCIATION Saturday August 15, 1998.

Bisini 1		
8.00	Second	Bau-Futz vs Fisika
9.00	W2	Guria vs Keras
10.00	W2	Adau Yellow Pages vs Pom Utd
11.00	W1	Wanzesi vs Sobou
12.00	First	Wanzesi vs Coecon Ela Utd
1.20	First	Simla vs WM1 Togelu
2.30	Premier	Hoods vs Blue Kumuls
4.00	Premier	Rapatona vs Tarangau
Bisini 2		
8.00	Second	WM1 Togelu vs Don-Bosco
9.00	W2	Falcon vs WM1 Togelu
10.00	First	Nisco vs Cyclone
11.00	W1	ICF Uni vs Bomana Blue Kumuls
12.00	First	Keweh vs Supdapek
1.10	Premier	ICF Uni vs Momase
2.30	Premier	IBS PS United vs Sobou
4.00	Premier	Guria vs Adau Yellow Pages
Sir John Guise Stadium 1		
9.00	P/Reserve	ICF Uni vs IBS PS United
10.10	U19	Guria vs ICPNG Pom Utd
11.20	P/Reserve	Guria vs Kurti-Andra
12.30	U19	Rapatona vs Tarangau
1.45	U19	Blue Kumuls vs Coecon Ela Utd
3.00	P/Reserve	Babaka vs Blue Kumuls
Sir John Guise Stadium 2		
8.45	U19	Cosmos vs IBS PS Utd
10.00	U19	Momase vs FBH Defence
11.10	P/Reserve	Sobou vs FBH Defence
12.20	P/Reserve	Rapatona vs Tarangau
1.30	P/Reserve	Telikom vs Momase
2.45	Second	NCDC vs Keweh
4.00	First	M. Gaindu vs Ilimo Bombers

STC 2		
10.00	U19	Hoods vs Kurti-Andra
11.00	P/Reserve	Hoods vs Adau Yellow Pages
12.00	Second	Cyclone vs Tawala
1.00	Second	Moyaka vs YMZ
2.00	Second	BB Utd vs CT. Kings
Sunday, August 16, 1998.		
Bisini 1		
8.00	Second	Bao-Mitas vs KTS
9.00	W2	Keras vs Murat
10.00	W1	Telikom vs Tarangau
11.00	First	Murat vs ICPNG Pom Utd
12.00	W1	Normads vs FBH Defence
1.10	First	Cosmos vs Burasong
2.30	Premier	Babaka vs FBH Defence
4.00	Premier	Telikom vs Tarangau
Bisini 2		
8.00	Second	Mukaso vs Dobo-Omens
9.00	W2	Cyclone vs Pom Utd
10.00	W2	GFC vs Adau Yellow Pages
11.00	W1	Naniu vs TST Stars
12.00	First	Keweh vs Coecon Ela United
1.10	First	GFC vs CT. Kings
2.30	Premier	Adau. Y. Pages vs Kurti-Andra
4.00	Premier	Guria vs Rapatona

Sir John Guise Stadium 1		
9.00	Second	Nibubaewa vs SPB
10.10	Second	Moyaka vs Bau-Futz
11.20	Second	CT. Kings vs Keweh
12.30	U19	Cosmos vs Rapatona
1.45	Second	Bao-Mitas vs SP Brewery
2.00	W2	CT. Kings vs Murat
4.00	First	WM1 Togelu vs Ilimo Bombers
Sir John Guise Stadium 2		
10.00	U19	ICF Uni vs Adau Yellow Pages
11.00	U19	Telikom vs Sobou
12.00	W2	Tawala vs CT. Kings
1.00	P/Reserve	Rapatona vs CT. Kings
2.00	Second	YMZ vs Nibu Baewa
3.00	Second	Dobo-Omens vs Cyclone
Byes:	First:	Normads
	Second:	Kutu

LAHI SOCCER ASSOCIATION Saturday August 15, 1998		
Unitech Ground 1		
1200	W1	Rapatona v Unitech
1300	W1	Guria v Waliya
1400	W1	Elcom v Sobou



• Melbourne Storm mekim histri . . . Marcus Bai putim mak.

1500	P2	Lae Biscuit v Unitech
1600	D1	Bugandi v Eastern Star
Sunday August 16, 1998		
1200	W2	Sunstriders v Malabu
1300	W1	Rapatona v Asiawe
1400	D2	Shouten Blues v Notnas
1500	P2	Unitech v Morobe United
1600	D2	Malabu v Kuac
Unitech Ground 2		
Saturday August 15, 1998		
1200	P1	Unitech v Asiawe
1315	P1	Guria v Lae Biscuit
1430	P1	Telikom v Morobe United
1600	P1	Defence v Sobou
Sunday August 16, 1998		
1200	D1	Bugandi v Northwest
1315	D1	Elcom v Dal Labu
1430	D1	Milne Bay United v Sunstriders
1600	P1	Unitech v Asiawe
Unitech Ground 3		
Saturday August 15, 1998		
1200	U19/1	Lae Biscuit v Rapatona
1300	U19/1	Unitech v Sikambu
1400	U19/2	Tisol v Eastern Star
1500	U19/1	Morobe United v Bugandi
1600	D2	KA Midnorth v Poasum
Sunday August 16, 1998		
1200	U19/2	Dal Labu v Tisol
1300	U19/2	Gee Otton v Wullet
1400	U19/2	Huonville v Poasum
1500	U19/1	Unitech v Rapatona
1600	U19/1	Bugandi v Sikambu

LAE TOUCH ASSOCIATION POINTS LADDER - ROUND ONE			
OPEN MENS DIVISION			
CLUB	W D L F	G/PLAYED	PTS/PLACINGS
Giants	12 3 - -	15	42
Salamanda	12 2 1 -	15	41

Dom	10 2 3 -	15	37
Grips	9 1 4 -	14	33
PC Bullets	6 4 5 -	15	31
Coronation	6 3 5 -	14	29
3M Warrior	6 3 5 1	15	29
Bees	6 - 9 -	15	27
Bumneng	5 1 9 -	15	26
LB Services	3 2 10 -	15	25
Sikambu	5 1 8 -	14	25
Gobari	-- 10 4	14	10
WOMENS DIVISION			
Bees	12 - - 2	14	36
Grips	10 1 3 1	15	35
Salamanda	7 5 3 -	15	34
Gobari	9 2 3 1	15	34
Coronation	7 4 4 -	15	33
Giants	7 4 3 1	15	32
Bumeng	9 1 3 2	15	32
3M Warriors	8 2 4 1	15	32
LB Services	4 2 9 -	15	25
PC Bullets	4 4 4 2	14	24
Dom	3 2 9 1	15	22
Sikambu	1 - 9 3	13	12
SENIOR MENS DIVISION			
Giants	12 - 2 1	15	38
3M Warriors	11 1 2 -	14	37
Grips	8 4 2 -	14	34
Coronation	8 3 1 1	13	31
PC Bullets	7 2 5 1 .	15	30
LB Services	7 1 7 -	15	29
Bees	5 2 8 -	15	27
Sikambu	6 1 4 2	13	23
Bumneng	5 - 8 2	15	23
Gobari	4 2 5 2	13	21
Salamanda	2 - 13 -	15	19
Dom	5 - 7 2	15	20
UNDER 17 DIVISION			
DOM	11 1 2 -	14	37
3M Warrior	9 3 3 -	15	36
Giants	10 2 1 1	14	35

Bumneng	8 2 4 1	15	32
PC Bullets	8 2 3 1	14	31
Salamanda	7 2 3 2	14	28
Bees	6 2 4 2	14	26
Lae Battery	4 2 9 -	15	25
Sikambu	4 4 2 3	13	22
Coronation	1 4 3 3	11	14
Grips	2 - 6 5	13	11
Gobari	1 - 5 8	14	8

This table shows your point ladder for round one only as you can see that some clubs only played 13 or 14 games, due to some team sheets went missing after the Sundays game. All clubs should have played 15 games each.

Therefore if you have any queries, please do not hesitate, but do come and see us (the match committees) for amendment.

Keep browsing trip.....and consult us when queries arises.




Thankyou . . .

PAPUA NEW GUINEA JUNIOR RUGBY LEAGUE NORTHERN ZONE U19 YES CARNIVAL - GOROKA August 8/9, 1998.

Saturday August 8, 1998 - R/Robin Results.			
Goroka 12	def	Ramu 6	
Tries:	K. Barunce	Tries:	B. Utum
J. Buko		Conv:	P. Leba
P. Tasim			
Lae 22	def	Mt. Wilhem	nil
Tries:	J. Komo/M. Kundi		
M. Fox/U. Topi			
Conv:	J. Nabal (3)		
Lae 14	def	Ramu 12	
Tries:	M. Kundi/B. Bal	Tries:	S. Lopera/D. Utum
P. Umei			P. Leva
Conv:	Nabau		
Goroka 34	def	Mt. Wilhem	nil
Tries:	P. Tasim (2)/MFisco		
J. Lesley/J. Maus			
B. Opiyato/G. Ofi			
Conv:	V. Kohi (2)		
N. Hoyato			
Goroka 12	def	Lae	nil
Tries:	B. Kohi/P. Tasim		
Conv:	B. Kohl (2)		
Mt. Hagen 5	def	Ramu 4	
Tries:	M. Patrick	Try:	K. Anis
Fieldgoal:	M. Sioni		
Nondugl 12	def	Dei 6	
Tries:	P. Anamb/J. Issac	Tries:	D. Ramoui
Conv:	C. Koimo 2	Conv:	J. Kewa
Kagua 11	def	Wabag 4	
Tries:	W. Graham 2	Tries:	D. Ramdu
Penaltygoal:	J. Kone		
Fieldgoal:	S. Alex		
Dei 16	def	Kagua 14	
Tries:	K. Pilim/S. Kumulus	Tries:	S. Alex/M. Leo
P. Kawa			W. Graham
Conv:	J. Kewa (2)	Conv:	W. Graham
Wabag 18	def	Nondugl 8	
Tries:	2 M. Naipo/J. Dezzmond	Tries:	S. Kopun
D. Ramdu		Conv:	P. Anama 2
Conv:	N. Teagan		
Kagua 11	def	Nondugl 8	
Tries:	K. Kuru/S. Alex	Tries:	M. Goiye/C. Koimo
Penaltygoal:	W. Graham		
Fieldgoal:	S. Alex		
Wabag 6	def	Dei	nil
Tries:	M. Naipo		
Conv:	N. Teagan		



WANTOK SPOT



OFC givim K21,000 long PNGFA long redim nesenel tim

HENRY MORABANG i raitim

PAPUA Niugini Futbol Asosiesen (PNGFA) i kisim pinis NZ\$19,000 (K21,000) long Osenia Futbol Konfederesen (OFC) hetkwa-ta long Nu Silan long redim nesenel tim long ol intanesenel tonamen.

PNG i gat tupela bikpela tonamen em long Melanesian Kap kik resis long Vanuatu long Septemba na Wol Wimens Soka kap long Auckland, Nu Silan.

Presiden bilong PNGFA Peter Mommers i tok olsem em i gat tupela tingting nau long salim tim i go long Vanuatu o maski. Bikos planti ol sinia pilaia long nesenel tim i kam

long Pot Mosbi tasol PMSA nau i no salim olgeta registresen bilong ol pilaia bilong em i go long nesenel bodi.

Sapos planti toktok i kamap, em bai sem-sim tingting na yusim dispela mani long salim ol wimens tim i go long Nu Silan.

Tasol dispela gem bilong ol meri bai i no inap isi bikos PNG bai salensim stret Australia na Tonga. Na long pul A, em Nu Silan Fiji na Samoa bai bai skelim strong.

Winga bilong dispela tonamen bai go long Wol Kap bilong ol meri long USA.

PNG i gat sans tasol bikpela birua em Australia tasol. "Mipela i gat gutpela tim. Sapos mipela i no kamap namba wan, i gutpela sapos mipela ken pinis seken.

Noken lukdaun long Nu Silan. I tru soka stendad long Nu Silan i go daun liklik.

Australia i gat planti ol profesenel pilaia long Japan, Sweden na Norway. Ol dispela pilaia bai joinim Australia long Osenia Kap.

Mommers husat tu em siaman bilong wimens soka long Osenia i tok 7-pela top tim insait long Wol Kap long US bai winim speke long Olympik Gems long yia 2000 long Sidni, Australia.

Mommers i askim olgeta asosiesen long salim nominesen bilong nesenel wimens sempionsip. Bihain long dispela sempionsip long Wabag, PNGFA bai tokaut long skwat bilong ol meri ya.

Momase bai winim Yuni

POM SOKA RIPOT

MOMASE bai traim rausim trasis bilong Yunivesiti long bikpela gem bilong Mosbi Soka long Sarere.

Yuni bai pait strong long holim namba wan ples long poin lata. Las wik PS United i dro wantaim ol na dispela i soim tru olsem Momase i ken mekim wankain pasin long dispela wiken.

Long namba wan raun tai mtupela tim i bung, Momase na Yuni i dro. Tasol long Sarere em taim bilong skelim strong.

Sapos Momase i bihainim wankain gem plen olsem em i nekim Telikom 3-0, ating ol boi Yuni bai kisim taim.

Momase i gat ol stail pilaia olsem Yuni. Long beklain em Neville Karu na Solok Apa yet bai i go paswantaim helpim kam long kipa Joe Arrow.

Insait long midfild Albert Augustine bai pilai wantaim Pauline Kanamon long senta na flanksbai Rolland Sepu na Solo. Ol dispela lain bai traim long setim ol gutpela bal kam long sait kam painim straika John Pips na Vincent Dominic long mekim nais long umben bilong Yuni.

Sapos ol mangi long Gerehu i bihainim gut ol gem plen bilong ol, sindaun bilong Yunivesiti bai bagarap.

Yuni em i gat planti namba wan pilaia stap long tim we i save long wanem kain stail bilong ol yet long kilim paia bilong ol birua.

Tupela staika StraikaSteven Mune na Hans Gewabing bai traim wok wantaim long fran long sutim gol long mak bilong birua. Long midfil ol i gat Desmond Waku, Batman Furugi, Ben Lakasa na Joe Aisa long kamapim gutpela difens na setim ol straika.

Albert Eka yet bai sanap long beklain na rausim ol lus bal i kam long gol eria bilong ol.

Insait long arapela ol gem Blu Kumuls bai traim long bagarapim sindaun bilong Hoods na Rapatona bai traim strongim win bilong em long Tarangau, Sobou bai go daun long PS United na Guria bai traim nekim Adau.

Long Sande Babaka na Difens bai wip, Telikom bai traim autim Tarangau, Kurti Andra bai autim Adau na Guria bai traim nekim Rapatona.

Long arapela ol soka nius, vais presiden bilong PSSA Simon Koima i no mamas long tresera bilong PMSA Enoch Pokarup long tok olsem Francis Kasau em presiden bilong PSSA.

Em i tok Kasau em i no moa presiden bilong PSSA, nupela presiden em Lawrence Papai, na i no laik PSSA i stap insait long kros bilong PMSA.



Pawa bilong Royals ... Senta bilong Royals David Mune i takolim winga bilong Paga Panthers insait long priliminari fainel bilong Pot Mosbi Ragbi Lig las wik. Royals i win na bai salensim Post Puma long grenfainel long Sande. Foto JOE IVAHARIA

Waliya na Guria bai traim strong long Lahi soka

FRANCO NEBAS i raitim

TUPELA biknem tim long Lahi bai traim strong long bikpela gem bilong wimens soka long dispela wiken.

Ol tim ya em Waliya na Guria. Waliya husat i kamap namba tu long nesenel klab sempionsip las mun bai skelim strong bilong Guria. Tupela tim wantaim nau i wok long ran antap long fainel 4 ples long Lahi soka asosiesen.

Tupela wantaim i strong long olgeta eria. Long fowat em Martha Raka na Naomi Boure long Waliya bai salensim Freda Niangi na Gina

Kens bilong Guria. Ol dispela pilaia i holim strong bilong dispela tupela tim ya. Long midfil bilong Waliya em Monica Ray na Alice Rumban long senta bai lukluk long givim bal igo long tupela flankas Diana Raka na Elis long setim tupela straika bilong ol. Ol bai kisim strongpela salens long Makut Saki na Sumi Augustine long sentrel midfil. Beklain bilong tupela tu i luk wankain, Guria em kepten yet Monista Sami wantaim Linda Fred bai i go pas na Waliya em Kay Ella na Wips Nugur. Long gol maus bilong Waliya em stail kipa Margaret Ume bai sambai long ol kik kam long straika bilong Guria.

Miriam Nathan bai was long arapela sait long ol birua long traim mak bilong em.

Dispela gem bai i wanpela strongpela we bai igat planti gutpela stail nabaut bai kamap stat long fes hap igto pinis bilong em. Long fes raun taim tupela tim ya i bin bung em Guria i bagarapim sindaun bilong Waliya 2-0. Long sarere Waliya bai traim bekim dinau tasol em bai ino inap isi ya, ol meri Guria bai sambai tasol long mekim gen namba tu taim. Long arapela pilai em, Rapatona bai pait wantaim Yunitek na Elcom bai traim katim pawa bilong Sobou.

Long pilaia bilong ol man, Yunitek bai traim autim Asiawe,

Lae Biscuit bai go daun long Guria, Telikom bai autim Morobe United na Defence bai givim hat taim long Sobou.

Game name long Yuni na Asiawe gem bai wanpela gutpela pilai we tupela sait wantaim bai traim winim gem bilong ol bihain long lus las wiken. Yuni i gat pilaia olsem Martin Tuckayo, Humbrey Tura na Paul Komboi bai go pas long ol sumating. Asiawe bai lukluk long Epa Tribian na Willie Serosero. Tupela baga ya em nogut ya sapos i gat spes kamap bai lukim umben i guria.

Arapela gem namel long Telikom na Morobe United em wanpela gutpela gem tu ya.

Gidix Nasa wantaim ol boi bilong em ya i wok long pretim top tim Sobou na Guria long kain pilai bilong ol.

Telikom long dispela yia i gat bikpela laik long winim wanpela taitel bilong Lahi soka asosiesen bihain long lusim LFA kam joinim Lahi. Planti boi bilong Nasa i lusim klab tasol ol yangpela blut olsem, Ambros Puy, Luwe Mondo, Amos Puy, Eston John na Nicholas Puy i wok long strongim tim stap.

Ol dispela pilaia ol i gat stail bilong ol yet na i save bagarapim sindaun bilong ol namaba wan tim tu ya na was gut long ol.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.